

UNITED NATIONS
United Nations Interim
Administration Mission
in Kosovo



NATIONS UNIES
Mission d'Administration
Intérimaire des Nations
Unies au Kosovo

PROVISIONAL INSTITUTIONS OF SELF GOVERNMENT

KUVENDI I KOSOVËS
СКУПШТИНА КОСОВА
ASSEMBLY OF KOSOVO

TRANSKRIPT

NGA SEANCA PLENARE E KUVENDIT TË KOSOVËS
TË MBAJTUR MË 3.11. 2006

SA PLENARNE SEDNICE SKUPŠTINE KOSOVA
ODRŽANE 3.11.2006. GODINE

NËNTOR - NOVEMBAR, 2006

RENDI I DITËS

1. Miratimi i rendit të ditës,
2. Koha për pyetjet e deputetëve,
3. Shqyrtimi i Raportit të Zyrës së Auditimit Gjeneral për të gjeturat faktike në Kuvendin e Kosovës,
4. Shqyrtimi i Raportit për punën e Autoritetit Rregullator të Telekomunikacionit për vitin 2005.

ДНЕВНИ РЕД

1. Усвајање дневног реда,
2. Време за посланичка питања,
3. Разматрање Извештаја Канцеларије Генералног Ревизора о чињеничном стању у Скупштини Косова,
4. Разматрање Извештаја о раду Регулативног Ауторитета за Телекомуникацију за 2005. годину.

KRYETARI I KUVENDIT KOLË BERISHA – Të nderuar kolegë deputetë, të nderuar ministra, mirë se keni ardhur në seancën e sotme plenare të Kuvendit të Kosovës. Ju njoftoj se në seancë janë të pranishëm 88 deputetë që do të thotë ekzistojnë kushtet për t'ia filluar punës.

Ju njoftoj se në pajtim me rregullën 6.2. dhe 7.3. të Rregullores së punës së Kuvendit të Kosovës, Kryesia e Kuvendit në mbledhjen e mbajtur dje më 2 nëntor 2006 e rishikoj rendin e ditës të propozuar për seancën plenare të datës 3 nëntor 2006 dhe vendosi që ta konfirmojë rendin e ditës të propozuar për seancën e sotme plenare dhe që t'i propozojë seancës plenare që pas debatit lidhur me raportin për të gjeturat faktike në Kuvendin e Kosovës të hidhet në votim propozimi për formimin e komisionit hetimor.

Andaj vazhdojmë me rendin e ditës së propozuar. Gazmend Muhaxheri.

DEPUTETI GAZMEND MUHAXHERI – Zonja dhe zotërinj, i nderuar kryetar i Kuvendit.

KRYETARI I KUVENDIT KOLË BERISHA – Kam një lutje, do të diskutojmë, por të kemi fjalor parlamentar. Duke filluar prej teje Gazmend. Urdhëro.

DEPUTETI GAZMEND MUHAXHERI – Faleminderit z. kryetar. Diskutimi i sotëm ka fillimin e vet, fillimi është shpenzimet e 176 milion euro të Qeverisë së Kosovës në dhjetor të vitit 2004.

Për këto shpenzime Grupi Parlamentar ORA pat kërkuar nga Kuvendi i Kosovës formimin e komisionit hetimor. Kjo kërkesë e Grupit Parlamentar ORA hasi në rezistencë të jashtëzakonshme të koalicionit qeverisës dhe të ish- kryetarit të Kuvendit. Arsyet janë sot në këtë raport të gjeturat faktike për shpenzimet e buxhetit të Kuvendit. Institucioni i cili duhet të ishte mbrojtës i ligjshmërisë dhe i rendit është shkelësi më i madh i tyre.

Në seancën në të cilën u diskutua për vilën Gërmia Grupi Parlamentar i ORA-s këtë e tha qartë. Ky raport vërteton shkeljet jo transparente dhe keq menaxhimin e buxhetit të Kosovës .

KRYETARI I KUVENDIT KOLË BERISHA – Z. Muhaxheri, ende nuk kemi ardhur në atë pikë të rendit të ditës. Flitet për rendin e ditës, kjo për cilën po flisni ju është pika e tretë e rendit të ditës.

Z. Alush Gashi e ka fjalën.

DEPUTETI ALUSH GASHI – I nderuari z. kryetar i Kuvendit, zonja dhe zotërinj deputetë. Në emër të Lidhjes Demokratike të Kosovës dhe të grupit të saj parlamentar rikonfirmojmë përcaktimin tonë për transparencë të plotë institucionale të bindur se askush nuk duhet të jetë mbi ligjin.

Zoti kryetar, Lidhja Demokratike e Kosovës dhe grupi i saj parlamentar e kanë mbështetur fillimin e auditimit në Kuvendin e Kosovës. Në materialin e dërguar, z. kryetar, numër 02/2628 të 6 tetorit 2006 është edhe përkthimi i letrës së Zyrës së

auditorit gjeneral dërguar kryetarit të Kuvendit të Kosovës z. Kolë Berisha më 3 korrik të vitit 2006 ,ku mes tjerash ,thuhet:

Janë të gjetura njëburimore se procedurat e kryera nuk e përmbajnë auditimin dhe si i tilla as opinionin e auditimit dhe se jemi në proces të finalizimit të auditimit tonë në pasqyrat financiare të Kuvendit të Kosovës për vitin 2006, përfundimisht më 31 dhjetor.

Z. kryetar pa hyrë në vlerësime të materies, por për të përcaktuar, ju lutem është për rend të ditës, për të hyrë në vlerësimin e materies, por për të përcaktuar mekanizmin e verifikimit të të dhënave njëburimore dhe për të dhënë kohë për përfundim të auditimit të kryer nga Kuvendi i Kosovës, Grupi i LDK-së në bazë të Rregullores së punës së Kuvendit të Kosovës me votë ka vendosur që atë ditë.....

KRYETARI I KUVENDIT KOLË BERISHA – Alush, ju thashë se për secilin është njoftuar se biseda rreth rendit të ditës zgjat dy minuta.

Urdhëro.

DEPUTETI ALUSH GASHI – Z. kryetar ju faleminderit, si kryetar i Grupit Parlamentar më takon koha për të arsyetuar pranimin ose mospranimin e rendit të ditës. Për të caktuar mënyrën e verifikimit të të gjeturave njëburimore kemi ardhur në përfundim se në bazë të Rregullores së punës së Kuvendit, verifikimin e të dhënave mund ta bëjë Komisioni për Buxhet i Kuvendit të Kosovës ose të formohet një komision i posaçëm për këtë çështje, i cili quhet në mënyra të ndryshme.

Zonja dhe zotërinj deputetë pas seancës plenare të 27 tetorit 2006 z. Kolë Berisha, kryetari i Kuvendit të Kosovës, na e ka përcjellë letrën e 31 tetorit 2006 të Zyrës së Auditorit Gjeneral, ku konfirmohet se raporti final i të gjeturave faktike të Kuvendit të Kosovës i është dorëzuar Kuvendit të Kosovës më 4 korrik 2006 dhe se Zyra e Revizionit Gjeneral ka besuar se të gjeturat e raportit kanë parashtruar nevojën për hetuesi të mëtutjeshme dhe se raporti i është dorëzuar njësisë së hetuesisë financiare që të fillojnë hetuesitë e mëtutjeshme financiare.

Pra, sipas shkresës raporti është final dhe se nuk nevojitet kohë për shtesë. Pas të dhënave të fundit për ne pushojnë arsyet e heqjes së kësaj pike nga rendi i ditës. Ju faleminderit.

KRYETARI I KUVENDIT KOLË BERISHA – Vazhdojmë me rendin e ditës. Ju njoftoj se në pajtim me rregullën 26.1 të Rregullores së punës së Kuvendit koha për pyetjet e deputetëve për Qeverinë është e kufizuar në 50 minuta.

Kemi pyetjet nga deputeti Gani Koci, është përsëritur pyetja për Qeverinë e Kosovës dhe për ministrin Haki Shatri. Zotëri Koci kërkoni fjalën.
Urdhëroni z. Koci.

DEPUTETI GANI KOCI – Nëse z. ministër i Ekonomisë dhe i Financave është i gatshëm t'i përgjigjet pyetjes, unë vetëm do ta ripërsëris do ta lexoj publikisht pyetjen që ia kam bërë ministrit, duke u bazuar në faktin se shumë institucione qeveritare për aktivitetin e tyre shfrytëzojnë objekte dhe hapësira private për të cilat nga Buxheti i

Konsoliduar i Kosovës harxhohen shuma të konsiderueshme parash. Pyetja konsiston me këtë?

Sa është numri i objekteve private që shfrytëzohen për institucionet e Qeverisë dhe sa janë shumat mujore që paguhen, në emër të qirasë, për secilën ministri veç e veç.

KRYETARI I KUVENDIT KOLË BERISHA – Ju faleminderit. Z. ministër urdhëroni.

MINISTRI HAKI SHATRI – Faleminderit i nderuari kryetar i Kuvendit, të nderuar deputetë. Çështja që është shtruar nga z. Gani Koci, deputet i Kuvendit, është një çështje që vazhdimisht e preokupon edhe Qeverinë e Kosovës. Siç dihet një numër i madh i institucioneve tona qendrore dhe lokale, në mungesë të kapaciteteve të hapësirës për punë shfrytëzojnë hapësirat të cilat merren me qira për zyra dhe hapësira të tjera të domosdoshme për punë.

Unë e faleminderoj po ashtu z. Koci i cili ka pasur mirëkuptim që në mungesë të kohës sime të përgjigjesha në ditën kur ka qenë sipas rregullave të caktuara, sot po e shfrytëzoj rastin të tregoj që në nivelin e institucioneve qendrore, pa përfshirë këtu komunat, shfrytëzohen rreth 34 objekte private me qira nga institucionet qendrore. Shuma mujore e gjithmbarshme e kësaj qiraje sipas të dhënave që ka në thesar, pra shuma faktike, që paguhet për një muaj është 173.800 euro. Në periudhën janar – shtator janë paguar për qira për institucionet qendrore 1.564.188 euro. Pra shuma mujore është 173.800 euro dhe numri i objekteve është 34 të mëdha dhe të vogla, por duhet të them që një numër i institucioneve në tërësi ministri, punën e tyre e zhvillojnë në objekte private. Këtu do ta veçoja një pjesë të administratës tatimore në kuadër të ekonomisë të Ministrisë së Ekonomisë dhe të Financave, të Ministrisë së Bujqësisë, të Pylltarisë, të Ministrisë së Tregtisë dhe të Industrisë, një pjesë të Ministrisë së Shëndetësisë kanë po ashtu objekte me qira që janë shuma më të mëdha, s'po i përmend disa që janë më të vogla si p.sh. Ministrinë e Arsimit, Shkencës dhe të Teknologjisë që në tërësi është në objekt privat, Ministria e Mbrojtjes së Ambientit dhe të Planifikimit Hapësinor që ka shumë më të madhe vjetore rreth 533 mijë, paguan qira, Ministria për Kthim dhe Komunitete, Ministria për Energjetikë dhe Miniera, Zyra e Auditorit Gjeneral, Shërbimi Policor i Kosovës ka një pjesë të objektit me qira, Qendra Financiare e Informacionit, Komisioni Qendror i Zgjedhjeve dhe një pjesë tjetër e institucioneve, por shumat janë më të vogla.

KRYETARI I KUVENDIT KOLË BERISHA – Gani, keni pyetje shtesë?

DEPUTETI GANI KOCI – Ju shfrytëzoni 34 objekte dhe në periudhën janar – shtator keni paguar 1.500 mijë euro, llogaritur për një vit, do të thotë afër 2 milion ose 2 milion euro me qira. Sa objekte do t'i ndërtonit për 7 vjet me nga 2 milion qira në vit, pra sa objekte dhe sa shtëpi të funksionarëve i keni marrë me qira, sa objekte të palegalizuara i shfrytëzoni me qira si objekte të institucioneve të Kosovës

KRYETARI I KUVENDIT KOLË BERISHA – Ju faleminderit. z. ministër a keni përgjigj?. Urdhëroni.

MINISTRI HAKI SHATRI – Faleminderit. çështja qëndron në atë se institucionet tona duhet të punojnë më aktualisht. Ne jemi të vetëdijshëm që me këto para do të

ndërtoheshin për 7 vjet ndoshta të gjitha objektet, por çka më aktualisht nuk mundemi ne me i qitë 7 vjet institucionet në rrugë deri t'i ndërtojmë ato objekte, e para.

E dyta, pjesë e pyetjes që u shtrua është ajo që të gjitha organizatat buxhetore e kanë përgjegjësinë e tyre si i menaxhojnë mjetet e veta të buxhetit dhe rregullat janë që objektet merren me procedurë të prokurimit, në qoftë se një organizatë buxhetore nuk e përfill procedurën e prokurimit ,, Qeveria, as Ministria e Financave nuk janë përgjegjëse, por përgjigjen organizatat buxhetore.]

Unë nuk e di në rastin e procesit të prokurimit a është marrë parasysh objekti a ka leje nga komuna a s'ka, sot nuk e di se të kujt janë ato objekte, kush është pronari, në qoftë se ka nevojë ne do të kërkojmë informata. Faleminderit.

KRYETARI I KUVENDIT KOLË BERISHA – Ju faleminderit. Deputetja Sala Berisha – Shala, ka pyetje për ministrin Shatri.

DEPUTETJA SALA BERISHA SHALA – Faleminderit z. kryetar. Z. ministër, financimi i projekteve të cilat nuk përfillen ,pajtohemi të gjithë se dëmtojnë rënd buxhetin e Kosovës.

Në vitin e kaluar tenderi i shpallur nga Komisioni i Pavarur për Miniera dhe Minerale është financuar projekti për formimin e **Shërbimit Gjeologjik** të Kosovës, i hartuar nga Shërbimi Gjeologjik Britanik në formën e një dokumenti- këshillë për formimin e **Këshillit Gjeologjik** të Kosovës. Pyetja ime është: Sa ka kushtuar projekti ,përkatësisht hartimi i një dokumenti të tillë?

KRYETARI I KUVENDIT KOLË BERISHA – Ju faleminderit. z. ministër, urdhëroni.

MINISTRI HAKI SHATRI – Faleminderit z. kryetar. Lidhur me pyetjen e deputetes kemi këtë përgjigje.

Projekti -**këshillë** për Shërbimin Gjeologjik të Kosovës, është projekt i përgatitur nga ish -Drejtorati i Minierave dhe i Mineraleve ,tani Komisioni i Pavarur për Miniera dhe Minerale. Vlera e projektit ka qenë dhe buxheti për këtë projekt ka qenë i lejuar me buxhetin e vitit 2004 në vlerë prej 66 mijë e katërqind e nëntëdhjetë euro, është shpallur një tender për realizimin e këtij projekti. Në këtë tenderë kanë ofertuar katër firma dhe fituesi i tenderit për realizimin e këtij projekti ka qenë një firmë që quhet BRITISH GEOLOGICAL SYLVEJ nga Britania e Madhe, çmimi i fituesit ka qenë 64 mijë e 663 euro. Pjesa e parë e projektit ka kushtuar 60 mijë e 533 euro dhe është paguar nga kategoria ekonomike e investimeve kapitale nga buxheti i vitit 2004 me numër të CPO-së 41684/2004 më 20.12.2004.

Pagesa e pjesës së dytë të projektit është bërë me buxhetin e vitit 2005 në shumë prej 4.100 euro dhe është paguar nga kategoria ekonomike e investimeve kapitale, nga pajisjet e tjera, kodi ekonomik 03 0012 me numër të CPO-së 25060/2005 më 20.10.2005. E kemi bashkangjitur edhe gjithë dokumentacionin që përcjell pagesën e këtij projekti, pra CPO-të të nxjerra nga thesari, në qoftë se ka nevojë për përgjigje shtesë ose ka pyetje shtesë lidhur me këtë , mund t'i ofrojmë. Faleminderit.

KRYETARI I KUVENDIT KOLË BERISHA – Ju faleminderit. Urdhëroni deputete Sala.

DEPUTETJA SALA BERISHA – Faleminderit z. ministër. Pyetja ime shtesë është: Cili institucion e mori për bazë këtë projekt, a ka edhe projekte të tjera që janë financuar e nuk përfillet zbatimi i tyre dhe a duhet të përgjigjet dikush për këto projekte të financuara nga buxheti i konsoliduar i Kosovës që unë kam të dhëna se edhe në ministrinë e tjera buxhetore ka projekte që janë financuar, por që nuk merren për bazë në zbatimin e tyre. Faleminderit.

KRYETARI I KUVENDIT KOLË BERISHA – Faleminderit. z. ministër.

MINISTRI HAKI SHATRI – Faleminderit. unë kam qenë i përgatitur për këtë pyetje dhe përgjigje konkrete, përndryshe pjesën shtesë të pyetjes nuk e kam mjaft të qartë, ose kërkohet që unë t'i përgatis përgjigje për të gjitha projektet investuese në vijim, ose në të kaluarën duhet kohë me u përgatit ,më e marrë dokumentacionin. Faleminderit shumë.

KRYETARI I KUVENDIT KOLË BERISHA – Ju faleminderit z. ministër. deputeti Ibush Jonuzi ka një pyetje për ministri Bujar Dugolli. Urdhëroni z. Ibush.

DEPUTETI IBUSH JONUZI – Faleminderit z. kryetar, ministra të nderuar, zonja dhe zotërinj deputetë.

I nderuari ministër Dugolli, ju si anëtar i Bordit të AKM-ës njëherit edhe ministër në Ministrinë e Tregtisë dhe Industrisë, më intereson të di sa po zbatohen kontratat e nënshkruara për investime në ato ndërmarrje në të cilat është bërë privatizimi me Spinof Special dhe sa po zbatohet kontrata e punësimit të punëtorëve në të njëjtat ndërmarrje. Ju faleminderit.

KRYETARI I KUVENDIT KOLË BERISHA – Ju faleminderit urdhëroni z. ministër.

MINISTRI BUJAR DUGOLLI – Faleminderit z. kryetar, të nderuar deputetë të nderuar të pranishëm.

Duke ditur se të dhënat për ndërmarrjet e privatizuar me Spinof Special ende mbesin përgjegjësi për menaxhmentin AKM-ës, respektivisht të Shtyllës IV të UNMIK-ut, ne si anëtarë të Bordit -anëtarë vendorë dhe unë pas marrjes së kësaj pyetjeje kam kërkuar të dhëna nga menaxhmenti lidhur me këtë pyetje për ta përgatitur përgjigjen.

Nga të dhënat e ofruara del se me Spinof Special janë finalizuar 15 ndërmarrje, do me thanë 15 kontrata të cilat arrijnë shumën e paguar 78 milion e dyqind e tetëdhjetekatërmijë e njëqind e dy euro. Ato ndërmarrje janë: Fabrika e tullave "Përparimi," IMB Sillos, Ballkani i Suharekës, Llamkosi, Ferenikeli, Banja e Klllokotit, Fabrika e Armaturës, Kosovatekst, Birraria e Pejës, Hotel Iliria, Veraria Rahovec, IDGJ Tabako, Fabrika e vajit, IMN **Fabrika e Tullave** dhe së fundit Grand Hoteli.

Në këto ndërmarrje janë investuar deri më tani 12 milion e 83 mijë e pesqindpesdhjetetetë euro dhe janë punësuar 1372 punëtorë ,ndërsa janë të zotuar për

investime 121 milionë e 792.564 euro, kurse është premtua punësimi i 6306 punëtorëve. Kuptohet se në të gjitha këto kontrata e kanë periudhën e vet nga 2 deri 3 vjet.

Duke marrë për bazë këtë dinamikë del se për shumicën e kontratave të nënshkuara zotimet e investimeve dhe numri i punëtorëve janë duke shkuar sipas dinamikës së kërkuar, por ka të dhëna ose informacione se disa nga kompanitë ende nuk janë në ritmin e punës për të cilin ne kemi kërkuar si vendorë, që pëpartamenti përkatës pranë Agjencisë Kosovare të Mirëbesimit të shqyrtojë dhe të kërkojë mënyrë strikte që të realizohen zotimet, duke përcjellë ato zotime me fatura të hollësishme se a janë investuar ato mjete dhe në rast se ndërmarrjet e caktuara nuk e përfillin, atëherë të shfrytëzohet e drejta e kthimit prapa, që do të thotë e anulimit të atij privatizimi, duke marrë çdo rrezik investitori, i cili nuk i ka realizuar premtimet. Faleminderit.

KRYETARI I KUVENDIT KOLË BERISHA – Ju faleminderit. Keni pyetje shtesë? Nuk ka. Pyetje të tjera të cilat i drejtohen ministrit Qemajl Ahmeti, kryeministrit Agim Çeku dhe ministrit Astrit Haraqia, nuk janë këtu, prandaj mbesin për seancën tjetër.

Hydajet Hyseni e ka kërkuar fjalën, urdhëroni.

DEPUTETI HYDAJET HYSENI – Faleminderit z. kryetar. Unë dua ta përsëris ta kthej në këtë sallë pyetjen për të cilën ende ,për fat të keq, nuk kemi marrë përgjigje. Pyetja e cila u është drejtuar Qeverisë dhe ministrive përkatëse edhe Ministria e Financave është ministri përkatës në çështjen e fjalë.

KRYETARI I KUVENDIT KOLË BERISHA – E keni bërë kërkesën me shkrim.

DEPUTETI HYDAJET HYSENI – Për mjetet e shpenzuara për tërmetin në Gjilan, në pritje të përgjigjes unë desha vetëm t'i ndihmoj edhe me një pyetje shtesë? A i ka shqyrtuar konstatimet e revizorit të auditivit lidhur me mënyrën e shpenzimit të mjeteve për tërmetin në Gjilan dhe cili është vlerësimi i Qeverisë për to?. Ju faleminderit z. kryetar.

KRYETARI I KUVENDIT KOLË BERISHA – Ju faleminderit. A e keni dorëzuar pyetjen me shkrim?

DEPUTETI HYDAJET HYSENI – Po z. kryetar, siç e dini edhe Kuvendi, besoj edhe opinionin, sepse kjo pyetje është shtruar më parë se një vit, është rishtuar disa herë gojarisht këtu në Kuvend, presim përgjigjen.

KRYETARI I KUVENDIT KOLË BERISHA – Mirë, faleminderit. Fjalën e ka deputeti Nait Hasani.

DEPUTETI NAIT HASANI – I nderuari kryetar. Më vjen keq që nuk janë këtu kryeministri dhe ministri i Kulturës z. Haraqia, po e shoh të arsyeshme që unë t'ju shtroj pyetje, sepse është gjendja shumë alarmante dhe shumë urgjente, pikërisht për qytetin e Prizrenit. Pyetjen që kam bërë për ministrin dhe për kryeministrin, ata janë përgjegjës pikërisht për këtë çështje të kulturës dhe të mbrojtjes së vlerave të kulturës në Prizren.

Kur e them këtë e kam parasysh Ligjin për trashëgiminë kulturore që e kemi miratuar pikërisht në këtë Kuvend për mbrojtjen e vlerave arkeologjike.

Kemi parasysh, sepse në Prizren është bërë renovimi i Kishës së Shën Gjergjit, se në këtë objekt gjatë restaurimit janë gjetur eksponate të vjetra, është zbuluar një mur një metër e gjysmë i gjerë dhe disa metra i gjatë, janë zbuluar skelete të trupave të njerëzve dhe kush do të marrë përgjegjësi për këto shkelje, për këto dëmtime arkeologjike pikërisht për qytetin e Prizrenit me një vlerë dhe traditë të lashtë kulturore.

Prandaj unë pyetjen ua kam bërë ministrit dhe kryeministrit pikërisht për renovimin e Kishës së Shën Gjergjit në Prizren, po ashtu u financua renovimi i Kishës së Shën Gjergjit, (serbisht "Sveti Savës"). Gjatë renovimit u zbulua një mori varrezash të lashta ilire, është bërë ndalimi i punës për ndriçimin dhe për lagështinë e këtyre varrezave nga Prokuroria Ndërkombëtare. A keni dijeni dhe çfarë masash janë marrë pikërisht ndalohet puna e mëtejshme.

Ndërsa pyetja për kryeministrin meqë është ekzekutiv, pikërisht atij dhe këtij parlamenti u takon përgjegjësia ta marrin vendim që të ndalohet puna dhe të bëhen gjurmime arkeologjike, identifikimi i të gjitha atyre gjetjeve dhe pastaj të zhvillohet rinovimi i kishës. Përndryshe, përgjegjësinë e mban ky parlament për shkeljet dhe për moszbulimin e të dhënave arkeologjike në Kishën e Prizrenit.

Prandaj, unë kërkoj të krijohet një komision i cili do ta ndalojë punën e mëtejshme të renovimit, do ta vazhdojë zbulimin, kurse arkeologët ta thonë fjalën e tyre dhe përsëri të fillojë rinovimi ose forma të tjera të gjurmimit. Faleminderit.

KRYETARI I KUVENDIT KOLË BERISHA – Ju faleminderit. Shpresoj se në seancën e ardhshme do të merrni përgjigje. Vazhdojmë më tutje. Urdhëroni z. Hasani.

DEPUTETI NAIT HASANI – Z. kryetar, kjo duhet të shtrohet si çështje urgjente, sepse aty janë bërë fotografime që i kanë Ministria e Kulturës dhe Departamenti i Arkeologjisë në Prizren. Të gjitha këto janë ndaluar për publikim. Kam kërkuar fotografitë edhe nga Departamenti i Prizrenit edhe nga Ministria e Kulturës, por asnjëra e as tjetra nuk m'i kanë dhënë ato, me të cilat dëshmohet gjendja faktike në Kishën e Prizrenit. Prandaj kërkohet të krijohet komisioni që ta ndalojë punën e mëtejshme të renovimit, të bëhen zbulimet, pastaj të ecet përpara me ato të tjerat.

KRYETARI I KUVENDIT KOLË BERISHA – Ju faleminderit. Kalojmë në pikën e tretë të rendit të ditës.

3. Shqyrtimi i Raportit të Zyrës së Auditimit Gjeneral për të gjeturat faktike në Kuvendin e Kosovës

Ftoj propozuesin e mocionit, përfaqësuesin e ORËS ta marrë fjalën.

DEPUTETI GAZMEND MUHAXHERI – Diskutimi i sotëm e ka fillimin, siç thashë me shpenzimet e Qeverisë së Kosovës për fund vitin 2004. Për këto shpenzime Grupi Parlamentar ORA pat kërkuar ngritjen e një komisioni hetimor. Kjo kërkesë e Grupit Parlamentar ORA hasi në rezistencë të jashtëzakonshme të koalicionit qeverisës dhe tek

ish- kryetari i Kuvendit. Arsyet në këtë raport janë të gjeturat faktike për shpenzimet e buxhetit të Kuvendit.

Institucioni i cili duhet të ishte mbrojtës i ligjshmërisë dhe i rendit është shkelësi më i madh. Në seancën ku u diskutua për vilën Germia, Grupi Parlamentar ORA këtë e tha qartë se shkeljet dhe jotransparenca në menaxhimin e buxhetit janë evidente. Ky raport këtë e vërteton.

Sot po shqyrtojmë raportin e Auditorit Gjeneral për të gjeturat faktike në Kuvendin e Kosovës jo për të gjykuar ish- kryetarin e Kuvendit të Kosovës, por për të gjykuar një fenomen që po i gërryen themelet e institucioneve të Kosovës. Ky është keqpërdorimi i pozitës zyrtare zotërinj. Me këtë keqpërdorim të pozitës zyrtare dhe po vihet në rrezik e ardhmja e Kosovës.

Mijëra punëtorë të ndershëm të administratës civile në Kosovë janë dëshmitarë të keqpërdorimeve dhe të korrupsionit në institucionet tona, të kryera nga ministra, sekretarë permanentë, drejtorë buxheti, drejtorë prokurimi.

Në të gjitha veprimet e paligjshme keqpërdorimet dhe hajnitë ka së paku një dëshmitar, një njeri i ndershëm që sot hesht. Në pamundësi që ta ndryshojë situatën e krijuar dhe disa prej këtyre njerëzve të ndershëm largohen nga këto institucione, disa të tjerë presin se do të vijnë ditë më të mira. Ne si Kuvend i Kosovës duhet të përpiqemi që në bazë të obligimeve që i kemi dhe në bazë të betimit që e kemi dhënë, t'ua dërgojmë mesazhin këtyre njerëzve se do të vijnë ditë më të mira pa keqpërdorime. që vihen re në këtë raport. Unë do të ndalem në dy .

Më 9 dhjetor 2005 për punët që nuk janë kryer në ndërtimin e vilës Germia punëkryesit i janë dhënë 1 milion e 200 mijë euro më tepër dhe rasti i dytë është rasti i veturës super luksoze, për të cilën janë dhënë 236 mijë euro, do me thanë vetëm për këto dy pozicione buxheti i Kosovës është dëmtuar për 1 milionë e gjysmë euro.

Ky Kuvend në vitin 2005 pensionistëve të Kosovës u ka premtuar 6 milion euro për ngritjen e pensioneve, 1 milion e gjysmë euro pensionet janë plaçkitur dhe atë në Kuvendin e Kosovës parat kanë qenë të gatshme Ministria ka mund t' i transferonte që t' u jepeshin pensionistëve.

Ministria e Ekonomisë dhe e Financave arsyetohet se nuk ka mjete edhe se mjetet nuk i lë Fondi Monetar Ndërkombëtar të shpërndahen. Po ju bëj pyetje? A lejon Fondi Monetar Ndërkombëtar që fondet të plaçkiten?

Nënçmimi më i madh për 30 mijë punëtorë të arsimit z. Hamiti, z. Gashi, zonja Hundozi edhe ju të gjithë punëtorët e arsimit që jeni këtu, janë 2 mijë euro të dhëna për punëtorët e ish -Parlamentarit Daci që të mësojnë skijim në Brezovicë. Është pozitë e mjerë zotërinj të pozitës që të mbroheni me argumentin e forcës e në këtë rast argumentin e forcës së votës përpara fuqisë së argumenteve që i parashtron ky auditim që ne i kemi parashtruar 2 vjet në Kuvendin e Kosovës.

Dhe fare për fund , në debatin e fundit për vilën Germia dikush u mundua ta paraqet luftën parimore të Grupit Parlamentar ORA si luftë private të Veton Surrojit dhe të

kryeparlamentarit Nexhat Daci. Nëse kishte luftë private ajo është në mesin tuaj ,zotëri, jo në Grupin Parlamentar ORA.

KRYETARI I KUVENDIT KOLË BERISHA – Ju faleminderit. Deputeti Fadil Geci e ka kërkuar fjalën. Sigurish në emër të LDK-ës.Mirë, urdhëro Sabri.

DEPUTETI SABRI HAMITI – Unë e respektoj vullnetin me qenë tejet atraktiv të parafolësit që përmend emra vend e pa vend, por unë po i them që nuk është e qëlluar të krijojë **ortopi** sociale të paarsyeshme në një diskutim që s'ka lidhje me ato probleme hiq. Ai për arsimin di pak edhe mjaftë e ka që po na përmend. Faleminderit.

KRYETARI I KUVENDIT KOLË BERISHA – Ju faleminderit në emër të Grupit të LDK-ës deputeti Alush Gashi.

DEPUTETI ALUSH GASHI – I nderuari z. kryetar, nga shkresa që ju e keni marrë e që u është përcjellë edhe deputetëve , do të thotë Grupit Parlamentar të Lidhjes Demokratike të Kosovës, bëhet me dije se lënda është dërguar në hetuesi. Po ashtu bëhet me dije se në letrën e mëhershme këto janë të dhëna njëburimore, për të cilat nevojitet verifikim.

Për mënyrën e verifikimit parlamentar ekzistojnë disa mundësi. Mund të kryhet verifikimi përmes Komisionit të Buxhetit ose të formohet grupi i posaçëm.

Ne si grup parlamentar nuk e predikojmë rezultatin final të këtyre të gjeturave , ne zotohemi për mosndërhyrje në punë gjatë hetimeve edhe për mos ndërhyrje të gjyqësorit, andaj si Grup Parlamentar qëndrimin tonë do ta japim pas të dhënave finale. Andaj i ftoj deputetët e Grupit Parlament të Lidhjes Demokratike të Kosovës që në cilësi të deputetëve nëse e shohin të arsyeshme ,të japin kontributin lidhur me këto të dhëna. Faleminderit.

KRYETARI I KUVENDIT KOLË BERISHA – Ju faleminderit. Në emër të PDK-së Jakup Krasniqi.

DEPUTETI JAKUP KRASNIQI – Z. kryetar, të nderuar deputetë. Shfrytëzoj rastin që në emër të Grupit Parlamentar të Partisë Demokratike të Kosovës të kërkoj që edhe më tej në Kuvend të jemi unikë për çështjet më vitale të vendit. Të jemi unikë në angazhimet tona politike e institucionale për t'i luftuar dukuritë negative, për t'i përmbushur standardet dhe obligimet tona karshi të gjithë qytetarëve.

Unikë për t'i mbrojtur vlerat tona kombëtare, vlerat tona të trashëguara historike, fetare e kombëtare që i krijuan brezat në të shkuarën në Kosovë. Unikë për të luftuar krimin, kontrabandat dhe korrupsionin, unikë për të hartuar kushtetutën e vendit dhe të gjitha obligimet simbolike ligjore që i duhen shtetit të ri të pavarur dhe sovran të Kosovës.

Unikë për të vendosur sundimin e ligjit dhe të veprimit, shtetin ligjor në mbrojtje të të gjithë qytetarëve të Kosovës pa dallim etnie, gjuhe dhe feje. Ky unitet i duhet sot Kosovës.

Të nderuar deputetë para gati dy vjetësh, konkretisht në fillim të kësaj legjislature, në emër të Grupit Parlamentar të Partisë Demokratike të Kosovës kam kërkuar të formohet

komisionit hetimor parlamentar për të hulumtuar shkallën e krimit të organizuar në institucionet e Kosovës, por aso kohe koalicioni pat mbivotuar opozitën. Formimi i komisionit parlamentar hetimor u pengua ,por nuk u penguan krimi i organizuar, kontrabanda dhe korrupsioni, nuk u penguan vjedhjet në buxhetin e Kosovës nga drejtuesit e lartë të institucioneve përkatëse dhe të vetëqeverisjes në të gjitha nivelet e tij. Në Raportin e auditorit të përgjithshëm që kemi në shqyrtim janë konfirmuar keqpërdorimet e shumta që ne, opozita ,i kemi ngritur me kohë.

Prandaj, këto dukuri të dëmshme të shoqërisë sonë të re, fatkeqësisht ,kanë gjetur mbështetje dhe mbrojtje edhe nga vota e shumicës në Kuvend. Ky ishte mësim që duhet të nxirret për të mos gabuar të zgjedhurit me votën e qytetarëve.

Për keqmenaxhimin e parave publike nga ana e ish kryetarit të Kuvendit edhe në legjislaturën e kaluar është folur dhe ditur, po jo në përmasa si këto që i kemi sot të vizatuara në raportin e auditimit të përgjithshëm. Por ato të dhëna nuk janë të plota , mirëpo edhe këto që janë mjaftojnë për t'i parë keqshfrytëzimin qëi është bërëparasë publike. Këto fakte janë shqetësuese, sepse këto kanë ndodhur në institucionin që duhet të krijojë e të kontrollojë institucionet, shfrytëzimin e buxhetit të konsoliduar të Kosovës.

Pastaj nuk është shqetësuese vetëm shkelja e rëndë e Ligjit të financave publike, saqë edhe Kuvendi i Kosovës e pati po atë nivel . Është shqetësues fakti se ato shkelje është dashur t'i pengonin Qeveria, Ministria e Financave, Departamenti i Buxhetit në kuadër të Ministrisë së Financave, Thesari, Njësia Qendrore ose Agjencioni i Prokurimit Publik dhe Komisioni Rregullator i Prokurimit Publik, si dhe shefi i UNMIK-ut.,por janë heshtur nga të gjithë. Pse u heshtën kaq gjatë dhe u desh të ndërrohej kryetari i Kuvendit që të fillonte auditimi .Ky më në fund qiti në shesh shumë parregullsi e keqpërdorime të buxhetit. Auditimi i zbardhi shumë paligjësi ,po jo të gjitha vjedhjet që i janë bërë buxhetit të Konsoliduar të Kosovës. Në këto shkelje të rënda ish kryetari i Kuvendit me drejtuesit e administratës së tij nuk kanë qenë vetëm, ata janë ndihmuar nga shumë filtra të tjerë të ekzekutivit. Pse u heshtën keqpërdorimet në institucionet e tjera që nuk janë më të vogla se këto të Kuvendi?. Kusht duhet t'i shpjegojë këto: Kuvendi duhet t'i kërkojë përgjegjësi ekzekutivit të vendit deri në votëbesim,, Ne disa herë kemi formimin e komisionit hetimor për t'i hetuar gjitha njësitë që e kanë shfrytëzuar buxhetin e Konsoliduar të Kosovës nga janari i vitit 2002 e këndej.

Nëse me vëmendje lexohet raporti i auditorit të përgjithshëm, nuk është vështirë të shihen të gjitha mënyrat e grabitjes së parasë publike, se këtu ka krim të organizuar që del dhe jashtë Kuvendit dhe shkon në Qeveri, në Ministrinë e Financave, në Thesar dhe në njësitë e prokurimit. Të gjithë drejtuesit e këtyre mekanizmave janë të një klani dhe janë votuar në këtë Kuvend. Ne ju kemi paralajmëruar për këto dhe jo vetëm një herë, zor se mund të bëheshin të gjitha parregullsitë që i sjell auditori pa një organizim të sofistikuar e të mbështetur nga qarqet e plotfuqishme, pa një qendër mafioze që kontrollon trupat e pavarur mbikëqyrës të ekzekutivit. A nuk është kjo dëshmi se këtu kemi të bëjmë me krim të organizuar për të grabitur paratë publike, te tatimpaguesit kosovarë, duke keqpërdorur në mënyrë më të egër pozitën publike institucionale të fituar me votat e qytetarëve të Kosovës.

Kush është fitues i kësaj zallahie? Sikur Ministria e Financave të ishte më e kujdesshme në mbrojtjen e ligjit thesari më i mençur në kontrollimin e procedurave ligjore, as ish- kryetari i Kuvendit nuk do t'i bënte këto vjedhje të parave publike. Prandaj, natyrshëm shtrohet pyetja: Cila është shkalla e keqpërdorimeve nga institucionet e njerëzit që kanë qenë apo vazhdojnë të jenë më të fuqishëm se Daci. Kush duhet t'i verifikojë këta të paprekshëm., sa është këtu fuqia e auditorit të përgjithshëm, cila prokurori mund ta bëjë këtë? Prokurori ndërkombëtare deri më tani ka dështuar. A është ai i përgatitur, apo vendori i përgatitur. As ky nuk është. Ne kemi një raport për periudhat e ish- kryetarit të Kuvendit, e kemi edhe raportin e Kuvendit, e të kuvendeve komunale, por nuk i kemi raportet për Qeverinë e për ministritë e as për presidencën, ku fuqia politike dhe e parasë kanë qenë më të mëdha se sa në Kuvendin e Kosovës. Auditori konstaton keq menaxhimin e keqpërdorimit ,por nuk shkon më tutje, kush do të vazhdojë dhe të thellojë sasinë dhe ta verifikojë raportin e auditorit të përgjithshëm.

Me këto forma të udhëheqjes e të menaxhimit Kosova vështirë se do të përmbushë standardet për qytetarët e saj në rend të parë. Vështirësitë që do ta përshpejtojnë sundimin e ligjit, vështirë do ta gjejë rrugën për integritet Euroatlantike, apo ndoshta partizanët e Dacit kanë sunim Lindjen, këto institucione me këtë nivel të menaxhimit dhe të udhëheqjes nuk garantojnë siguri, zhvillim ekonomik, nuk krijojnë kushte për arsim e edukim të përparuar, shëndetësi, standarde e nuk do të jenë të denja për asnjë kategori sociale e as për ato që kanë dal nga lufta çlirimtare. Këto institucione me këtë mentalitet udhëheqës nuk do të **arrijnë** askund, prandaj duhet të mendojnë më shumë ata që marrin përgjegjësinë për të qeverisur vendin, partitë politike si edhe ata që delegojnë përgjegjësinë të të përzgjedhurit e tyre. Në Kosovë të gjithë qytetarët dhe zgjedhësit duhet t'i ndërrojnë mënyrën dhe stilin e jetës, mënyrën e mendimit e veprimit nëse kanë synim ndërtimin e shtetit ligjor.

Të nderuar deputetë, koalicioni qeverisës ka marrë përgjegjësi për të qeverisur vendin ,për të përmirësuar jetën e qytetarëve, për të krijuar kushte për punë, për arsim dije, edukim e shëndet, për rend e ligj, jetë t dhe dinjitet të qytetarëve tanë deri në integritet në Bashkimin Evropian. Asnjë nga këto nuk i keni përmbushur, natyrisht nuk mund të bëj gjë, se synimi është vjedhja e parasë publike, munda e djersa e qytetarit tonë.

Raporti i auditimit na ofron të dhëna të bollshme se në Kuvendin e Kosovës ka ndodhur vjedhje ordinere e buxhetit, cili është dallimi ekzekutiv në këtë rrafsh të Kuvendit? A mund të dalë nga ky det i parregullsisë Qeveria e palagur. Në këtë plan ,si koalicion qeverisës, keni dështuar në administrimin dhe qeverisjen e parasë publike. Këtë duhet ta pranoni, prandaj, ne, opozita ju afrojmë vullnetin ,përkushtimin, gatishmërinë në përgatitjen profesionale për të ngritur shkallën e përgjegjësisë në ndërtimin e kapaciteteve për qeverisje që i duhen në këtë fazë

KRYETARI I KUVENDIT KOLË BERISHA – Ju faleminderit. Në emër të AAK-ës deputeti Naim Maloku.

DEPUTETI NAIM MALOKU – I nderuari z. kryetar, të nderuar ministra, kolegë deputetë. Grupi Parlamentar i AAK-ës angazhohet për qeverisje të mirë dhe për menaxhimin efektiv e produktiv të mjeteve publike dhe dënon çdo lloj keqpërdorimi të

tyre. prandaj edhe kontributi ynë në shqyrtimin e raportit të auditorit gjeneral për të gjeturat faktike në Kuvendin e Kosovës do të jetë në këtë drejtim.

Të nderuar deputetë, diskutimi i sotëm nuk duhet kuptuar si sulm ndaj personaliteteve apo individëve, përkundrazi si mbështetje për funksionimin më të mirë të Kuvendit dhe për menaxhim e mirë dhe transparent të buxhetit të Kuvendit. Me gjithë atë shqyrtimi do të ishte më i plotë sikur të përmbante vlerësimin profesional të fakteve të gjetura për Kuvendin e Kosovës ,sidomos për dy çështje të rëndësishme, keq menaxhimin dhe keqpërdorimin i buxhetit. Pse e them këtë?. Raporti për të gjeturat faktike nuk përmban konkluzione se në çfarë përmasash janë shkelur ligjet dhe rregullat financiare, auditori është i thirrur që profesionalisht të bëjë konkluzione lidhur me shkeljen e ligjeve dhe të rregullave financiare, prandaj ky raport nuk paraqet vlerësim , por konkluzione për faktet e gjetura. Nga ana tjetër duhet të marrim parasysh procedurat hetimore që janë iniciuar nga prokuroria, Ne këtu nuk duhet ta gjykojmë askënd ngase përgjegjësia penale e individëve është duke u hetuar nga prokuroria. Po ashtu nuk mund t'i paragjykojmë rezultatet e hetimeve dhe në fund nuk duhet të pengojmë ose të ndikojmë në hetime. Mirëpo, duke lexuar raportin ,gjithashtu ,nuk mund t'i mbyllim sytë ndaj fakteve të prezantuara të cilat tregojnë qartë se mjetet buxhetore të Kuvendit të Kosovës, të dedikuara për shpenzime publike, janë përdorur për shpenzime private. Pra, ky fakt është konstatuar në disa raste dhe nuk mund t'i shmangemi gjykimit se këto veprime paraqesin keq përdorime të buxhetit, mjetet buxhetore, mjete të mbledhura nga taksapaguesit.

Prandaj këtu ne konkludojmë se raporti në mënyrë të qartë zbardh rastet kur dhe ku mjetet buxhetore janë përdorur për qëllime private për disa persona Këto veprime i dënojmë publikisht.

Në emër të Grupit Parlamentar të AAK-ës dhe në emrin tim personal kërkoj që të gjithë ata që kanë shpërdorur mjetet publike të përgjigjen para ligjit. Veprimet e fundit Kuvendit të Kosovës lidhur me suspendimin e personave të dyshuar për shkeljen e ligjit i përshëndesin dhe kërkojmë qartësimin e këtyre dyshimeve dhe të vërtetën. Po ashtu, fuqimisht, përkrahim prokurorinë në ndriçimin e veprave eventuale penale dhe të rasteve të shkeljes së ligjit.

Dhe në fund Grupi Parlamentar i AAK-ës do t'i përkrahë të gjitha iniciativat që ngrënë nivelin e përgjegjësisë, vënies së rregullit dhe të funksionimit më të mirë të Kuvendit të Kosovës.

Ftojme në emër të Grupit Parlamentar të AAK-ës për debat konstruktiv, debat i cili do të zbardhë të zbardhurën tani nga auditimi nga të gjeturat faktike. Konstatojmë se ky debat do të jetë një vërejtje për të gjithë ata të cilët kanë ushtruar funksione publike në institucionet e Kosovës nga paslufta se një ditë do të debatohet për të gjithë. Faleminderit.

KRYETARI I KUVENDIT KOLË BERISHA – Ju faleminderit. Në emër të ORA, deputetja Teuta Sahatqija.

DEPUTETJA TEUTA SAHATQIJA - Faleminderit z. kryetar. E nderuara qeveri të nderuar deputetë.

Më 14 shkurt 2006 ishte seanca e jashtëzakonshme e iniciuar nga Grupi ynë Parlamentar dhe mbështetur nga 41 deputetë të partive të ndryshme. Për debatin lidhur me ndërtimin e qendrës protokollare administrative Gërmia dhe debati lidhur me shpenzimet buxhetore të Kuvendit të Kosovës për periudhën janar – qershor 2005.

Atë ditë u diskutua vetëm për qendrën Gërmia, ndërsa pjesa e dytë e kërkesës për shpenzime buxhetore u injorua.

Sot në rend dite është raporti i auditorit i cili përfshin periudhën 1 korrik 2004 deri më 31 dhjetor 2005 dhe pagesat e bëra prej 14 korrikut 2004 deri 21 prill 2006.

Në fakt pika e 2 e rendit të ditës e seancës së 14 shkurtit është sot. Por për periudhën më të gjatë kjo vërteton se duhet të ballafaqohemi më mirë më herët sesa më vonë me të vërtetën, pasi nga ajo nuk mund të ikim.

Në fakt raporti i auditivit, të cilin sot e kemi në duar, është vërtetimi i asaj të cilën të gjithë e dinë sa kohë.

Përmes letrës së dërguar nga z. Linda Kasella nga Zyra e Auditorit Gjeneral u vërtetua se dokumenti i auditimit të Kuvendit të cilën e kemi në duar që nga data 3 korrik është dokument final dhe nuk do të vijë asnjë dokument tjetër pos tij. Pra, ne kemi mund të diskutojmë javën e kaluar pa asnjë pengesë.

Me leximin e kujdesshëm të dokumentit vërtetohet se gjithë ky aktivitet i keqpërdorimit nuk ka mund të kryhej vetëm nga një njeri. Fatkeqësisht ky aktivitet ka ngërthyer brenda vetes shumë aktorë. Involvimi i shumë aktorëve , veprimi i planifikuar i organizuar me logjistikë gati të përkryer ,veprim që përfshinte të gjitha nivelet si në Kuvend ashtu edhe në prokurim duke përfshirë thesarin dhe Ministrinë e Ekonomisë, i cili si filtër keqpërdorimesh do të duhej të ndalonte këtë veprimtari të pahijshme, tregon shkallën e lartë të përfshirjes së institucioneve në këtë veprimtari të organizuar apo mund të quhet edhe në krim të organizuar.

Për kultivimin e mos transparencës apo të fshehjes flet edhe pika 4.2. e raportit të auditorit ku thuhet se Kuvendi ka afruar shërbime të kufizuara dhe se është dashur shumë kohë të mbështetej në të dhëna nga thesari. Mos -transparenca është aleat i fuqishëm i gjithë këtij mekanizmi.

Ky Kuvend vitin e kaluar u pat premtuar pensionistëve 6 milion si fillim i kujdesit ndaj tyre e për të cilët nuk është pak e as nuk ka mjete nga buxheti. Pensionistët vazhdojnë të blejnë ilaçe, syze etj. prej 40 eurove të tyre, por asnjë premtim për ta nuk u realizua.

Në ndërkohë Kuvendi porositi dy vetura që kushtonin 750 mijë euro ,duke anashkaluar të gjitha procedurat,por këto vetura edhe pse nuk kanë arritur fare është nënshkruar se kanë ardhur.

Në të njëjtën kohë kur arsimtarëve u rritet 7% rroga pas grevave të gjata vazhdohet që në Grmi të derdhen edhe milionat .

Mungesa e transparencës është edhe më e theksuar kur kihet parasysh se Kuvendi nuk disponon program të mirëfilltë kontabiliteti dhe të ardhurave personale, pagesat, ndalesat derdhen direkt në xhirollogari pa ndonjë shpjegim të qartë me ç'rast vazhdon jotransparenca dhe i ndihmohet keqpërdorimit.

Në popull thuhet të gjithë janë të njëjtë, të gjithë janë hajna dhe përderisa nuk vendoset një vijë e qartë, e cila i ndan ata që keqpërdorin buxhetin e Kosovës prej atyre që nuk e keqpërdorin, kjo thënie do të vazhdojë të përdoret. Prandaj, nëse dëshirojmë t'ua kthejmë besimin institucioneve tona, detyrë jona është identifikimi i aktorëve, kërkimi i përgjegjësive prej tyre dhe vendosja e mekanizmave që do ta pengojnë keqpërdorimin e buxhetit në të ardhmen.

Prandaj, grupi ynë parlamentar ia propozon Kuvendit këto rekomandime. Të formohet komisioni hetimor, i cili do të hetonte rastet dhe do të propozonte procedura për pengimin e rasteve të ngjashme në të ardhmen dhe ky komision të udhëhiqet nga opozita. Komisioni të raportojë për të gjeturat e Kuvendit pas një muaji.

Nën dy, raporti i auditorit gjeneral t'u dërgohet zyrtarisht nga ana e Kuvendit organeve të hetuesisë.

Nën tre, të kërkohet edhe auditimi prej 1 janarit 2002 deri më 2005, përkatësisht deri në periudhën të cilën e ka përfshirë ky raport i auditimit, pasi të gjeturat e këtij raportit na bëjnë me dije që ka mundësi që edhe në periudha të tjera të ketë keqpërdorime.

Nën katër, mjetet e buxhetit të Kuvendit, që janë përdorur për nevoja personale, për të cilat nuk kanë pasur mbulesë me asnjë rregullore të kthehen në buxhetin e Kuvendit të Kosovës.

Nën gjashtë, të përcaktohen dy sekretarë të buxhetit, një nga pozita, një nga opozita, të cilët do të kontrollojnë dhe do të nënshkruajnë çdo pagesë dhe

nën shtatë, në procedurë të përshpejtuar të sigurohet softveri për kontabilitet dhe të ardhurat personale. Ju faleminderit.

KRYETARI I KUVENDIT KOLË BERISHA – Ju faleminderit. Në emër të Grupit për Integrim Numan Baliq.

DEPUTETI NUMAN BALIQ – Dopustite mi da u ime grupe za integraciju iznesem nekoliko principijalnih stavova koji se tiče naše grupe i nadam se uz podršku javnosti Kosova. Sve ove stvari o kojim govorimo naravno je trebalo da se o njima govori mnogo puta i više puta u toku zadnjih nekoliko godina tako da je ovo manje više zakašnjena diskusija ali je dobro da se započelo sa razmtranjem ovih problema. Ono što je za nas bitno jeste sprovođenje zakona, održavanje reda i zakonitosti sa tim da u tom smislu ne trebamo ostati samo na praznim rečima. Mnogo se puta u ovoj sali i na mogim javnim mestima u institucijama pozivalo na zakon i sprovođenje zakona. Na žalost vrlo često se to radi onda kada se upravo krši zakon, mi smo se sa tako nečim naučili na žalost i u prošlosti kada se rade loša dela, poziva se na zakon. Kada kažemo zakon i sprovođenje zakonitosti mislimo na kažnjavanje po zakonu onih koji su se ogrešili o javna i

materijalna dobra koja pripadaju narodu Kosova. Tako da u tom smislu insistiramo da se radi prema zakonu, da se sprovodi zakonitost, da se krivci kazne i drugi princip za koji bi želeo da govorim jeste transparentnost. Javnost najpre ovde unutar parlamenta i javnost pred celim kosovskim narodom koji mora biti obavešten o svemu onome što se događa. Protiv smo bilo kakvih argumentiranja odlaganja ovakvih rasprava, ne postoji razlogi i protiv smo bilo kakvih politizacija takvih razloga koji smo slušali ovih nekoliko sednica. Od onog momenta kada je ovaj predmet došao na razmatranje do danas desilo se nekoliko važnih slučajeva posebno sa aspekta pravnog djelovanja. Najpre su se desile zamjene, potom smo imali i otvaranje sudskih procesa i hapšenja. Mislim da je bio veoma bitno da danas imamo informaciju bilo kao poslanici Parlamenta a takodje smatram i javnost Kosova i imao obavezu da bude obaviještena oko toga šta je bilo, zašto su ljudi uhapšeni i šta je nadjeno vezano za hapšenjima koja su sprovedena. Mi imamo obavezu da obavještavamo našu javnost šta se dešava u najvišem upravnom tjelu ovde u zemlji, to je prva stvar, druga stvar mislim da ovdje mi Grupa za integraciju držecih se ovih važnih uslova koje sam spomenuo, ne želimo da učestvujemo u unutar partijskim i medjupartijskim razračunjavanjima a posebno u onima koji daleko prelaze granicu normalnog političkog ponašanja. Mi ćemo svakako da se zalažemo za pravdu ali ću nastojati da budemo na pravome putu i da podržimo sve prave odluke sudskih organa i svih drugih organi koji će se baviti ovim pitanjima. Takodje u vezi sa pozicijom bivšeg predsednika Parlamenta, mi smo govorili o tome onda kad je trebalo i na samom početku ukazujući na samovolju i sve posljedice koje mogu proizići iz zloupotrebe najviših položaja najviše institucije u zemlji. Ovo nam treba biti pouka šta se može desiti u budućnosti kada je jedan čovjek u ime jedne isntitucije počeo se ponašati kao da je on vlasnik te institucije. Naravno posledice su fatalne u pitanju su i zloupotrebe i one koje se graniče sa kriminalom i jesu kriminal, ali koje naravno trebamo ispitati ali je najvažnija stvar da pouke iz ovoga koje trebamo izvući jeste da se to više ne smije dozvoliti niti u sadašnjim niti u budućim institucijama, i naravno da to nije samo ograničeno na instituciju Parlamenta nego da je opšte prisutno u kosovskom društvu. Opet napominjem da se samo govori o tome a da se vrlo malo čini, prepune su i novine i javnost izveštajima o korupciji, o kriminalu, zloupotrebama a tako je malo ljudi u ministarstvima, vladi i na mnogim pozicijama raznim javnim institucijama, direktoratima , mnogim upravnim funkcijama takodje u AKM i tako dalje gde se radi o strahovitim nepravilnostima, neregularnostima i zilupotrebama a da je malo ko je do sada odgovarao. Ovaj je dobar početak, Bogu hvala, što se počelo od Parlementa, neka to bude znak za nastavljanje ovoga u svim drugim institucijama u zemlji. Ono što želim takodje da kažem jeste da se potpuno slažem sa inicijativama koje se tiču ispitivanja ove situacije. Pitanje da li da se formira komisija za nadzor odnosno komisija za ispitivanje ovog slučaja jeste za nas bez svake dileme, svakako da se treba formirati komisija za ispitivanje, za istraživanje djelatnosti i insistiramo da ta komisija bude apsolutno transparentna , kako unutar Parlamenta tako i van Parlamenta. Naravno da u toj komisiji treba uzeti učešće sve političke strukture i sve etničke zajednice i da o tome Parlament mora biti redovno izvještavan. Insistiram u okviru ovoga da ovaj Parlament i javnost Kosova budu što prije obavješteni oko toga - dokle se došlo sa sudskim i zakonskim procedurama, dokle se došlo do toga, šta je rezultat onoga što je preduzela policija, šta jke uradjeno u sudovima u vezi sa hapšenjem osoba o kojima smo čuli ovih nedelja. Dakle izvještaji moraju biti apsolutno transparentni u korist svih gradjana Kosova i formiranje komisije u kojoj mi članovi Grupe za integraciju i sve političke partije

trebaju uzeti učešće i dogooriti se po redu i zakonu kako da se radi i kako da rad bude dostupan i nama i celokupnoj javnosti. Hvala Vam ljepo!

KRYETARI I KUVENDIT KOLË BERISHA – Ju faleminderit. Fjalën e ka deputeti Fadil Geci dhe të përgatitet deputeti Gani Koci.

DEPUTETI FADIL GECI - Faleminderit i nderuari kryetar, nja dy, tre minuta do të merrem pak me Jakup Krasniqin. E kemi pasur koleg, kemi punuar 9 vjet në Lidhjen Demokratike se bashku edhe sa herë që e kishim ndërmend pak ta ngucnim Jakupin, ia shanim Leninin e Stalinin shumë i dridhej buza dhe ecte.. E kishim si provokim në shoqëri e tash Jakupi e di që jam njëri prej përkrahësve të Nexhat Dacit është një frymë e pastër dhe më i pastri në këtë Kuvend që jemi këtu se të gjithë. Edhe shefat që folën këtu para foltores të Partisë Demokratike vetë Jakupi etj. por edhe kjo demokraci, edhe këto do t'i dëgjojmë.

Unë do të mundohem t'i kontribuoj këtij kuvendi me disa fakte, me disa shkresa që janë origjinale do t'i keni edhe ju i nderuari z. kryetar. E në letër që auditorja gjenerale e Kosovës z. Linda Kasella më 21 shkurt 2006 i ka dërguar z. Isa Nezirit, drejtor i Administratës së Kuvendit të Kosovës, pasi e falënderon shumë për punën pozitive dhe konstruktive gjatë të cilës na keni pritur këtë mëngjes dhe pasi e përkujton se Zyra e Revizorit Gjeneral është institucion më i lartë i auditimit në Kosovë dhe është përgjegjëse për auditimin e rregullt dhe të pavarur. E njofton për planin e auditimit të Kuvendit të Kosovës që si një auditim i rregullt do të integrohet në auditimin përfundimtar të buxhetit të konsoliduar të Kosovës për vitin 2005. Më vonë do të flas për përgjigjen e drejtorit të Administratës, por tash dëshiroj ta tërheq vëmendjen se materialin që e kemi marrë e që po e shqyrtojmë sot është raport i të gjeturave faktike në Kuvendin e Kosovës, pra, nuk është auditim. Dikush ndoshta mendon se kjo nuk është me rëndësi, por nëse e shihni faqen e parë të këtij raporti aty shkruan:” Kemi kënaqësinë që të bashkëmbyllim raportin tonë për të gjeturat faktike në Kuvendin e Kosovës”.

Ne kemi shfrytëzuar një kompani të jashtme të kontabilistëve për të na asistuar në këtë detyrë. Tarifa e alokuar për këtë projekt është kufizuar 24 mijë euro në 5.500 shtesë, duke përfshirë TVSH-ën që është alokuar për auditimin e pasqyrave financiare.

Këtu pra, si po shihni, është çështja, Kuvendi i Kosovës ka paguar për këtë punë gjithsej 31 mijë euro. Kush pra ka marrë vendimin t'i japë këto para aq të nevojshme me u përdorë diku tjetër, pse Kuvendi paguan kur vetë revizorja gjenerale sipas detyrës që ka kërkuar do ta bëjë auditimin e Kuvendit të Kosovës si një procedurë të rregullt pa shpenzime për Kuvendin. Nëse nuk e llogarisim se pikërisht ky Kuvend gjatë miratimit të buxhetit vjetor i ndan mjetet nga taksapaguesit kosovarë për këtë institucion. Pra, pse tash u bë pagesa e dyfishtë, sepse revizorja gjenerale kishte kërkuar ta bënte auditimin, ndërsa është bërë raporti i të gjeturave faktike. Më duket se këtu shihet qartë se dikush ka kërkuar dokument të ri për këtë dhe është bërë edhe pagesë e re nga porositësi.

Të nderuar deputetë, në letrën e saj zonja Kasella tërheq vërejtjen se veçanërisht auditori gjeneral nuk do të jetë i varur në lirinë dhe veprimin në lidhje me :

1. Nëse duhet apo nuk duhet të bëhet ndonjë auditim i veçantë, mënyrën me të cilën do të kryhet një auditim i veçantë dhe principet apo kriteret që do t'i japin cilësi do të çështje të veçantë, përfundon citati.

Mirëpo, kjo nuk del kështu pasi materiali që e kemi marrë të gjithë në faqen e parë të tij thuhet: Sasia e punës që mund të kryhet për një shumë të tillë është e kufizuar, pra këtyre i duken pak 30 mijë euro, prandaj shkruan, pasi që keni mundësi për të shqyrtuar raportin në kishim me qenë të kënaqur që të diskutojmë me ju dhe normalisht edhe unë kisha me qenë i kënaqur me 30 mijë euro edhe më shumë nëse gjejmë njerëz që i japin ato.

Te hetimi i vazhdueshëm, nëse është edhe mund të jetë i dobishëm, pra, shkurt shqip, nëse doni hetime të tjera paguani më shumë para, pasi auditimi nuk është përgjegjës për të bërë hetime ,atëherë është shpikur raporti i të gjeturave faktike.

Në media ka dalë se ish- kryetari i Kuvendit nuk e ka lejuar të bëhet auditimi, por letra përgjegjëse e drejtorit të Administratës së Kosovës z. Isa Nezirit e demanton këtë.

Në përgjigjen e tij të dërguar më 23 shkurt që unë e kam dokumentin do ta keni përpara, 2006 z. Kasella, z. Neziri ,ndër të tjera ,shkruan:

Duke pasur parasysh që Kuvendi i Kosovës është institucioni më i lartë legjislativ i vendit,por edhe specifikat e natyrës së shpenzimeve dhe të pagave që kanë të bëjnë edhe me deputetët e zgjedhur edhe me organet e Kuvendit, por edhe me Administratën si dhe me stafin ndihmës. Duke pasur parasysh se nga buxheti i Kosovës që miratohet në seancën plenare miratohet dhe ndahet edhe buxheti për Kuvendin e Kosovës, në të cilin përfshihet edhe financimi i partive, i subjekteve politike pjesëmarrëse në Kuvend. Duke pasur parasysh që Kryesia e Kuvendit, si organ i tij ku janë të përfaqësuara partitë kryesore politike , i merr vendimet për të gjitha shpenzimet ,duke i përfshirë edhe udhëtimet zyrtare jashtë vendit.

Duke marrë parasysh se Komisioni për Buxhet dhe Financa i Kuvendit të Kosovës përcakton dhe strukturën dhe nevojën buxhetore brenda vitit, sipas kërkesës futen si pjesë e buxhetit të Konsoliduar të Kosovës.

Duke pasur parasysh që çdo tre muaj Kryesia dhe Kuvendi pas një diskutimi miratojnë raportin buxhetor dhe në fund edhe raportin vjetor, kemi nderin të sugjerojmë të merrni në shqyrtim paraprakisht të gjitha raportet relevante të Kuvendit të Kosovës, duke përfshirë edhe debatin edhe konkluzat për menaxhimin e buxhetit nga Kryesia dhe seanca plenare, mandej të përqendrohemi në pikat që ju interesojnë konform rregullativës ligjore të përgatisim dhe të vëmë në dispozicion të gjitha dokumentet e nevojshme. I mirëpresim kërkesën dhe obligimin që ne të gjithë këtë punë t'i ndihmojmë stafit profesional të Kuvendit të Kosovës, me dëshirë që të mirëkuptohemi dhe do të bashkëpunojmë në mënyrë konstruktive në përgatitjen e raportit të auditivit. Ju shprehim konsiderata tona, përfundon letra e drejtorit të administratës.

Pra, po shihet qartë se auditimi është pranuar dhe është ofruar ndihma përkatëse. Në letrën e saj z. Kasella kishte kërkuar.Citoj:” Në mënyrë që të jemi në gjendje të kryejmë auditimin sa më efektivisht , neve na nevojitet asistencë nga ana e stafit tuaj. Ekipi ynë

ka nevojë për këtë kontakt, bashkëpunim me të cilin do të përcillen ose adresohen informatat, mund të organizohen mbledhje etj. Ekipit , po ashtu, i nevojiten ndonjë zyre apo sallë për katër persona, me qasje dhe printer, makinë fotokopjimi, punët në terren që do të kryhen në lokalet tuaja do të zgjasë dy javë pune dhe një javë tjetër pune në zyrën tonë”, përfundon citati.

Revizorja gjenerale përfundon letrën me këto fjalë: “Ju do të merrni një kopje të draftit - raportit tonë auditues për të dhënë komentet tuaja dhe që ne do t'i konsiderojmë për t'i përfshirë në raportin tonë para se të kemi finalizuar punën tonë përmes paraqitjes së raportit.”

Të nderuar deputetë, unë nuk i kam marrë komentet e Kuvendit të Kosovës në draft-raportin dhe nuk i keni marrë as ju, sepse askush që i ka bërë, as drejtorja e administratës as sekretaria as Komisioni për Financa e Buxhet nuk po i dinë se a janë pajtua me të gjitha këto që janë thënë në raport, apo nuk e kanë parë të nevojshme që të reagojnë apo ndoshta askush prej tyre nuk e ka kërkuar një gjë të tillë, apo edhe më keq, nuk janë lejuar t'i japin komentet , sqarimet dhe shpjegimet e veta me të cilat jo që do të tregonin nivelin profesional, por edhe do të mbronin dinjitetin e Kuvendit. Vetëm me një shkrim sipërfaqësor shihet se në këtë dokument ka shumë mangësi, gabime, shtrembërime, mëdyshjeve dhe komentime qëllimkëqija.

Po të nisja ti numëroja do të merrte shumë kohë .Unë më me dëshirë do t'i dërgoja në ato gazeta që botuan raportin ende pa e marrë deputetët, edhe në çdo faqe të këtij materiali shkruan - të mos kopjohet pa leje me shkrim nga auditori gjeneral, ndërsa unë nuk besoj se dikush e ka marrë këtë leje t'i kopjojë në disa mira kopje dhe as që kam parë që ndonjë gazetë ta ketë prezantuar këtë leje.

Për çudi nuk e kam parë as se revizori gjeneral të ketë reaguuar ndaj këtyre keqpërdoruesve të publikimit. Këtë e them sepse në faqen e parë të materialit që kemi përpara shkruan: “Informacioni brenda këtij raporti është ofruar në bazë që pranuesi nuk mund të mbështetet në të si bazë e vetme për ndonjë vendim apo veprim.”

Pra e drejta për të realizuar këtë raport plotësisht të saktë nuk i lejohet as Kuvendit të Kosovës e le më mediave apo partiçkave politike që e tundin dokumentin si argument për kinse keqpërdorime, keqmenaxhim apo e çojnë edhe në prokuri edhe deklarojnë se prokuroria seriozisht po merret me këtë punë. Në fund po e përmend se materiali është një paraqitje e keqe e strukturës së shpenzimeve të coptuar qëllimisht jo në procesin nismëtar as përfundimtar, prandaj në raport në disa faqe të tëra e keni paraqitur si përgjegjës e ndëshkues zonjën Bukurie Godanca ,e cila është vetëm personel teknik, pa ndonjë përgjegjësi, pa kompetencë vendimmarrje, por që vetëm bën evidencimin ndërmjet kërkesës dhe realizimit. Me qëllim pasqyra nuk niset me urdhërdhënësin dhe të përfundoj me drejtorin e Departamentit përkatës, por ndalet në mes për të shkaktuar huti. Në këtë raport kemi shifra të avanseve që është pozicion i paqëndrueshëm e duhet të jetë kthim. Gjithashtu, me qëllim që të bëhet gabim edhe përmenden rroba për sekretarin në vend që të figurojë drejt sekretarinë ,pra menjëherë pa zë në fund, sepse me këtë ndryshon raporti 1 me 100, sekretari dhe gjithë stafi i sekretarisë. Ky raport as që mund të krahasohet pra, nga niveli i ulët profesional me raportin tremujor të shpenzimeve të buxhetit që e ka përgatitur shërbimi përkatës i Kuvendit.

Në këtë raport secili pozicion e ka vendin e vet, ndërsa në raportin e auditimit çdo gjë është bërë lëmsh. Është krejt normale, sepse edhe auditimi me shkrim thotë në faqen e parë, materiali ose intervistat formale me menaxhmentin e Kuvendit nuk ka ndodhur, që këtë dokument e bënë krejt të pavlerë, sepse është themelore të bëhen shpjegime e sqarime nga stafi dhe ato që janë nënshkruar të dokumenteve. Po të ishte bërë kjo do të ishte parë se ndonjë drekë apo darkë që i mvishet kabinetit të kryetarit do të ishte sqaruar se ishte e Kryesisë apo e organizuar për pritje të delegacioneve të huaja, apo se rrobat ishin për të gjithë.

KRYETARI I KUVENDIT KOLË BERISHA – Në rregull, para se t'ia jap fjalën deputetit Gani Kocit vetëm një sqarim. Mjetet për auditim nuk i ka paguar Kuvendi i Kosovës i ka paguar UNMIK-u. Urdhëroni z. Koci, le të përgatitet Berat Luzha.

DEPUTETI GANI KOCI – Ju faleminderit z. kryetar, nuk do të ndalem në analizën e raportit dhe në vërtetësinë e këtij raporti, për vetë faktin se mbi bazë të këtij raporti janë hapur edhe hetimet dhe janë arrestuar njerëzit, do të thotë janë nën pranga dhe fjalën e fundit rreth kësaj vërtetësie e bëjnë besoj në qoftë se gjykatat dhe prokuroritë do të jenë të paanshme dhe të pandikuara politikisht, do ta thonë fjalën e fundit.

E vetmja gjë që do të mund të thoshim ne si parlamentarë është këtu, që vërtet e përgëzojmë guximin e Prokurorisë në këtë hap dhe në këtë veprim, dhe në këtë drejtim ta zgjerojë gamën e vet të hetimit, sepse nuk mund të përmbyllen këto shkelje të ligjeve vetëm me dy ose tri arrestime. Kuvendit i takon që edhe masa politike, vendimet politike dhe përgjegjësi politike të japë për ata që vërtet kanë pasur dorë në këto shkelje të ligjeve.

Dua t'ju përkujtojë z. kryetar dhe juve z. deputetë të nderuar se Grupi Parlamentar i PDK-së më 15.11.2004 pat kërkuar krijimin e një komisioni hetimor lidhur me vonimin e renovimit të sallës së Kuvendit të Kosovës dhe rreth të gjitha procedurave të vendimeve të shpalljes së tenderit dhe të procedurave që janë ndërmarrë për këtë renovim. Shumë kush u nda edhe i befashuar kur pa dalë edhe një konstatim një supozim ndoshta jo i verifikuar drejt dhe aq mirë se gjëja ish -kryetari i Kuvendit të Kosovës për atë tender paska pas marrë 500.000 euro se mbi gjysmë milioni euro nga këto të gjetura faktike nga ajo që e tha edhe përfaqësuesi i Grupit Parlamentar ORA dhe nga ajo që pat thënë edhe vet ish- kryetari i Parlamentit. Nexhat Daci se nuk kushton ma shumë se 500.000 mijë euro ky raport po e vërteton edhe po e verifikon vërtet thënien e tij se ai paska kushtuar më shumë se sa 500.000 mijë euro. Lidhur me këtë në fillim që e thashë të kërkesës për komision hetimor për renovimin e sallës së Kuvendit unë atëherë kam pas edhe një dokument të organit rregullator të prokurimit publik, pikërisht lidhur me këtë çështje të cilin ia kam dorëzuar edhe kryetarit të Kuvendit në cilin nga administrata e Kuvendit. Ky organ ka kërkuar të formohet komisioni për shqyrtimi e gjitha procedurave rreth këtij tenderimi, sepse janë gjetur shkelje, kanë qenë në kundërshtim me Ligjin mbi menaxhimin e financave publike, por edhe me Ligjin mbi prokurimin e përgjithshëm publik. Unë dua t'i citoj vetëm disa pjesë të kësaj letre që i është dërguar atëherë Kryesisë së Kuvendit dhe kryesisht ish- kryetarit të Kuvendit.

Duke marrë parasysh këto fakte dhe rëndësinë e renovimit të ndërtesës së Kuvendit të Kosovës ORPP kërkon të formohet një komision i përbërë nga zyrtarët kosovarë të institucioneve publike dhe UNMIK-ut për t'i verifikuar te ashtuquajturat gabime të cekura në dokumentet e ofertimit e posaçërisht fakti mbi përpilimin e specifikacionit teknik, gjegjësisht të përmasave. Pastaj ORPP kërkon që pas konstatimit të Komisionit mbi verifikimin e shkeljeve të supozuara të ndërmerren masa ligjore ndaj personave të cilët me vetëdije i kanë bërë këto, organi rregullativë i prokurimit publik është plotësisht i vetëdijshëm se gjatë implementimit dhe menaxhimit të prokurimit për renovimin e ndërtesës së Kuvendit të Kosovës ka pasur shkelje të rregullave dhe të procedurave të prokurimit. Këto kanë qenë faktet të cilat ky Kuvend i pat hedhur poshtë. Sikur ky Kuvend atëherë të bënte komision një komision të tillë dhe të hetonte për këtë rast jam i bindur se sot nuk do të diskutonim për këtë raport dhe për këtë gjetje faktike të revizorit gjeneral.

Pa dashur të thellohem në raport dhe në të gjeturat ,sepse janë disa mostra nuk kanë mundur t'i gjeja të gjitha mostrat, sepse janë mbi 200 mostra që i kanë bërë të gjetura dhe 100 prej tyre janë, do të thotë të gjetura që kanë shkelje të Ligjit të prokurimit publik ,të Ligjit mbi menaxhimin e financave publike dhe për thyerje të Ligjit të merret dikush tjetër, por unë duhet të shtroj vetëm një pyetje këtu:

Në qoftë se Kuvendi i Kosovës duhet të paguajë komunalit ose shpenzimet komunale , sepse këtu funksionon Kuvendi i Kosovës, që nga buxheti i vet duhet të paguajë dhe për kë i paguan komunalit në Shtërpcë. Në qoftë se Kuvendi i Kosovës duhet si ishte edhe pyetja ime parlamentare më herët për ndërtesa private të paguajë qira,që funksionojnë institucione të ndryshme qeveritare, pse Kuvendi i Kosovës ka paguar qira dhe mirëmbajtje për objekte që nuk kanë qenë objekte qeveritare ,nuk kanë qenë as rezidenca qeveritare. Këto i kemi të gjitha në raport.

Çështja tjetër , në qoftë se Kuvendi i Kosovës duhet të bëjë shpenzime për mallra dh për shërbime, mbi ç'bazë dhe pse vetëm një pjesë e Kuvendit të Kosovës duhet ta shfrytëzojë buxhetin e Kosovës për veshmbathje ,për losione, për çokollata, për dhëmbë porcelani ,për syza etj etj.. Në fund ky raport na dëshmon edhe një gjë, do të dëshiroja të kuptohem drejt, fatmirësisht Nexhat Daci shkoi me një palë dhëmbë, se po t'i kishte mbetur që t'i ndërronte edhe të dytët do ta kishte hangër Kosovën si e ka hëngër me një parë Kuvendin e Kosovës.

KRYETARI I KUVENDIT KOLË BERISHA – Fjalën e ka deputeti Berat Luzha, le të përgatitet ministria Melihate Tërmkolli.

DEPUTETI BERAT LUZHA – Ju faleminderit z. kryetar, unë do të ndalem në ndërtimin e vilës në Gërmi e cila fillimisht është thënë se do të kushtojë 3.3 milion euro, kurse tash nuk dihet sa mjete do të shpenzohen deri në fund të ndërtimit të këtij objekti, sepse çmimi është rritur disa herë.

Tashmë dihet për shpenzime shtesë prej 1.3 milion, por nuk dihet edhe sa mjete do të shpenzohen deri në fund. Se ka manipulime të mjeteve buxhetore tregon edhe rritja e çmimit të projektit nga 98500 në 144500 euro, madje është konstatuar se ka edhe

mospërputhje të mjeteve të shpenzuara dhe të punëve të kryera në objekt. Kjo vilë super luksoze ka filluar të ndërtohet, siç e dimë, pa leje, pa pëlqim mjedisor dhe me kontest pronësor, duke shkelur ligjet dhe procedurat në fuqi.

Përkundër reagimeve të mëdha të opinionit të shoqërisë civile, të mediave ,madje edhe të Kuvendit, se po dëmtohet parku rajonal i Gërmisë, ky Kuvend me shumicë votash ka marrë vendim të vazhdojnë punimet për ndërtimin e vilës. Ky vendim i gabueshëm i Kuvendit erdhi pa konstatimin e shkeljeve dhe pa prituri epilogun e gjyqit pasi lënda është në organet e drejtësisë, se buxheti i Kuvendit të Kosovës ka qenë “një bahçe e babës” për ish- kryetarin e Kuvendit, flet edhe renovimi i kabinetit të tij që sipas shënimeve zyrtare ka kushtuar 800.000 euro.

Ish- kryetari kishte një kabinet luksoz, por ai donte kabinet superluksoz në kohën kur deputetët nuk kishin kushte kurrfarë për punë, duke ia uzurpuar Kuvendit një pjesë të madhe të ambienteve të punës, se buxheti i Kuvendit është një bahçe e babës për kryetarin , flet edhe blerja e veturave superluksoze prej më shumë se 700.000 euro, të cilat ende nuk i kanë ardhur Kuvendit. Ju faleminderit.

KRYETARI I KUVENDIT KOLË BERISHA – Ju faleminderit. Fjalën e ka deputetja Melihate Tërmkollli, le të përgatitet deputetja Selvije Halimi.

DEPUTETJA MELIHATE TERMKOLLI - Ju faleminderit z. kryetar, të nderuar zotërinj deputetë. Unë shumë shkurtimisht do të përpiqem të jap një kontribut në këtë çështje. Unë nuk e kam shumë të qartë , si ka mundësi që njerëz që nuk respektojnë kodin elementar moral , në trajtimin e çdo çështjeje ne duhet ta kemi një kod elementar moral kur e shtrojmë çështjen ose kur akuzojmë dikë ose kur merremi me trajtimin e çështjeve, duhet të dimë kush jemi dhe kush po e thotë atë, do të thotë kush kërkon transparencë dhe menaxhim të drejtë të parasë publike.

Unë jam dakord me të gjithë ata të cilët kanë bërë vetë punën e tillë, kanë bërë një menaxhim të plotë dhe real të parasë publike, por nuk mund ta kuptoj asnjëherë edhe assesi, kur njerëz të cilët janë zhytur me të dy këmbët në menaxhimin më të prapësht të mundshëm dhe më të keq, të flasin sot për menaxhim të dikujt tjetër. Unë kujtoj që në institucionet e Kosovës duhet të respektohet një kod elementar dhe moral në shtrimin e këtyre çështjeve. Ka shumë muaj që në këtë parlament, kryesisë së Parlamentit i kam dërguar një material për keqmenaxhim, për keqpërdorim të milionave, është fjala për miliona në Ministrinë e Shërbimeve Publike.

Duke përfshirë këtu edhe veturën që sot po përmendet edhe disa vetura që janë blerë edhe ato janë qindra mijëra euro, të cilat asnjëherë nuk dihet ku janë, nuk ekzistojnë, edhe këto për fat të keq gjykatat e Kosovës nuk i kanë parë edhe nuk po i shohin . Më bëri përshtypje ajo rreth projekteve të dështuara . Ka shumë projekte dështuese në mandatin e kaluar fatkeqësisht janë miliona. Në mesin e të gjithë atyre po i përmendi vetëm dy: projekti Hend corporation për koeficientin e pagave që ka kushtuar rreth 1 milion euro,ka dështuar.

Tash çfarë të drejte morale ka ai njeri që ka dështuar për këto projekte të flasë sot për transparencë për korrektësi të të tjerëve. Po e përmend një projekt tjetër jofunksional që

ka kushtuar , po ashtu, më se 1 milion euro,por kanë dështuar ato projekte, kanë dështuar ato mjete. Ku kanë shkuar mjetet? Këto janë bërë nën udhëheqjen e z. Krasniqi në Ministrinë e Shërbimeve Publike.

Prandaj unë kujtoj që trajtimi i çështjeve duhet të ketë korrektësi të plotë , e cila lidhet me çështjen e jo me motivet politike ndaj individëve të caktuar ,kushto qofshin ata dhe kjo më sjell prapë te konstatimi që kam bërë shumë kohë më herët këtu: Hajni bërtet kapeni hajnin, krimineli bërtet kapeni kriminelin. Kjo e dëmton interesin e Kosovës, të jemi shumë të sigurt, sepse është e vërtetë që qytetari i Kosovës nuk e di kush është vërtet hajn e kush është kriminel këtu.Duhet të jemi shumë të qartë dhe të sigurt që këto gjëra të sqarohen, por këto nuk do të sqarohen asnjëherë kur çështjet shtrohen me motivime politike .Këto do të sqarohen atëherë kur institucionet përkatëse përgjegjëse do t'i marrin përgjegjësitë e veta, do të ushtrojnë përgjegjësitë e veta dhe do të zgjidhen çështjet mbi bazë të përgjegjësive që ushtrojnë, mbi bazë të rrugës institucionale. Unë natyrisht do të përkrah qëndrimin e Grupit Parlamentar të LDK-së dhe të them se LDK-ja promovon rrugë institucionale dhe jo motivime politike. Ju faleminderit.

KRYETARI I KUVENDIT KOLË BERISHA –Ju faleminderit. Fjalën e ka Jakup Krasniqi.

DEPUTETI JAKUP KRASNIQI – Z. kryetar, të nderuar deputetë po dal që të shikoj drejtë në sy se mendoj se kam edhe sy edhe fytyrë për të shikuar. Nëse dikush ka ndonjë argument dhe auditori i përgjithshëm jam i bindur që e ka bërë auditimin e tij edhe në Ministrinë e Shërbimeve Publike dhe jo një herë, aty janë bërë edhe auditime private disa herë gjatë dy vjetëve të fundit, le ta dorëzojnë atë material atje ku e ka vendin.Kisha dëshiruar që ai audit t'u dorëzohet edhe deputetëve të Parlamentit të Kosovës dhe të bëhet publik. Unë dëshiroj që audit i përgjithshëm që është bërë në Ministrinë e Shërbimeve Publike nga auditori i përgjithshëm që e ka bërë dhe ky raport që ne po e diskutojmë sot t'i dorëzohet dhe ta kenë Qeveria dhe Parlamenti dhe opinionin e përgjithshëm. Unë jam i gatshëm të përballem me çdo të gjetur apo të pagjetur. Në kohën kur unë kam qenë ministër i Shërbimeve Publike, prandaj është mirë të pushoj. E kanë pushtetin në Parlament, qeverisjen ,Ministrinë e Ekonomisë dhe të Financave me një fjalë e keni krejt pushtetin nëse gjeni fakte dhe dëshmi jo të këtyre përmasave që janë këtu, unë jam i gatshëm të jap përgjegjësi edhe politike, morale dhe ligjore, kështu që është mirë ata që e kanë shkelur ligjin ..

KRYETARI I KUVENDIT KOLË BERISHA –Ju faleminderit. Fjalën e ka deputetja Selviqe Halimi le të përgatitet deputeti Ramë Buja

DEPUTETJA SELVIQE HALIMI – I nderuari kryetar, të nderuar deputetë dhe të tjerë të pranishëm në sallë. Raporti i të gjeturave faktike në administratën e Kuvendit të Kosovës,duke filluar nga zyra e ish kryetarit të Kuvendit të Kosovës, trëgon se deri më tash Kuvendi i Kosovës paska nxjerrë ligje për arkiv ose për sirtarët e arkivit të Kosovës e jo ligje që në rend të parë duhet t'i zbatojnë ata të cilët kanë marrë një përgjegjësi dhe një besim nga populli e më pastaj nga qytetarët.

A thua kemi moral të kërkojmë nga qytetarët që ata t'i respektojnë ligjet?. Në rend të parë Kuvendi ,si organi më i lartë në Kosovë, unë mendoj se ka herë dhe e kam potencuar këtu se ka humbur të drejtën morale të kërkojë respektimin e ligjit nga të gjitha institucionet që dalin nga Kuvendi apo që i aprovon Kuvendi, ai që nxjerr ligje shkel ligje apo mendon që ligjet nuk janë për të, por për të tjerët, Kjo nuk ekziston askund në botë dhe është një absurd i llojit të vet që ndodh në Kosovën në transicion. Si mund të kërkojë Kuvendi apo koalicioni qeverisës ose të pozitës, me respektin më të madh ju them , si mund të kërkonte nga Qeveria që ju e keni zgjedhur që ata të zbatojnë ligjin nesër, kur deri sot keni intervenuar që ata t'i shkelin ligjet dhe të lejojnë pagesa të shumëfishta edhe për gjëra për të cilat nuk ekziston ligji.

Unë do të ndalem në një krahasim ,dua t'iu thënë dhe le ta dinë qytetarët e Kosovës se të gjithë që janë në institucionet e Kosovës, qoftë ata qytetarët me përgjegjësi politike, qoftë ata si shërbyes civilë, marrin nga një pagë mujore, e madhe e vogël ajo që është dhe pagat sigurisht i depozitojnë diku dhe blejnë gjërat personale me paratë e qytetarëve të Kosovës, në mënyra të paligjshme, kurse 17% e popullatës jeton në varfëri të skajshme e mbi 50 në varfëri e çdo ditë shohim në televizione familje të cilat presion o sot apo nesër t'u bie kulmi i prishur mbi kokat e tyre. Pse ekziston ky Kuvend, a nuk ju bren ndërgjegjja që jemi këtu ulur , të gjithë po e shfrytëzoni, jo se të gjithë ata që heshtin dhe të gjithë ata që bëjnë krahasim që ky mori më shumë e ky ma pak nuk është në rregull me ta, t'i përgatisim raportet faktike dhe të kërkojmë nga institucionet përgjegjëse të gjithë ata që edhe një 5 cent të qytetarëve të Kosovës e keqpërdorin ose manipulojnë ,të mos i kenë vendet të cilat i kanë, pavarësisht nivelin apo institucionin në të cilin janë.

Në faqen 59 dhe 60 të këtij raporti për gjeturat faktike, tabela 11.1: thuhet pagesat për furnitorët të cilët mund të jenë të natyrës më tepër personale se sa ajo zyrtare, a është menduar që po e zbatojnë një ligj për ambient edhe siguri të kushteve dhe shëndet në punë ,duke blerë gjëra personale, jo, sepse atë ligj nuk po munden ta zbatojnë ata që punojnë në mihje, ata që punojnë vërtet në kushte të rrezikshme, qenkan gardërobat nga 1000 euro për përmirësim të kushteve. Me vlerën e atyre që janë paraqitur në këtë tabelë , ju qytetarë të Kosovës që mund t'u dërgoni 19 familjeve do të mund të paguhej asistencë sociale prej 65 euro për 12 muaj të vitit .Nuk them këtu që Kuvendi është dashur ta merrte atë rol ,po pse lejohet t'i ndahen mjete apo të keqpërdoren mjete që kanë mundur të shkojnë në Ministrinë për Punë dhe Mirëqenie Sociale dhe t'u ndahen atyre familjeve.

Po t'i shtojmë këtu vlera për pajisje të kuzhinës, ju lutem çfarë kuzhine duhet të ketë në Kuvend, kush përgatit këtu dhe për kë ushqim, është një bufe këtu, është një restorant publik, blejnë pajisje të kuzhinës edhe ato dy fakte paraqiten në këtë raport. Blihen çokollata për kë a mos është shkuar për ndonjë festë zyrtare apo për bajram ose për një festë tjetër t'u jepen fëmijëve të skamnorëve ato çokollata, jo, po t'ia shtojmë edhe këto vlera do të dalë që 28 familjeve do të mund të jepej asistencat sociale prej 65 eurosh. Dikush e tha këtu ma herët se nuk mund të bëjmë krahasim të tillë, mund të bëjmë nëse ato mjete janë ndarë për deputetë të Kosovës e është dashur të shfrytëzohen në mënyrë të drejtë dhe të ligjshme nëse ato mjete kanë qenë tepricë dhe s'paskan ditur Kuvendi i Kosovës ku t'i shpenzojë, ndihmojuni të tjerëve ,sepse ata janë qytetarë të Kosovës dhe nesër lypin bukë prej tyre. Kjo vlen, po them , për të gjithë deputetët, por vlen më tepër për ata deputetë të cilët janë në pozitë ,sepse duhet ta ndiejnë barrën e përgjegjësisë për këtë mandat qeverisës.

Mua më vjen keq se ky raport i të gjeturave faktike dhe kjo punë duhet të vazhdojë në të gjitha institucionet, madje duke shkuar edhe në çerdhe dhe të gjitha të debatohen e të bëhen publike dhe ky Kuvend njëherë e përgjithmonë duhet ta verë një pikë prej ku duhet të fillojnë t'i respektojnë ligjet e veta jo vetëm ai, por edhe Qeveria e institucionet pasuese. Ju faleminderit.

KRYETARI I KUVENDIT KOLË BERISHA – Ju faleminderit ,Fjalën e ka deputeti Ramë Buja le të përgatitet Ramandan Kelmendi

DEPUTETI RAMË BUJA – Të nderuar kolegë deputetë, i nderuari z. kryetar, unë nuk e besoj që ka deputet a njeri të ndershëm që vepron në institucionet e Kosovës e që ndihet mirë sot dhe nesër, për këto gjëra që po i përflasin sot e i kemi përfolur bukur më herët ,ne që nuk kemi dhënë votën për mbrapshtinë e bëra këtu dhe po ju them sinqerisht që këto gjëra janë tepër t shqetësuese dhe unë nuk besoj që ndokush të ndihet i nderuar po të jetë deputet i Parlamentit të Kosovës .

Raporti i të gjeturave në Parlament është dashur të ketë rrugë tjetër të veprimit, logjike, politike dhe ligjore. Ky raport i auditimit është dashur paraprakisht dhe pa praninë e mediave të debatohet në Kryesinë e Parlamentit pse jo të dal në Parlament shumë më herët dhe pa media gjithsesi dhe pastaj institucionalisht t'i dorëzohet organit gjyqësor për të qenë taman në rrugën e vetë logjike. Është bërë kjo si është bërë nuk duam të korrigjojmë si ka shkuar, por tani jemi në pozicionin që jemi dhe tash duhet të debatojmë. Unë nuk besoj se do të ketë ndonjë efekt. Për ta llogaritur këtë debat sot nuk po e them se është rrahje e ujit në ,megjithatë kisha dashur që ky debat ,së paku, të ndikojë që pas sa muajsh të mos debatojmë përsëri për kryetarin aktual për gjëra të ngjashme, ose për institucione të tjera dhe për përgjegjësit e institucioneve të tjera.

Unë do ta theksoj një gjë se ende nuk kam marrë përgjigje dhe besoj se as sot nuk do të marrë as unë as ju për çështjen e 236500 eurove të dhënë për veturën që nuk e di kush as ku janë paratë as ku është vetura/ z. Naim Maloku një herë në mbledhjen e Kryesisë pat pyetur kryetarin aktual se mos vallë vetura është blerë dhe është parkuar diku dhe na kushton parkingu i veturës nesër më shumë sesa ka kushtuar vetura për të cilën po flas. Këto janë gjëra për të cilat ende nuk kemi marrë përgjigje edhe pas këtij auditimi dhe kësaj gjëje që ka ndodhur dhe 236500 euro janë hiq më pak as më shumë nja dhjetë shtëpi të meremetuara të njerëzve të cilët vërtet vuajnë për gjërat elementare dhe ju pikë sot mbi kokë çatia, megjithatë ne akoma nuk dimë përgjigjen adekuate.

Të nderuar deputetë, është diçka që dua t'ju rikujtoj se e dini mirë për çështjen e vilës Gërmia që u përmend këtu. Është shtruar në forma të ndryshme në media të ndryshme në debate të ndryshme , i duhet a nuk i duhet Kuvendit të Kosovës vila Gërmia? Kjo nuk shtrohet kështu, por si është bërë si është realizuar dhe si po vazhdohet është më shumë se anakronike, më shumë se jo logjike se të mos flasim joligjore .

Dua t'ju them diçka se pasi nuk e dini është caktuar edhe një komision për të verifikuar gjendjen ndërtimore të vilës Gërmia ,sa para janë harxhuar dhe sa para ka harxhuar shefi i atij komisioni, apo krejt komisioni është tërhequr se faktin s'e e ka pasur një serë

dokumentesh krejt të paqarta dhe nuk ka ditur t'ia fillojë ose ka pasur shantazh dhe është tërhequr. Ky Kuvend, e kam fjalën për pozitën ka marrë një vendim hiq logjik dhe hiq politik dhe hiq ligjor që të vazhdojnë punimet në një punishte ku nuk dihet se kush ka filluar dhe kush ka vazhduar dhe kush do ta përfundojë. Ju lutem, do të vazhdojë të keni përgjegjësi ju të pozitës për këto gjëra që janë krejt të pa udhë ,krejt të paligjshme, duhet ta keni parasysh.

Andaj unë do të kisha dëshiruar po e ripërtërit që ky debat i sotëm ,përveç komisionit hetimor që do të formohet , besoj të jetë sinjal që pusitë abuzimet, vjedhjet, të mos vazhdojnë më ,sepse është bërë shumë dhe duhet ta dimë bashkë se këtu nuk është vetëm një emër, këtu nuk është një institucion i Kosovës, janë të gjitha institucionet e Kosovës aktuale që janë në rrjet .U përmend këtu Ministria e Ekonomisë dhe e Financave, buxheti, p thesari e përgjegjësit e tjerë që kanë mundur ta stopojnë paudhësinë e veprimeve financiare me taksën dhe me taksapaguesit e Kosovës, por nuk ka ndodhur. Ju faleminderit.

KRYETARI I KUVENDIT KOLË BERISHA –Ju faleminderit.Fjalën e ka deputeti Ramadan Kelmendi, le të përgatitet deputeti Hydajet Hyseni Kaloshi.

DEPUTETI RAMADAN KELMENDI – Ju faleminderit kryetar, i nderuari kryetar, të nderuar ministra prezentë, deputetë të respektuar. Sa është demokratike që ne sot të diskutojmë raportin e auditimit po aq duhet të jetë dhe është parimore të dimë për vlerësimin dhe rolin cili është i deputetit dhe roli i ligjshmërisë në këtë raport me këtë auditim, Ne sot po e shqyrtojmë vërtet një çështje shumë të rëndësishme ose një problem natyrisht të hapur për të cilin të gjithë jemi të interesuar, në veçanti mjetet e informimit pa kompetenca dhe pa autorizime po japim klasifikime të ndryshme jashtë vendimeve gjyqësore dhe parimore, por ajo është çështje e tyre.

Sikurse çdo shtet , çdo sistem politik, çdo kushtetutë që ka për qëllim afirmimin e parimit më fundamental të së drejtës në veçanti pra parimit të ligjshmërisë edhe ne sot patjetër të tërë këtë problem duhet vështruar, analizuar vetëm përmes ligjshmërisë e kompetencave që kemi si deputetë të këtij organi më të lartë ligjdhënës dhe çdo dalje jashtë kësaj është pikërisht ajo që po e kritikojmë dhe për të cilën po luftomë dhe në realitet themi shumëçka dhe nuk mund të marrim asnjë vendim. Në ligjshmëri askush nuk përjashtohet nga përgjegjësia pa marrë parasysh pozitën në shoqëri apo funksionin që ushtron dhe këtë po e kërkojmë dhe duhet ta kërkojmë edhe për këtë duhet të luftojmë. Në të njëjtën kohë të njëjtat veprime duhet t'i marrim se askush nuk mund të përgjigjet për veprimin që e ka bërë apo nuk e ka bërë pa u vërtetuar dhe pa u argumentuar. Unë me të drejtë shtoj pyetjen se kush është kompetent për të bërë këtë vlerësim në rastin konkret deputeti, prokuroria, apo gjyqësi?. Është e njohur shumë në drejtësi se konflikti në mes organeve të administratës bartësve të përgjegjësisë dhe të institucioneve i zgjedhin organet gjyqësore në procedura të caktuara ligjore dhe në ligjet që ne i kemi miratuar.

Vetëm në këtë mënyrë do të sigurojmë sundimin e së drejtës dhe të shtetit ligjor në të cilin thirren , betohet dhe për të cilin populli shpreson dhe jeton. Veprimtaria e organeve të pushtetit shqiptar jemi të vetëdijshëm se ka lidhje drejtpërsëdrejti në parimin e ligjshmërisë dhe detyra jonë është që informacionet mbi auditimin kanë përfunduar dhe lënda si të tillë vendin e ka para organeve kompetente në kuptimin e së drejtës dhe jo në

tatuaologjinë-politike, sepse sundimi i së drejtës mund të sigurohet mbi bazën e fakteve dhe të argumenteve dhe ndarjen e pushteteve në mes legjislativit, ekzekutivit dhe gjyqësorit. I pari miraton ligje ,jemi ne i dyti zbaton, dhe i treti zgjidh konfliktet. Këtu nuk ka koment.Unë mendoj se në këtë problem të hapur po kalohet në mënyra të fazave të debatimit të sotshëm dhe të mëparshëm, për mua shterpë, andaj duhet në mënyrë të pavarur dhe meritore ta zgjedhë gjykata për të cilën ne dëshirojmë të zbatojë dhe të tregojë ligjshmëri dhe zbatim të ligjeve në fuqi. Duhet të kemi besim në atë se organet gjyqësore që ne vet i kemi emëruar do të na zgjidhin këtë problem , për të mos u marrë ne me të.Kjo vlen për të gjitha keqpërdorimet e mundshme dhe përgjegjësitë e se cilit në funksionin që ushtron nga qytetari deri ai me përgjegjësinë më të lartë, nëse dëshirojmë që vërtet secili të del para së vërtetës dhe t'i tregojë keqpërdorimet që i ka bërë, jo ai vetë, por drejtësia, ju faleminderit.

KRYETARI I KUVENDIT KOLË BERISHA – Ju faleminderit. Fjalën e ka deputeti Hydajet Hyseni, le të përgatitet deputetja Safete Hadergjonaj.

DEPUTETI HYDAJET HYSENI – Ju faleminderit z. kryetar. Unë sot nuk do të lëshohem në vlerësimin e raportit ose dokumentit që kemi përpara. Besoj që ka ekspertë që e bëjnë këtë më mirë se unë, por nuk do të lëshohem edhe për një arsye, sepse siç e dini këto çështje i kam shtruar herët me kohë dhe atëherë për fat të keq jo vetëm që nuk jam kuptuar drejtë por shpesh jam keqkuptuar, mund të keqkuptohem edhe tash por e konsideroj jo e denjë të flas tani pas situatës së krijuar, sidomos të lëshohem në detaje dhe në një mënyrë të mund të përdoret kjo pastaj edhe në luftërat e brendshme për pushtet . Zonja dhe zotërinj, këtë çështje duhet ta shikojmë në funksion të luftës për shtet, të luftës për imazhin që i duhet Kosovës, prandaj edhe unë mendoj se nuk duhet të lejojmë individualizimin në raste, por të shikojmë fenomenin ,sepse është fenomeni ai që dëmton institucionet e Kosovës ,qytetarët e Kosovës dhe Kosovën si tërësi. Këtu u përmend e drejta morale dhe u përmend me një kontekst për mua shumë të pazakonshëm .Sipas saj del se nëse dikush në një mënyrë apo tjetër paska pasur mundësi të bëjë keqpërdorime ,ai s'ka të drejtë të flasë, por ne e kemi raportin në pyetje, edhe sikur dikush të ketë pasur shkelje ai megjithatë ka drejtë të thotë mendimin e tij dhe nëse tjetri ka fakte, si u tha këtu me të drejtë, le t'i paraqesë ato në diskutim ,por jo t'i thotë ti nuk mund të flasësh sepse unë mund ti them pastaj edhe ti je si ai e tjera e tjera. Merreni me mend e bëjnë këtë ministrat të cilët megjithatë u ka dalë zëri i keq për menaxhimin e sotëm të financave në ministritë e tyre. Aq më tepër ministrja e Shërbimeve Publike. më vjen keq që ka shkuar, e cila ka përgjegjësi të drejtpërdrejtë për shumë çështje që lidhen edhe me raportin që kemi në fjalë dhe me raporte të tjera të ngjashme.

Për mendimin tim ne duhet të shikojmë politikën e ndërtimit të buxhetit në institucionin e Kuvendit të Kosovës dhe në gjitha institucionet dhe praktikat e shpenzimeve të këtij buxheti. Kështu edhe ka qenë shtruar në vijimësi sa herë është biseduar për buxhetin. Ju kujtohen ato linjat buxhetore, keqpërdorimi i institucionit të kryetarit të Kosovës, ndryshimi i parametrave etj, janë injoruar jo vetëm-prej Kuvendit, por edhe prej Qeverisë. Këtë duhet ta thosha me rend tjetër jo vetëm prej Qeverisë, por edhe prej Kuvendit dhe tash flasim për pasojat. Ne mund ti parandalojmë, unë angazhohem që tani ti marrim masat dhe t'i parandalojmë fenomenet e tilla në të ardhmen dhe kjo për dy arsye, një sepse Kuvendi duhet të jep shembullin e funksionimit dhe të menaxhimit të rregullt dhe

pastaj të ketë sy e faqe si tha kolegu im të kërkojë prej gjithë të tjerëve që edhe ata ta respektojnë ligjin.

Por edhe arsyeja tjetër. Ju e dini në çfarë kushtesh punojnë Kuvendi- deputetët, si i marrim materialet, asnjë pliko nuk ndahet, unë e mbaj në mend para 30 vitesh deputetëve u është shpërndarë në mënyrën më të denjë materiali.

Deputetët nuk kanë zyre. Kuvendi i Kosovës nuk ka përkthim fare, UNMIK-u duhet të na shërbejë përkthimin, komisionet nuk kanë asnjë asistencë dhe për të mos shtuar më shumë, ujë nuk ka në zyrat e Kuvendit për deputetë dhe është thënë disa herë kur është kërkuar ndonjë përmirësim nuk ka para, kurse tani del se paska pasur para për lukse e gjëra që nuk i kanë as vendet më të përparuara dhe pastaj ne çuditemi pse janë tërhequr disa projekte. Ky Kuvend e ka injoruar ta zëmë diskutimin e ndonjëherë këtu pse u tërhoq projekti i Agjensionit Evropian për kulmin e ndërtesës, lidhej me mënyrën si janë menaxhuar financat në interiorin e Kuvendit në këtë sallë edhe në kabinetin e kryetarit në qendrën protokollare Gërmia. Ky Kuvend e ka injoruar shqetësimin edhe të deputetëve, por edhe të qytetarëve edhe të shoqërisë civile, ju e dini qytetarët që kanë shëndetin e kërkojnë në Gërmia kanë protestuar, janë organizuar, kanë bërë koalicion, shoqëria civile ka lëvizur dhe ishte dinjitoze, në emër të Kuvendit është përdorur dhuna kundër aktivistëve ambientaliste dhe Kuvendi e Qeveria kanë heshtur janë shkelur një mori ligjesh, janë falsifikuar dokumentet dhe ne kemi heshtur përsëri. Unë e di tash dikush do të thotë por në këtë mënyrë ne po dëmtojmë imazhin e Kosovës., Më lejoni ta kontestojë këtë logjikë demagogjike, nuk dëmtohet imazhi i Kosovës duke luftuar krimin ,duke luftuar të keqen duke i vënë pikat mbi , nuk luftohet duke e lejuar fenomenin, duke e toleruar atë, i bëjmë dy gabime në atë mënyrë, një pse e kemi të keqen dhe i dyta pse bashkëpunojmë me të? Pse e tolerojmë atë nëse dëshmojmë se jemi në gjendje për të vetëvendosur për ta luftuar atë së paku gjysmën e të keqes e heqim, prandaj ajo që i duhet Kuvendit të Kosovës dhe institucioneve të saj në momentet që po kalojmë është e vërteta hetimi parlamentar dhe pastaj le të dal e vërteta ashtu si është. Ne gjuajmë si thotë populli dardhë e kush ka qëlluar në dardhë le t'ia shohë hajrin. Nuk i duhet Kosovës logjika e makushit e futjes se kokës në zall, sepse të gjithë i dimë të këqijat nuk i di vetëm qytetari ynë që vuan edhe për gjërat elementare.Unë di dikush do të më thotë si më kanë thanë para do kohësh nuk më hiqet nga mendja, kush u ka faj qytetarëve pse nuk kanë. U kemi ne faj. Po e përsëris atë që ua kam thënë kolegëve të mi ministra para disa ditësh : U ka faj qeverisja, u kemi të gjithë faj që lejojmë keqpërdorime të tilla të mëdha. Unë prandaj angazhohem për hetim të vërtetë parlamentar për të vërtetën që është në funksion të luftës për shtet të Kosovës. Ju faleminderit

KRYETARI I KUVENDIT KOLË BERISHA – Ju faleminderit, fjalën e ka deputetja Safete Hadergjona; le të përgatitet deputeti Hajredin Hyseni.

DEPUTETJA SAFETE HADERGJONAJ – Ju faleminderit z. kryetar, të nderuar deputetë; ne në Kuvend asnjëherë nuk kemi shqyrtuar ndonjë raport të shpenzimeve të Kuvendit, asnjë nga anëtarët e Kuvendit nuk ka pasur ndonjë informatë a është bërë ndonjë herë ndonjë auditim i brendshëm në Kuvend dhe a janë dhënë rekomandime nga ana e auditorit dhe a janë zbatuar ato rekomandime. Prandaj është e natyrshme të ketë abuzim mjetesh publike në institucione kur vjen në shprehje pushteti i individit dhe kur nuk ka transparencë. Nga ky raport shihet se kryetari i Kuvendit në mënyrën më arbitrare

ka ushtruar diktatin e vet dhe ka abuzuar buxhetin e Kuvendit ,duke mos qenë transparent as ndaj Kryesisë.

Është shumë e rëndë të shohësh gjithë këto fatura të korrupsionit dhe nuk di se cili është **fillimi** i keq menaxhimit, keqpërdorimit të buxhetit apo të them shkurt i hajnisë së buxhetit. Dikujt që nuk e ka këtë material i duket e pa mundur të ndodhin gjithë këto keqpërdorime në institucionin ligjvënës të harxhohen paratë e Kosovës për luks marramendës nga kuvendari dhe stafi i tij kur qytetari i Kosovës çdo ditë e më tepër po varfërohet. Nëse i referohemi ligjit të prokurimit publik në këtë raport ka shkelje të rënda, sidomos të projekteve kapitale siç janë: ndërtimi i Vila Grmisë apo blerja e makinave ku haptas vërehet rrjeti i organizuar i korrupsionit. Kur këtyre u shtohen edhe keqpërdorimet e shumta që janë bërë tek shpenzimi i mallrave dhe i shërbimeve ,sidomos me avance para të imta dhe meditje dhe kur ke parasysh hezitimin e Kuvendit për të ofruar informacionin në lidhje me faturat dhe furnizuesit për çka auditori është i detyruar të mbështetet në informacionet e ofruara nga thesari, atëherë është domosdoshmëri që gjykata të kryejë më shpejtë punën e saj e të mos ecë me hapat e breshkës.

Te shpenzimet e mallrave dhe shpenzimeve auditori janë vërejtur shkelje të procedurave dhe të prokurimit ,si dhe mungesa e kërkesave për blerje, pamundësia e identifikimit se në çfarë mënyre është zgjedhur furnizuesi, shumë herë zgjedhja e furnizuesit është bërë në bazë të gjykimit, pagesat e dyfishta, kurdisja e faturave që të mos kalohen në 100 euro ku mund të bëhet pagesa në kesh për t'u ikur transaksioneve bankare, rregullimi i faturave nga furnizuesi për t'u ngritur vlera e mallit në rast kur çmimet kanë qenë më të ulëta se 500 euro apo ndarja e faturave për t'iu shmangur procedurave të prokurimit.

Prokurimi nuk i ka ndjekur procedurat për arkëtimet e stafit të kryetarit ,nuk dihet kush është arkëtuar po e marrë një shembull me 558 euro nga buxheti i vetmi përshkrim në faturë sipas auditorit është se nuk ekzistojnë detaje, dihet se furnizuesi është **arismetika** ,por nuk dihet se kush e ka shfrytëzuar këtë shërbim nuk ka kërkesë, nuk ka përshkrim të shërbimit, nuk janë kryer procedurat e prokurimit nga Departamenti i Prokurimit edhe pse pagesa është mbi 500 euro. Mallrat e pranuar nuk kanë korresponduar me shumën e paguar apo faturat janë paguar para se të jenë pranuar mallrat, apo kontratat janë nënshkruar para se të bëhet vlerësimi i tenderit.

Nënshkrimi i dokumenteve nga këshilltari i kryetarit që është plotësisht në kundërshtim me Ligjin për menaxhimin e financave publike që ka të precizuar se kush mund të jetë nënshkruer, për shumë mallra dhe shërbime nuk përputhen datat në kontrata më ato të faturave etj etj. Në raport thuhet se ka pasur transaksione që kanë ndodhur me furnizuesit që janë regjistruar pak kohë pas datës së regjistrimit të këtyre kompanive. Atëherë si mund të dimë sa ka qenë vlera e furnizimit nga këto kompani, a mos janë regjistruar këto kompani, vetëm sa për tu bërë këto furnizime, apo si mund të arsyetohet pagesa e 6888 euro kompanisë Arthaus më 23 korrik 2004 kurse data e themelimit të kompanisë është vërtetuar nga auditori se është një vit më vonë, më 3 qershor të vitit 2005, fatura e kësaj blerje është nënshkruar nga zyrtarja e Departamentit Ligjor që gjatë kohës së ish-kryetarit ka qenë në rolin e këshilltares së kryetarit.

Auditori na i ka dhënë detajet e 58 pagesave të bëra furnizuesve ku qartë shihet përpjekja për t'i mbuluar hajnitë me dokumentacionin fiktiv. Vërehen shkelje të shumta, por ajo çka është ma kryesorja ne nuk e dimë a janë në pronësi të Kuvendit ato pajisjet e blera me gjithë këto parregullsi dhe shkelje.

Në faqen 30 shohim se janë blerë 9 çanta të vogla të lëkurës për zyrën e kryetarit me vlerë 2125 euro. Përpos shkeljeve tjera këtu vërehet se të tri ofertat janë plotësuar me shkrim dore dhe në të tri ofertat shkrimi është i njëjtë ,është bërë falsifikim i dokumenteve. Kompanitë të cilat i kanë paraqitur ofertat janë fiktive ,sepse nuk janë të regjistruara në regjistrin e Agjencisë për Regjistrimin e Bizneseve.

Në faqen 39 shohim se është blerë skela e alumini në vlerë 7500 euro, fatura është e datës 30 qershor ,kurse kontrata me 1 korrik, i tërë dokumentacioni tjetër është fiktiv atëherë shtrohet pyetja, a është kjo pajisje në pronësi të Kuvendit, këtë nuk e dimë nga raporti i auditorit.

Në faqen 40 shihet se janë blerë rroba sportive, këpucët atletike, për stafin femërorë administrativ me vlerë 1994 euro. Ne nuk jemi në dijeni se në kuadër të Kuvendit ka ndonjë ekip që garon në gara sportive për ta arsyetuar ndoshta këtë blerje. Është blerë material elektrik me vlerë 2032 euro, nuk dihet se ku është shpenzuar ky material, dokumentacioni i blerjes është i mangët.

Në faqen 41 shohim se janë blerë kompjuter dhe skaner në vlerën prej 1612 euro. Fatura është e datës 22 tetor, kurse kontrata dhe raporti i vlerësimi është 22 nëntor, Nnuk ka fare dokumentacion ashtu si e kërkojnë procedurat e prokurimit. Qartë shihet përpjekja për t'u mbuluar rrejtshëm blerja.

Në faqen 43 shohim se janë bërë servisimi dhe mirëmbajtja dy gjeneratorëve në Brezovicë dhe në Velani, janë shpenzuar 499.75 euro, për shërbim privat të kryetarit të Kuvendit. Blerja nuk është bërë sipas procedurës së tri ofertave. Auditori në dosje të kësaj blerje ka gjetur dokumente fiktive, dy oferta ku njëra nuk përputhet fare në datën e kuotimit.

Kurse në faqen 46 te blerja e telefonit fiks për kabinetin e kryetarit ka falsifikim të dokumentit, telefoni është blerë në Francë 137 euro, kurse pagesa prej 400 eurove gjëja është bërë furnizuesit **at shop**, kurse vula është e kompanisë Motorola dhe është vërejtur se çmimi është i përmirësuar. Asnjë ligj –rregullorë, urdhëresë, udhëzim që rregullon mënyrën e menaxhimit të mjeteve të buxhetit nuk parasheh mundësinë e blerjes së gjërave luksoze apo të gjërave të tjera për nevoja personale. Auditori ka vërejtur se ka një numër më të madh të këtyre blerjeve, por e keqja është se nga këto detaje të pagesave shohim se janë blerë mallra luksoze për nevoja personale. Unë do ti theksoja disa prej tyre që opinionimi do të dijë se ku shkojnë paratë e tyre. Janë blerë pajisje kuzhine për zyrën e kryetarit në vlerë prej 495 euro pa u respektuar procedurat. Pajisjet për kuzhinë janë nënshkruar nga kryetari ish- këshilltarit të Kuvendit. Çka i janë dashur kryetarit pajisjet e kuzhinë?

Nuk dua të përmend shërbimet detaje apo blerjet e syzeve që nuk arsyetohen dot. Po si të arsyetohen shpenzimet e shumta për çështje private gjatë udhëtimit të kryetarit, në të kthyer nga një udhëtim kryetari vishet bukur me paratë e buxhetit, blen rroba në një firmë

të njohur 374 euro, bën disa konsultime me mjekët ku shpenzon 226 euro, në aeroportin e Lubjanës blen parfume dhe çokolata në vlerë 186 euro sigurisht për anëtarët e familjes, blen edhe një palë rroba të tjera 210 euro dhe sigurisht ndonjë dhuratë tjetër për familjarët 49.80 euro gjithsej 104 euro.

Për mëditjet gjatë vitit 2005 janë shpenzuar më shumë se 86 mijë euro dhe se u shpenzuan më shumë se 86973 euro nga kjo shumë. Vetëm për një udhëtim të dyshimtë në Bosnje janë shpenzuar 10528 euro, auditori ka zbuluar se ka falsifikim të dokumentacionit, nuk dihet se kush ishte në udhëtim zyrtar në Bosnje. Në dokumentacion thuhet se kanë qenë 5 veta, në fakt ishin 3 veta u janë hequr shpenzimet për 7 ditë ku në fakt kishin qëndruar vetëm 5 ditë. Sekretari i Kuvendit dhe drejtori duhet të japin përgjegjësi për 10528 euro të shpenzuara për dokumentacionin e falsifikuar. Atëherë duke u nisur vetëm nga këto të dhëna dhe duke mos i marrë edhe shumë të tjera që janë të paraqitura në raportin e auditorit, është domosdoshmëri themelimi apo formimi i një komisioni hetimor në këtë Parlament për t'i verifikuar të gjitha këto shkelje të cilat janë bërë nga ana e Kuvendit të Kosovës.

KRYETARI I KUVENDIT KOLË BERISHA – Ju faleminderit, fjalën e ka deputeti Hajredin Hyseni, le të përgatitet deputeti Lulzim Zeneli.

DEPUTETI HAJREDIN HYSENI- Z. kryetar, ministra të pranishëm të nderuar deputetë. Para vetes sot kemi raportin e auditimit të jashtëm i cili hedh një dritë mbi punën e këtij Kuvendi dhe mbi punën e atyre që kanë drejtuar këtë Kuvend në këto vite. Në fillim të raportit i cili sjell fakte për një keqmenaxhim në Kuvendin e Kosovës, theksohet se ky auditim nuk mund të merret si i plotë se po të ishte i mundshëm vazhdimi i hulumtimit të më tutjeshëm të dokumentacionit në të cilin ka të dhëna më të plota për një keqpërdorim që ka ndodhur me buxhetin e Kosovës, shprehen auditorët të cilët konsiderojnë se nuk kanë kryer punën deri në fund, dhe ne vijmë në një situatë ku duhet të përshëndeten ata se kanë hedhur sa do pak dritë dhe në anën tjetër me keqardhje se nuk kanë vazhduar puna e tyre për ta sqaruar deri në fund tërë punën e Kuvendit, sepse kemi të bëjmë me një keqpërdorim nga Kuvendi i Kosovës i cili është i thirrur të pengojë keqpërdorimet jo vetëm në Kuvend, por edhe të tërë shpenzuesit e tjerë të buxhetit të cilëve ky Kuvend u ka aprovuar atë buxhet.

Duke lexuar këtë raport të auditorit dhe në qoftë se zhvendoset nga konteksti kohor dhe territorial njeriu mund të paramendojë se është një vend ku parësor për ata banorë është pushtimi i planetëve të tjera jashtë tokës e jo lufta për ekzistencë siç është tani në Kosovë. Parësore për ta është rekreacionet dhe jo përpjekjet për të mundur terrin me të cilin ballafaqohet çdo ditë e më shumë kjo popullatë.

Të nderuar deputetë, ky raport ka anën komike dhe tragjike, ana komike është sepse të jesh në krye të Parlamentit mund të mos shpenzosh të holla as për të blerë bukë në shtëpinë tënde, mund t'i ndërrosh sa herë ta do qefi syzet, mund edhe të blesh gel për flokë po edhe deshe, paratë shtetit janë ato mund të shpenzosh edhe për gjërat më banale po deshe dhe asgjë nuk do të ndodhë se demokracia është vetëm perceptim imagjinar i këtyre njerëzve, por tragjike është se këta njerëz e kanë në dorë fatin e miliona njerëzve dhe mund t'ua vrasin shpresat atyre njerëzve për jetë ata mund t'ua bëjnë vërtet demokracinë si diçka utopike.

Të nderuar deputetë. duke parë maniret e kryetarit të Kuvendit nga ky auditim të cilin e konsiderojnë vetë ata jo të plotë. si syzat, makinën për larjen e enëve, rrobat sportive, skarën për piknik dhe duke shikuar çdo ditë e më shumë imazhet që vijnë përmes ekranit televiziv të familjeve të shumta në Kosovë që jetojnë për ekzistencë s'ka se si të mos konkludosh se ky Kuvend ka dështuar në misionin që kishte të ndërtimit të shtetit ligjor, ku ligjin e shkelin dhe nuk e zbatojnë ata që vetë e miratojnë ata që janë të thirrur më së shumti që ta zbatojnë atë. Ne mund të jemi indiferent për këto shkelje që kanë ndodhur në Kuvendin e Kosovës në këto vite, por për shkeljet që ndodhin vazhdimisht në institucionet e Kosovës ne mund t'i mbyllim sytë për interesat dytësore apo terciare që mund të na duken sot më të rëndësishme, por mos harroni se në Kosovë po instalohet krimi institucional dhe këtë nga Kuvendi i Kosovës i cili do t'u kushtojë mjaft shtrenjtë gjeneratave të ardhme dhe do ta vrasë të ardhmen tonë për të cilin nuk ndalemi e të mendojmë së paku një herë seriozisht.

Për të parë keqmenaxhimin dhe grykësinë e njerëzve që kanë pasur dorë mbi buxhetin e Kuvendit nuk të duhet shumë ta studiosh këtë raport, mjafton të shikosh shpenzimet që kanë bërë ditëve të vikendit nëpër restorante të Kosovës që nga Lugi i Trandafilëve në Orllan, Trofta në Burim, Vërmnica në Prizren, sikur të ishte ky hzmni i tyre të punës së pushtetarëve të Kuvendit nga restoranti në restorant dhe nuk është vështirë të konstatoosh se këta njerëz kanë udhëhequr në mënyrë të papërgjegjshme dhe të paligjshme sikur Kuvendi të ishte çiflig i tyre dhe ata nuk i kanë dhënë askujt asnjë llogari, sepse ligj janë vetë ata dhe i kanë aprovuar vetë ato.

Të nderuar deputetë, ndërgjegjja është pjesë e humbur për shumë politikanë që veprojnë sot në Kosovë, ku në bazë të rrethanave kohore, do të duhej të ishte pjesë motivuese e punës së tyre dhe do të duhej t'i karakterizonte ata, po kjo nuk ndodh dhe ky është një realitet i përditshmërisë sonë në Kosovë, shteti ligjor nuk ndërtohet në bazë të ndërgjegjes së individëve, ai kërkon zbatim të ligjit në radhë të parë nga ata që i aprovojnë ato ligje dhe ndërmarrjen e masave. Në fund, diskutimi i sotëm duhet kuptuar dhe duhet të jetë sulm ndaj korrupsionit dhe ndaj të korruptuarve qofshin ata edhe personalitete dhe pa marrë këta njerëz vendin e merituar dhe ju në institucione nuk do të kemi shtet ligjor. Ju faleminderit.

KRYETARI I KUVENID KOLË BERISHA – Ju faleminderit, fjalën e ka deputeti Lulzim Zeneli, le të përgatitet Bajram Rexhepi

DEPUTETI LULZIM ZENELI – Të nderuar deputetë, duke e mbështetur qëndrimin e shefit të Grupit Parlamentar të LDK-së dhe në sqarimet e paraqitura në mënyrë eksplicite nga deputeti Fadil Geci, më lejoni të shpreh qëndrimin tim lidhur me pikën që është në rendin e ditës. Për këtë raport në Kuvendin e Kosovës është debat i imponuar është debat me motive politike dhe është debat i pa arsyetuar. Them se është debat i imponuar për faktin se në seancën e kaluar me shumicë votash kjo pikë e rendit të ditës është shtyrë për më vonë me arsytim se materiali i shpërndarë për deputetë nuk është i kompletuar, nuk sugjeron masa të caktuara dhe nuk është obligativ për diskutim. Ky debat është politik dhe nuk mund të jetë ndryshe për dy arsye./ Arsyeja e parë ne po e plotësojmë një dëshirë politike në rastin tonë konkret të opozitës dhe e dyta që ekziston motivacioni i qartë politik, duke e plotësuar këtë dëshirë ne në Kuvendin e Kosovës nuk e

kthejmë ligjshmërinë siç po pretendohet, por po instalojmë diçka që në praktikat parlamentare nuk është e njohur. Unë do të thosha **minorokracinë**, qoftë duke debatuar për diçka që nuk është e jashtëzakonshme për të debatuar, qoftë për t'ia dhënë rastin secilit sot këtu që të shtyhet edhe para Kuvendit edhe para opinionit me urrejtjet e tyre patologjike, qoftë ndaj institucioneve qoftë ndaj individëve të caktuar.

Kjo është një lojë politike për mendimin tim në emër të luftimit të keqpërdorimeve, është një lojë politike së cilës i vjen era politikë, është një lojë që lidhet edhe me proceset e gjithmbarshme politike, por skenari i kësaj loje ka edhe prapavijë jashtë institucionale. Është për të ardhur keq se ky raport është çfarë është. Prej muajit korrik të këtij viti nuk kanë reshtur të botohet në vazhdimësi në të gjitha përditshmet tona.

Është shtjerë çdo fjali e këtij raporti dhe çdo qytetarë i i Kosovës e ka mësuar përmendësh, çdo paragraf të tij e tash pas shumë muajve na servohet neve për diskutim dhe shqyrtim. Çfarë serioziteti është ky? Kjo më së paku mund të ndodhë në një institucion si është Kuvendi.

LDK-ja do ta mbrojë debatin, transparencën, ligjshmërinë të cilat janë elementet kryesore që duhet të dominojnë në frymën e punës së Kuvendit dhe askush nuk mundet t'i mohojë ose t'i ndalojë, por është një limit, në mes të korrektësisë dhe sinqeritetit që të hulumtohet deri në fund çdo rast qoftë i keq menaxhimit apo i keqpërdorimeve, në njëerën anë dhe i përpjekjeve për denigrim dhe luftë politike të pa kompromis dhe njollosje e personaliteteve politike.

Lufta politike duhet të bartet në terrenin politik nuk i duhet ta kalojë... por për fund duhet ta kemi një gjë shumë të qartë, që drejtësia patjetër duhet ta thotë fjalën e vet e pastaj ne ta japim mendimin tonë. Askush nuk duhet të jetë mbi ligjin, por praktika e mundimeve dhe skenarëve eliminon, etiketon dhe njollos figura, prandaj duhet të marrin fund. Ju faleminderit.

KRYETARI I KUVENID KOLË BERISHA – Ju faleminderit, fjalën e ka Bajram Rexhepi le të përgatitet Enver Hoxhaj,

DEPUTETI BAJRAM REXHEPI - I nderuari kryetar i Parlamentit, të nderuar ministra, të nderuar deputetë.

Unë nuk do të thellohem shumë në vlerësimin e raportit, por më pak do të bëj një vlerësim të institucionit të auditorit të përgjithshëm. Pas një kohe të gjatë të mos transparencës dhe të mosfeksionimit të institucioneve përgjegjëse për hulumtime dhe keqpërdorime të buxhetit u krijua edhe institucioni i auditorit të përgjithshëm. Në një gjeneratë të licencuar të auditorëve vendorë në një përgatitje profesionale solide ky trajnim i tyre ka zgjatur rreth dy vjet dhe është udhëhequr nga ish-auditorja gjeneral znj. Alhenius një suedeze me një përvojë të gjatë e cila atë përvojë e ka përcjellë edhe te auditorët vendorë. Pse nuk bëhet auditimi në të gjitha institucionet e tjera mendoj se është mungesë e stafit, ende nuk është plotësuar, fillimisht kanë qenë të licencuar rreth 20 sish dhe ai numër duhet të jetë shumë më i madh, në mënyrë që të kemi një auditim më efikas në të gjitha institucionet, tek e fundit ky është obligim ligjor që i obligon institucionet për çdo vit që të bëjnë auditimin.

Në të kaluarën ka pasur auditim, por ai auditim është bërë kryesisht nga auditorët e jashtëm siç janë e të tjerët dhe janë paguar me para qoftë nga buxheti i Kosovës, qoftë nga buxheti i rezervuar i PSSP-së, por këto raporte rrallë herë janë bërë publike dhe kryesisht ia kanë dhënë atij i cili i ka porositur këto auditime. Mendoj se institucioni i auditorit të përgjithshëm duhet të ketë një përkrahje të institucioneve për arsye se me punën fillestare jepin një shpresë se në një të ardhme të afërt do ta kemi një transparencë shumë më të madhe të menaxhimit të buxheteve. Tek e fundit ata gati para një viti kanë filluar me auditim të komunave të ndryshme dhe i kanë disa rezultate inkurajuese, Tash po ashtu del raporti në Kuvend, por duhet të vazhdojë edhe në të gjitha institucionet e tjera.

Është edhe diçka inkurajuese për këtë institucion të auditorit të përgjithshëm, me sa duket e kanë një fillim të mbarë dhe janë jashtë ndikimeve politike, pra në një mënyrë janë imun nga ndikimet politike që edhe pritet ta kenë si të tillë dhe po ashtu jam përkrahës i idesë që të formohet edhe një komision hetimor në Parlament jo pse ata mund të jenë më profesionistë, sigurisht që nuk mund të jenë më profesionistë se auditori apo prokuroria, por do të tregojnë një vullnet të anëtarëve të Parlamentit për respektimin e rendit dhe ligjit dhe rritjen e transparencës dhe një përkrahje të auditorit të përgjithshëm dhe prokurorisë. Pra mund të jenë komplementar dhe po ashtu do të ishte mirë që ky komision të udhëhiqej nga opozita për hir të një transparence më të madhe dhe krejt në fund e përkrah idenë që doli nga përfaqësuesja e Orës që ky auditimi të fillojë edhe nga viti 2002 dhe asnjë institucion të mos jetë i privilegjuar që të mos ketë një auditim të tillë. Unë edhe më parë thash se auditime të tilla janë bërë, por janë bërë nga kompanitë ndërkombëtare si; po ashtu edhe nga **Oullaf** dhe qysh në vitin 2003 ne publikisht kemi kërkuar nga PSSP-ja të angazhojë qoftë auditim vendor, që atëherë nuk ka qenë i përgatitur ose ndërkombëtar dhe të fillojë edhe në institucionet e Qeverisë dhe nëpër ministri. Mendoj se askush nuk mund të jetë i paprekshëm në këto gjëra dhe jam përkrahës i asaj që ose të publikohen raportet e auditorëve ndërkombëtarë para deputetëve të Parlamentit ose nëse kanë kapacitetet të fillojnë prej vitit 2002 dhe çdo gjë të bëhet transparente.

KRYETARI I KUVENDIT KOLË BERISHA - Fjalën e ka Enver Hoxhaj, kurse le të përgatitet deputeti Hajredin Kuçi.

DEPUTETI ENVER HOXHAI – Të nderuar znj. dhe zotërinj, të nderuar ministra, i nderuari kryetar i Kuvendit Kolë Berisha.

Është vështirë pas shumë këtyre fjalimeve që në të vërtetë të kanalizohet debati në një drejtim të caktuar përderisa për qytetarët e Kosovës është më se e njohur tema e cila deri më tash ka mundur, përmes mediave, të përcillet në mënyrën e duhur.

Definitivisht dilema që e kanë qytetarët e Kosovës sot është shumë e thjeshtë, e cila mund të formulohet në dy pyetje,. E para është çfarë ka ndodhur të premten e kaluar dhe pyetja e dytë është çfarë po ndodh sot në këtë Kuvend? Për një temë e cila ka një emër të përbashkët keqpërdorimin, korrupsionin dhe hajninë në formën ma klasike që ekziston çfarëdo forme që ne mund ta moralizojmë sot. Më lejoni që të them se ndërprerja e seancës të premten e kaluar dhe vazhdimi i seancës sot është tregues për një realitet të dyfishtë që ka jo vetëm Kuvendi i Kosovës, por që ka Kosova, një realitet e cila është krizë e thellë politike. burimi i të cilës është koalicioni qeveritar në LDK dhe AAK e cila është bërë pengesë e proceseve dhe ka qenë pengesë e debatit të premten për një keqpërdorim kur të dhënat janë shumë të natyrës faktike me numra me shifra me raste

konkrete dhe një realitet tjetër i dytë kur opozita demokratike, të gjitha partitë opozitare në Kuvendin e Kosovës synojnë që Kuvendin e Kosovës ta shndërrojnë në një vend llogaridhënieje, të jep llogari edhe Qeveria e Kosovës edhe institucionet e saj, por për fund të fundit Kuvendi i Kosovës duhet t'i jep llogari vetvetes. Për temën të cilën ne po e debatojmë sot nuk është asgjë tjetër vetëm se privatizim i Kuvendit të Kosovës në relacionet evropiane nuk ka paralele, ka paralele por vetëm në relacionet e botës arabe ku sheiku nuk bën dallim në mes të buxhetit të shtetit dhe buxhetit privat, herë hyn në buxhetin e shtetit e i merr të hollat e shtetit herë buxhetin privat e përdor si buxhet të shtetit. Më lejoni të them që kjo për të cilën sot po diskutojmë mund pak a shumë të formulohet me një fjali. Korrupsioni ushtrohet ndaj individit ose pakica në rastin konkret është një njeri i mbështetur ndoshta në një pjesë të administratës së Kuvendit, mbështet nga shumica. Debatet e sotshme treguan që grupi Parlamentar i LDK-së megjithatë është mbështet një gjë të tillë dhe tolerohet nga të gjithë, por kur është fjala për tolerancën nga gjithë këtu nuk e kemi pozitën demokratike këtu do të jemi në kundërshtim jo vetëm që të mos tolerojmë, por do ta bëjmë një vijë të prerë e cila thjeshtë do ta përcjellë jetën tonë parlamentare gjatë kohës të ardhshme.

Kërkesa e të dy grupeve parlamentare të LDK edhe zonjës Syla në javën e kaluar për procedura për çështje teknike dhe argumentet morale që i dëgjuam gjatë ditës së sotshme për mendimin tim nuk janë asgjë tjetër vetëm se mbështetje masive e shumicës parlamentare në këtë Kuvend, konkretisht e LDK-së, pres edhe zëra më të zëshëm prej AAK-së që të distancohen. Kërkesat tona janë shumë të thjeshta, u përmendën deri më tash nëse nuk formohet komisioni hetimor se ky komision nuk udhëhiqet nga opozita nëse në Kuvendin e Kosovës vazhdohet debati që nuk u vazhdua deri më tash që thjeshtë ka moralizime dhe nuk ka sugjerime konkrete se si distancohemi nga një e keqe që i ka ndodhur Kuvendit të Kosovës, vetëm se shumicës që është në pozitë t'i dëshiroj sukses dhe mbështetje të mëtutjeshme të korrupsionit në Kosovë.

KRYETARI I KUVENDIT KOLË BERISHA – Fjalën e ka deputeti Hajredin Kuçi le të përgatitet Melihate Tërmkollli

DEPUTETI HARJEDIN KUÇI- Ju faleminderit të nderuar kryetar të nderuar ministra, zonja dhe zotërinj të nderuar deputetë. Tema që po e diskutojmë sot ka një qëllim që po them fillimisht që duhet të diskutohet në Kuvendin e Kosovës që është organi më i lartë i këtij vendi të tregoj përgjegjësinë e vet për ballë qytetarëve të Kosovës, në radhë të parë përballë taksapaguesve të Kosovës dhe në radhë të dytë të **interesohe**t edhe në vetë buxhetin që në një ose një tjetri ti takojë atij.

U përmend shumë që Kuvendi i Kosovës ka dhe duhet të ketë aftësinë e vet. Unë nuk e përjashtoj asnjëherë as tjetrën, sido që të jetë mendoj se këto janë motive politike, nuk duhet të jenë pengesë për vënien e rendit të rregullit në Kuvendin e Kosovës dhe në institucionet tjera. Ajo çka duhet të theksoj në këtë rast është tendenca për ta ndarë Kuvendin, po të gjitha institucionet tjera, përgjegjësinë politike prej përgjegjësisë penale apo juridike. Sa i përket përgjegjësisë juridike mendoj se me faza ka filluar dhe aty Kuvendi i Kosovës nuk ka asnjë kompetencë. Edhe sikur të dojë Kuvendi i Kosovës të ndërmer masa të caktuara, mendoj se gjyqësori në Kosovë është i pavarur dhe ne nuk kemi kompetenca që të ngatërrohemi apo të ngarkohemi me atë. Sa i përket përgjegjësisë juridike do të ja japë një përgjigje koleges sime për nga profesioni ministres Tërmkollli, se

përgjegjësia në kohën moderne është individuale edhe ajo nuk arsyetohet, as me veprimin e dikujt tjetër apo mos veprimin e dikujt tjetër, por secili përgjigjet për veprën e vet. Në anën tjetër në kohën moderne përgjegjësia apo supozimi për përgjegjësi një juristi nuk i lejohet, ajo konstatohet vetëm mbasi të merret nga organet kompetente dhe kryesore çka është zonja ministre Tërmkolli ka fuqinë e saj juridike, po e quaj si ministre që të bëjë veprime të tilla dhe po e përgëzoj zotin Krasniqi, që pati guximin qytetar, edhe si ish-ministër, intelektual edhe politik që t'ju ftojë juve të tjerëve që të zhvilloni aktivitete të ngjashme.

Sido që të jetë mendoj që, ajo që ishte kryesore që ju tentuat t'ia tregoni zotit Krasniqi, që është mirë të mos nxitet nga motivet politike, që edhe unë ju përgëzoj për këtë fjalim. Më vjen keq që, nëse në mënyrë tjetër ju nuk mund të largoheni nga motivet po i quaj ndoshta të një inati "personal".

Sido që të jetë nuk është qëllimi im këtu, qëllimi im është që Kuvendi i Kosovës t'i bëjë dy gjëra sot. E para do të jetë, mbështetja politike për veprime të tilla, në institucionet e Kosovës, dhe e dyta që të mbështesë formimin e komisionit i cili mbi të gjitha ka të bëjë jo me përgjegjësinë juridike, por me përgjegjësinë politike, të aktorëve të involvuar në këtë proces. Dhe krejt në fund t'ju them diç lidhur me fuqinë e votës.

Ne nuk jemi juristë dhe të tjerët mendojnë shpeshherë se argumenti i forcës, qoftë forcës fizike, apo politike ose tjetër, nuk duhet të jetë në dëm të fuqisë së argumenteve, në këtë drejtim, demokracia ndoshta mund të kuptohet më shumë si tendencë për të vënë vend në ligj dhe jo për ta penguar tendencën e tillë. Logjika politike apo logjika e shumicës, unë do ta parafrazoj pak po ndoshta edhe në kohën e, po e quaj kështu, të gozhdimit të Jesus Krishtit, ka qenë shumica, që ka menduar, por më vonë është pa që nuk është mirë.

Sido që të jetë duhet të them se ky debat dhe ky angazhim duhet të jenë më shumë angazhim dhe debat për vënien në rregull të rendit, angazhimit politik dhe juridik të Kuvendit, tregimin e përgjegjësisë dhe jo stigmatizimin e ndonjë individi apo ndonjë partie politike. Ju faleminderit!

KRYETARI I KUVENDIT – KOLË BERISHA

Ju faleminderit, fjalën e ka deputetja Melihate Tërmkolli,

MINISTRE MELIHATE TËRMGOLLI – Ju faleminderit zoti kryetar,

Kosova fatkeqësisht ka shumë juristë dhe pak juristë edhe unë nuk flas me presupozime, unë flas me argumente, ato argumente mund t'i gjeni në dokumentacionin e Kryesisë edhe të Parlamentit të Kosovës. Të gjitha atyre institucioneve në cilat janë dërguar ato argumente për shpërdorim të milionave të buxhetit të Kosovës, atyre taksapaguesve për të cilët sot derdhen lot krokodilit.

Dhe e dyta, se sa është i hapur zoti Krasniqi, këtë e keni në gjasë, parim diçka folni, tjetër gjë bëni, është parë edhe dje në emision sa është i hapur dhe sa është i gatshëm të ballafaqohet, kështu që nuk do të merrem me këto. Është çështje thjeshtë e juaja, nuk është rasti i parë, asnjëherë nuk ka qenë rasti i parë, fatkeqësisht jemi mësuar gjithë këto vite, që diçka tjetër flitni e diçka tjetër bëni.

Bëni turr kur vjen puna për me u ballafaqua, ikni. Ju ikni, kur doni me u ballafaqua jemi këtu,

KRYETARI I KUVENDIT – KOLË BERISHA

Ju faleminderit, urdhëroni zoti Krasniqi, replikë, keni një minutë!

DEPUTETI JAKUP KRASNIQI – Zoti kryetar!

Qe sa herë po lejoni keq shfrytëzimin e foltores, ne sot kemi në rend të ditës një pikë tepër të caktuar dhe ne duhet të flasim për atë pikë, për çështje tjera, kush ka ikë, e çka ka ikë, mendoj që opinioni e di mirë dhe unë nuk dua të flas për ato ikje, po vërtet duhet ta kërkojmë respektimin e rendit të ditës. Kush të dojë le të flas çka të donë, është në rend i ditës, e kemi një raport, le të bien raporte të tjera, na i diskutojmë dhe debatojmë edhe raportet e tjera.

KRYETARI I KUVENDIT – KOLË BERISHA

Ju faleminderit, zoti Kuçi

DEPUTETI HAJREDIN KUÇI- Falënderoj ministrin që pat kurajën që të më përgjigjet, unë e konsideroj veten jurist solid, po aq sa është edhe Ministria dhe mendoj që debatet e tilla mund ti vazhdojmë. Si do që të jetë mendoj që mund të koncentrohemi në rendin e ditës dhe faleminderit për shpjegimet.

KRYETARI I KUVENDIT – KOLË BERISHA

Ju faleminderit, urdhëroni zonja Gaxherri

DEPUTETJA BESA GAXHERRI – Ju faleminderit zoti kryetar, kolegë të nderuar.

Unë do të mundohem të mos i përsëris diskutimet e kolegëve të mi nga Grupi Parlamentar i LDK, por për opinionin më shumë se për kolegë këtu e dimë të gjithë se për çfarë arsye është kjo pikë e rendit të ditës. Unë dua të them se ne vërtet jemi për transparencë institucionale, por duke i respektuar procedurat dhe institucionet relevante për çështje të caktuara, pra institucionet të cilat i kemi ngritur vetë, se ky material a ka bazë për t'u diskutua, këtu nuk donë koment, sepse sidomos kolegët nga opozita, asnjëri nuk mund të shtojë më shumë se sa ato që kemi pasur nëpër gazeta. E kemi lexua dhe janë konsumua në tërësi, natyrisht edhe një herë po e them për hir të opinionit, ky material nuk është audit, sepse nuk ka rekomandime, sikurse auditet e tjera që dhe ta kenë parasysh kolegët e m deputetë se, ne Komisioni i Buxhetit nuk është se nuk kemi shqyrtua auditet e organizatave buxhetore të Kosovës. Komisioni i Buxhetit ka shqyrtua auditet e vitit 2004 e vitin 2006 dhe në ato auditime si Komisioni i Buxhetit, në të cilat komisione jemi të të gjitha partive politike, kemi parë se mbi 90% të atyre organizatave që është bërë auditimi, është bërë shkelja e ligjit për prokurim dhe ligjit për menaxhimin e financave publike. Dhe çfarë ka ndodhur, ne si Komision, do me thënë, me kënaqësi se kemi qenë të mirëkuptuar në atë drejtim, kemi dalë në terren dhe kemi shikua disa organizata buxhetore pse ka ndodhur kjo.

Dhe natyrisht se përgjigjja e gjitha këtyre organizatave buxhetore ka qenë se, nuk ka mundësi, sidomos të ligji i prokurimit, respektimi i afateve dhe njëkohësisht edhe të Ligjit për menaxhim të financave. Me këtë dua të them, se ne si deputetë kemi fillua të bëjmë ndryshimet e amendamentimit në këto dy ligje, është okej. Po pse pikërisht auditet e Kuvendit të Kosovës është i pari i cili futet në Kuvend në kohën e caktuar dhe me qëllimin e caktuar dhe me një material i cili nuk i përngjan asnjë auditet, të cilin e kemi

shqyrtua si komision, pra të vitit 2004. Këtu nuk duhet koment. Kjo temë është kryekëput politike dhe pasi është politike, ne po diskutojmë edhe po bëjmë politikë, po i bëjmë qefin njeri tjetrit.

Megjithatë, nuk është në rregull si deputetë, se kemi përgjegjësi të madhe, të flasim, të shprehemi dhe të luanim rolin edhe të akuzuesit, edhe të prokurorit, edhe të gjykatësit. Mua me të vërtetë, më vjen shumë keq nga kolegët e opozitës, që paraqitjet e tyre janë aq të ulëta, aq pa fakte dhe dua të them këtë:

Në qoftë se kolegët nga opozita kërkojnë komision hetimor për këtë çështje, unë kisha thënë se kemi çështje shumë më të rëndësishme, kisha thënë të formojmë komision hetimor për pasurinë, e prejardhjen e pasurisë të secilit deputet dhe të secilit person që është në institucionet e Kosovës, dhe e kisha thënë vetëm një gjë, ata të cilët e kanë iniciuar këtë pikë të rendit të ditës, siç janë Surroi, Thaqi, Krasniqi etj. unë i kisha kërkuar zotit Surroi të na japë përgjigje vetëm për 40 milionët e tij që ka deklaruar nga kanë prejardhjen e tyre dhe sa ka pagua tatim buxhetit të Kosovës për këtë shumë të cilën e posedon. Nuk e di në çfarë forme, qysh, ose zotit Thaqi, cili dikur para lufte e dimë që ka pasur një shtëpi diku në Drenicë, e sot nuk e di besoj as ai vet sa ka pasuri, ose zotit Krasniqi që nuk e di me çka ka ardhur prej Drenice, mbas lufte në Kosovë, me biçikletë, apo me çka, edhe sot nuk e di se sa pasuri ka. Ju lutem shumë, në qoftë se duam të hyjmë kështu të bëjmë komplet këtë temë politike, atëherë vërtet siç e tha kolegja ime, duhet të nisemi nga vetvetja secili dhe duhet të jemi shumë më korrekt, sepse kriminelit ose hajni nuk mund ta akuzojë hajnin kushtimisht. (ndërhyrje – kryetari i Kuvendit Kolë Berisha- t'i përmbahemi rendi të ditës ju lutem) – vazhdim, komplet jam në rendin e ditës zoti kryetar. Më vjen shumë keq, shumë keq dhe është shumë mëkat, kolegët e mi, marrin të drejtën t' quajnë institucionet krim i organizuar, pa asnjë fakt, pa asnjë dokument, kur ne si Kuvend i Kosovës i kemi ngritur institucionet adekuate për çështje të caktuara dhe unë mendoj se në këtë drejtim duhet të jemi shumë më korrekt, edhe shumë më në nivel, sepse këto gjëra nuk tolerohen. Ju faleminderit!

KRYETARI I KUVENDIT – KOLË BERISHA

Ju faleminderit! Fjalën e ka deputeti Xhavit Haliti, dhe pastaj do të marrim një pauzë,

DEPUTETI XHAVIT HALITI – Ju faleminderit zoti kryetar,

Unë së pari do të ndalesha tek përgjegjësitë e mia dhe të gjithë juve, së bashku që i kemi, së pari në miratimin e dokumentacionit bazë për të funksionuar ky Kuvend dhe përmes këtij dokumentacion realisht ne i kemi mundësuar ish- kryetarit të Kuvendit që të shkelë normat ligjore për menaxhimin e buxhetit, ose është keqpërdorur besimi i tij nga administrata e cila edhe sot u përdor këtu. Ai Neziri, që paska komunikua në emër të Kuvendit të Kosovës, unë besoj që ai nuk ka të drejtë me komunikua në emër të Kuvendit të Kosovës.

Dua të them që përfaqësuesit e Partisë Demokratike të Kosovës, në Kryesinë e Kuvendit, kanë ngritë çështjen e keq menaxhimit të buxhetit të Kosovës, nuk po them me qindra herë, por me dhjetëra herë dhe kjo nuk ka ardhur asnjëherë në shprehje. Unë krahas kërkesës së opozitës, në përgjithësi për të formuar komision për këtë çështje, së pari ose në kuadër të këtij Komisioni, që do të formohet, ose në një Komision të ri, kërkojë që të vërtetohet se si janë marrë vendimet për menaxhimin e Kuvendit të Kosovës. A është vendosë në Kryesinë e Kuvendit, e cila sipas Kornizës Kushtetuese, është e obliguar që të menaxhojë administratën dhe në përgjithësi Kuvendin.

Për ndonjë tender të shpallur nga Kuvendi i Kosovës, a është vendosë në Kryesinë e Kuvendit, për vilën Gërmia, a është vendosë në Kryesinë e Kuvendit, për modernizimin dhe rikonstruktimin e Kuvendit të Kosovës.

A është vendosë në Kryesinë e Kuvendit për shpalljen e tenderit dhe a është shqyrtuar ndonjëherë ky tender për vendosjen e elektronikës së Kuvendit të Kosovës.

A është vendosur në Kryesinë e Kuvendit për blerjen, ose shpalljen e tenderit, ose a ka pasur tender për shpalljen, e për blerjen e veturës së blinduar.

Kur them për blerjen e veturës po dëgjoj diskutime se kryetari i Kuvendit duhet të ketë veturë, është shumë e vërtetë, por është edhe një e vërtetë e madhe se, kryetari i Kuvendit ka pasur një veturë luksoze, mercedes, në dispozicion dhe një gjip, po ashtu luksoz mercedes, të cilin e ka përdorë dhe gjithë parkun e automjeteve e pasë të Kuvendit në dispozicion sa herë ka dashtë me shfrytëzua. d.m.th. nuk ka qenë pa makinë.

Problemi është i shfrytëzimit të buxhetit të Kosovës, a është shfrytëzuar ky buxhet i Kuvendit, konform ligjit apo jo. Ne kemi pas një kërkesë në Kuvendin e Kosovës, si grup parlamentar që, konform Kornizës Kushtetuese, të mos ketë buxhet për kryetarin e Kuvendit të Kosovës, sepse ai nuk është organ i cili vendos, por të ketë buxhet për Kryesinë e Kuvendit të Kosovës. Kjo kërkesë nuk ka ardhur në shprehje.

Në vitin e kaluar, Grupi Parlamentar i Partisë Demokratike të Kosovës ka bërë një ankesë edhe te PSSP-ja, për ta rishqyrtuar vendimin ose votimin e këtij farë lloji buxheti dhe prapë nuk është refuzua. Gjatë këtij viti është miratua më në rregull, që buxhetin e Kuvendit të Kosovës ta menaxhojë Kryesia e Kuvendit të Kosovës, prandaj, unë mendoj se duhet t'u japim fund spekulimeve të vendimeve në emër të Kryesisë, sepse Kryesia asnjëherë dhe në asnjë një rast nuk ka marrë pjesë në vendimmarrjen për shpalljen e asnjë tenderi në Kuvendin e Kosovës. Kryesia ka marrë vendime në dy tri raste kur nuk ka pasur tender, e kjo ka qenë për t'i blerë ose zahiretë e deputetëve, të administratës të Kuvendit edhe këtë vit, por për këtë vit nuk është miratuar nga Ministria e Financave e cila është mbështetur në Ligjin përkatës dhe nuk e ka lëshuar kërkesën ose nuk e kanë miratuar kërkesën e Kuvendit të Kosovës. Prandaj, do të thosha që, duke mbështetur kërkesën për formimin e një komisioni hetimor jo për ta linçuar dike, por për t'i konstatuar shkeljet e mundshme të bëra dhe unë nuk do ta konstatoja, nuk do të pajtohesha me disa që po thonë nuk është ky far auditimi nuk është kompetent, sepse unë mendoj që bile ky është kompetent dhe ky nuk ka asnjë çështje politike brenda tij. Unë nuk e besoj se këta që e kanë bërë këtë janë të partisë as Demokratike, as të Lidhjes Demokratike, por janë profesionistë dhe kanë konstatuar shkelje të njëpasnjëshme dhe tani hajde t'i harmonizojë këto shkelje me kompetencat që janë brendapërbrenda Kuvendit të Kosovës, që to të thotë a është ndjekë procedura e vendimmarrjes sipas ligjit dhe në fund do t'ju kërkoja edhe një herë: Rregullorja e Kuvendit nuk është bërë për Kuvendin e Kosovës, Rregullorja e Kuvendit është bërë për Kryetarin e Kuvendit të Kosovës, prandaj në qoftë se duam me e bërë këtë Kuvend funksional, në qoftë se duam mos me pas përplasje dhe inatosje me njeri tjetrin, hajde të miratojmë rregulla të sakta konform kuvendeve të demokracisë qysh funksionojnë me mundësinë, me lënien e mundësisë opozitës për të ngritur çështje të cilat pajtohem plotësisht se janë politike se të tillë jemi edhe ne këtu, prej politikës kemi ardhur. Ju faleminderit!

KRYETARI I KUVENDIT KOLË BERISHA – Ju faleminderit! Pauze deri ne orën 15.

KRYETARI I KUVENDIT KOLË BERISHA – Ju lutemi të fillojmë me punë. Ftoj deputeten Nekibe Kelmendin ta marrë fjalën.

DEPUTETJA NEKIBE KELMENDI - Të nderuar deputetë, mos ma merrni minutat, uluni nëpër vendet tuaja. I nderuari kryetar. Urdhëroni

KRYTARI – T’ju njoftoj, në sallë marrin pjesë 67 deputetë momentalisht, urdhëroni

DEPUTETJA NEKIBE KELMENDI – I nderuari kryetar i Parlamentit, të nderuar deputetë, ministra nuk po shoh prej së largu, prej se largu po ju çoj selam. Diskutimi im lidhur me këtë pikë të rendit të ditës do të jetë i përgjithësuar, që do të thotë se në diskutimin tim nuk do të lëshohem fare në komentimin e fakteve të cekura në raportin e Zyrës së auditimit gjeneral për të gjeturat faktike në Kuvendin e Kosovës, sepse faktet janë fakte dhe ato në rastin konkret ndërliidhen me mënyrën e menaxhimit të Buxhetit të Kuvendit të Kosovës për të cilin dihet mirëfilli se është miratuar nga ky Kuvend. Raporti të cilin e kemi para veti përmban të gjitha të gjeturat faktike lidhur me menaxhimin e Buxhetit të Kuvendit të Kosovës. Unë, pa dashur që ta kontestoj gjendjen faktike të gjetur në raportin në fjalë, diskutimin tim dëshiroj ta orientoj në një kah tjetër. Fjala është për atë se secila organizatë buxhetore shpenzon ato mjete buxhetore të cilat i janë ndarë me Ligjin për Buxhet. Duke u nisur nga kjo rrethanë, mendoj se mjetet buxhetore të Kuvendit të Kosovës assesi nuk mund të shpenzohen për destinime të tjera, siç po pretendohet nga disa deputetë, siç është fjala për çështje sociale, arsimore, shëndetësore, pensione, ndreqje shtëpish e tjera, pavarësisht nga fakti se këto mjete janë menaxhuar mirë apo keq, së këndejmi ma merr mendja se disa deputetë gjatë këtij debati për të bërë marketing politik nuk po përqendrohen fare në pohimin apo mohimin e fakteve të gjetura në raport, por duke dalë nga korniza e këtij raporti po bëjmë llogari se sa pensione të premtuara do të mund të paguheshin, sa shtëpi do të mund të ndërtoheshin dhe sa probleme të tjera sociale do të mund të zgjidheshin me mjetet për të cilat thuhet se janë keq menaxhuar. Pra, jam e bindur se të gjithë deputetët e dinë se përdorimi i mjeteve të Buxhetit të Kuvendit të Kosovës për çështjet të cilat deputetët i cekën gjatë debatit për raportin, gjithashtu paraqesin keq menaxhim të Buxhetit në fjalë nëse do të ishin përdorur për qëllime të cilat u përmenden. Prandaj, po qe se duam të japim kontributin tonë lidhur me mënyrën e menaxhimit të mjeteve të buxhetit të Kuvendit të Kosovës, gjatë këtij debati duhet të përqendrohemi vetëm me faktet e cekura në raport dhe ato t’i komentojmë në frymën e menaxhimit të mirë apo të keq menaxhimit, e jo të bëjmë marketing politik në llogari të gjendjes së rëndë ekonomike e sociale të një pjese të madhe të popullatës kosovare.

Si përfundim unë nuk e kontestoj të drejtën e askujt që të debatoj në këtë Kuvend lidhur me raportin e auditorit, por përcaktohem për atë që gjatë debatit të mos dalim nga korniza e raportit, dhe që të mos i hedhim pluhur syve popullatës sonë se me mjetet e Buxhetit të Kuvendit të Kosovës kanë mund të zgjidhen çështjet e përmendura më sipër. Ju faleminderit!

KRYETARI I KUVENDIT KOLË BERISHA – Ju faleminderit! Ju lutem nuk është përmendur emri. Urdhëroni zonjë

DEPUTETJA SELVIJE HALIMI - Ju faleminderit z. kryetar! E nderuara kolege, keni të drejtë në atë që thoni se nuk kanë mundur të zgjidhen çështjet sociale, mirëpo unë gjatë diskutimit tim e kam përmendur. Nëse këto mjete kanë qenë tepër, kanë mundur të shkojnë në ministrinë përkatëse për ndihmën e rasteve sociale e jo të shpenzohen sipas tekeve të individit, sepse asnjë projekt dhe asnjë ligj nuk i jep të drejtë askujt të blejë tesha 1000 euro në vlerë e mjetet e kuzhinës, losione e çokollata e jo marketing politik, por gjetjet faktike kanë treguar këtë, edhe unë kam bërë krahasim. Ju faleminderit!

JKRYETARI I KUVENDIT KOLË BERISHA – Ju faleminderit! Fjalën e ka deputeti Behxhet Brajshori, le te përgatitet deputeti Ymer Halimi

DEPUTETI BEHXHET BRAJSHORI – Ju faleminderit z. kryetar! Të nderuar kolegë deputetë. Jam i bindur se për temën për cilën po bisedojmë sot, të gjithë jemi të interesuar që të nxjerrim diçka nga debati dhe jo ndoshta vetëm sa për debatuar dhe për të kaluar mbi çështjen, sepse të gjithë jemi të interesuar që në Kosovë vërtet të kemi një qasje profesionale dhe të bazuar në ligj sa i përket menaxhimit të financave publike në përgjithësi nëpër agjencionet tona shpenzuese. Andaj që në fillim ndoshta mund të shtrohet pyetja se cili është qëllimi i debatit të sotëm, pa dyshim është angazhimi ynë dhe i të gjithëve që në Kosovë të vihet ligjshmëria dhe natyrisht në mbrojtje të ligjshmërisë. Sa i përket raportit të auditorit gjeneral ose gjetja faktike siç janë të thëna në raport, marrë nga aspekti profesional mendoj se janë tri të meta të raportit kryesor, tri të meta kryesore. E para, ka të bëjë se Raporti nuk përfshinë intervistat e menaxhmentit, e dyta ka të bëjë me faktin se nuk janë rekomandimet se çka duhet të bëjë agjencioni shpenzues, në këtë rast menaxhmenti dhe e treta nuk i kemi komentet e vetë menaxhmentit, mirëpo janë të çështjet që vet kështu është përcaktuar auditori gjeneral për të gjetur raport, për gjetjet faktike dhe jo raport i auditorit gjeneral. Sido që të jetë, çka në të vërtetë ka brenda këtij raporti të gjetjeve faktike. Nëse shikojmë pozicionin për pozicion mund të konstatohet se ka pasur vend për një menaxhim më të suksesshëm në përgjithësi dhe një kujdesje më të madhe. Askush nuk mund të i shfrytëzojë mjetet buxhetore nëse nuk ka një bazë rregullatore që atij t'i jep të drejtën për t'i shfrytëzuar për destinime të tjera jashtë asaj për çka që në fillim të vitit lejohet buxheti për agjencionet shpenzuese. Në këtë drejtim ka se çka të ndodhë dhe ka se çka të thuhet edhe në kuadër të gjetjeve politike, gjetja faktike e raportit, treta: të cilat janë efektet politike. Unë nuk do të doja këtu që as brenda subjekteve politike as në mes të subjekteve politik, ky raport tani të përdoret për efekte politike të njërit, të dytit apo të tretit. Të gjithë jemi të interesuar që ta vemi një stabilitet financiar menaxhues në përgjithësi në Kosovë, të kemi një qëndrueshmëri buxhetore dhe të gjithë ne jemi shumë të interesuar në këtë drejtim që të konstatojmë, të verifikojmë dhe të rekomandojmë hapat e mëtejshëm se çka duhet bërë në këtë drejtim për të përmirësuar në përgjithësi menaxhimin, jo vetëm në Kuvendin e Kosovës, por në përgjithësi në të gjitha institucionet e vendit tonë, ato që shfrytëzojnë mjetet e Buxhetit të konsoliduar të Kosovës. Dhe pse jo, nëse në të ardhmen kërkohet. Që të kemi mundësi dhe transparencë më të madhe për një lidhshmëri në shfrytëzimin e mjeteve në kuptimin dhe destinimin e bërë, dhe për të arritë efekte edhe më të mëdha, të kemi një transparencë

edhe në formën e angazhimeve të veçanta, do të thosha në kuadër të Kuvendit të Kosovës qoftë komisioneve të ndryshme ose Komisioni për Buxhet dhe Financa, Komision i cili është shumë i thirrur që të merret me mbikëqyrjen e shfrytëzimit të mjeteve të Buxhetit të konsoliduar të Kosovës me qëllim që vërtet ato të jenë shumë efektive. Unë do të ftoja kolegët e mi deputetë qoftë të opozitës që me angazhimet tona vërtetë të bëjmë këtë qasje dhe mos të shfrytëzohet në një ose formën tjetër sepse nuk kemi qëllim tjetër përveç një angazhimit të përbashkët për të krijuar një sistem të financave sa ma të qëndrueshëm dhe këtë buxhet edhe ashtu vështirë po e krijojmë, ta shfrytëzojmë për destinime të cilat të gjitha agjencionet shpenzuese që në fillim të vitit e përcaktojnë. Ju faleminderit z. kryetar!

KRYETARI I KUVENDIT KOLË BERISHA- Ju faleminderit! fjalën e ka Ymer Halimi. Le të pergatitet deputeti Bajrush Xhemajli

DEPUTETI YMER HALIMI – Z. Kryetar, të nderuar deputetë! Nuk do të merrem me fakte për shkak se janë fakte, por për shkaqe që i sollën faktet dhe pasojat e tyre. Ju lutem faktet që i kemi faktet para veti janë fakte që e shqetësojnë dhe thënë të vërtetën akuzojnë. Si është lejuar ky keqpërdorim në një kohë kaq të gjatë në një institucion kaq të rëndësishëm, edhe pse era e këtij keqpërdorimi ndihet në korridoret e Kuvendit. Arsyeja e thjeshtë individit në funksion shteti mbi pushtetin e ligjit. Kjo prire e individit është parë në seancën e parë të legjislativit të pasluftës. Nëse duam të vërtetën, nëse jemi të vëmendshëm se po formojmë shtet duhet ngritur institucionet e përgjegjësishë në nivel, të veprojnë në parim. Askush mbi ligjin, ligjit t'i japim forcën veprimit, kjo është demokracia, kjo është detyra parësore e këtij Kuvendit.

Mjerisht, në këtë fazë që po e lëmë pas, ligji kishte veprim episodik dhe **anizotrop**. Kjo është më e rënda një shtet kudo dhe nisur nga kjo sot, mund të konstatojmë se në Kosovë kemi një, në funksion një demokraci liberale me elemente anarkie. Saktësia, ministri Fatmir Rexhepi në materialin e dorëzuar seancë më parë thotë: kemi në rritje krimin e organizuar dhe pengimin e ligjit, prandaj ligjin e pengojnë njerëzit e pushtetit e jo njerëzit e rëndomtë. Krimi i organizuar ka gati përherë një firmë në pushtet. Deputetët të nderuar, para një viti e gjysmë në këtë Kuvend e pata thënë: mendoj se gjyqësia është dashtë e duhej që të jetë më efikase, se prokurorët nuk arritën ose nuk kanë guxim për të bërë akuza me fakte kundër individëve të caktuar, kjo është shqetësuese, sepse korrupsioni mund të vihet mbi kontrollin e shtetit dhe kjo dekomponon normat dhe vlerat demokratike. Këtë e keni në transkript.

Ju lutem sa është vënë korrupsioni mbi kontrollin e shtetit sot, dhe në çfarë shkalle është dekompozimi i demokracisë sot tek ne? Këtyre duhet t'u përgjigjet sakët ky Kuvend. Këto kanë ndodhur dhe shumë e dhimbshme është për demokracinë tonë të re. Prandaj, më lejoni që këtë ta argumentoj në krahasim me faktet e revizionet që janë bërë në strukturat e shtetit dhe kompani të ndryshme, nga revizionet e ndryshme të publikuara, për shembull në Presidencë, Kuvend, Kryeministri, Ministri, në PTK, Aeroport, Spital, Universitet, kuvende komunale, tek organizatat e ndihmave humanitare e mos të flasim për ato vende ku nuk guxojmë të bëjmë revizion si është AKM-ja e privatizimi. Për shumicën e këtyre revizioneve e keni materien me përmbajtje të përafërt me këto fakte që i keni sot në Kuvend. Këto revizione zbuluan diçka të rëndësishme, priren e papërmbajtur për grabitjen e pasurisë së shtetit nga vendor dhe disa ndërkombëtar, prires për grabitje nuk i shpëtuan akademik, politikan, profesor universiteti, ministra, biznesmen, njerëz të pozitës e të opozitës, por edhe disa të tjerë

shumë të vlefshëm. Po qe se këtë fenomen të kësaj prirje për grabitje të pasurisë dhe të korrupsionit që është në rritje, i cili mendoj se ende mund të sundohet ky Kuvend nuk ndërmerr masa për ta luftuar fuqishëm, qysh në këtë fazë të para statusit, pas statusit vështirësitë për t'i prerë rëniet e ngulitura ju them sinqerisht do të jenë shumë më të mëdha. Për këtë duhet të kërkojmë ndihmën e miqve tanë, e ne të kemi vendosmëri. Ju faleminderit për vëmendje!

KRYETARI I KUVENDIT KOLË BERISHA- Ju faleminderit! fjalën e ka deputeti Bajrush Xhemajli, le të përgatitet deputeti Nait Hasani

DEPUTETI BAJRUSH XHEMAJLI - Ju faleminderit z. Kryetar, përshëndetje për ju të nderuar kolegë deputetë, për mua është për tu merakosur për disa kolegë deputetë të cilët ende v vejnë në dilemë se a është shkelur ligji dhe a ka vend për vepër penale për veprimet që paraqiten në auditim. Unë i kuptoj motivet e disave këtu, por këtë askush nuk do të duhej ta vinte në dyshim. Nuk nevojitet ndonjë njohuri e madhe juridike për të ditur se a janë këto vepra penale apo jo, dhe njerëzit edhe me aftësi nën mesatare për këtë çështje dhe me njohuri nën mesatare sigurisht që do të vijë në përfundim që këto janë vërtet krime ordinere. Së paku unë nuk i vë në dyshim aspak se këto shkelje janë vepra të rënda penale. Unë vë në dyshim diçka krejt tjetër, a thua për këto vepra penale të padiskutueshme, a do të shkojnë procedurat penale deri në fund, vërtetë në këtë rast prokuroria, gjyqësia apo për të thënë në përgjithësi gjyqësori i Kosovës a do të jetë i pavarur? Gjykuar mbi atë deri me sot se si ka vepruar ky gjyqësor, vërtetë unë që në fillim jam i shqetësuar se këtu, kur për çështje shumë të imëta ka presione shumë të mëdha, merre me mend për një çështje kaq të madhe dhe kaq ka goditur se sa do të ketë barriera. Këtë e përforcon edhe fakti që për të dalë për rend dite këtu në këtë Kuvend, sa pengesa është bërë e lere më për t'u gjykuar një rast i tillë. Unë e përkrahu formimin e Komisionit që do të ngritet këtu, komisionit hetimor dhe besoj se ka shumë punë dhe do të qesë në shesh edhe fakte të tjera. Besoj se do ta sqaroj edhe një të thënë publike nga z. Pacolli se ai e paska dhënë një milion e gjashqind mijë euro për ndërtimin e Kuvendit e gjoja ai paska dhënë prej xhepit të tij. Ne së paku publikisht e dimë se z. Pacolli nuk i ka dhënë prej xhepit të vet, por janë dhënë nga Buxheti i konsoliduar i Kosovës dhe ky grup, ky Komision hetimor sigurisht që do të na e sqarojë këtë çështje, sepse, nëse nuk janë dhënë nga Buxheti i konsoliduar i Kosovës atëherë ku shkuan paratë që është thënë se kanë shkuar nga Buxheti i konsoliduar Kosovës. Besoj se shumë e shumë çështje do të sqarohen prandaj unë e përkrah dhe natyrisht apeloj që çështja të shkojë deri në fund edhe në aspektin gjyqësor. Ju faleminderit!

KRYETARI I KUVENDIT KOLË BERISHA – Ju faleminderit! fjalën e ka Nait Hasani, le të përgatitet Sala Ahmetaj

DEPUTETI NAIT HASANI - I nderuari kryetar, u tha shumë për raportin e auditimit. Për mua është mjaft shqetësuese, po shoh që për disa kolegë këtu nuk është shqetësuese të thuhet se janë keqpërdorë 1 milion e gjysmë euro dhe ne e kemi gjendjen sociale në mjerim, kemi punëtorët shëndetësorë në grevë pikërisht sot për rritjen e pagave, kemi pensionet, kemi familje të ndryshme të cilat janë raste që kanë nevojë, ndërsa e lexojmë dhe e shohim pikërisht këtë raportin e auditimit. Shohim se personat zyrtarë pranë këtij institucioni më të lartë, institucionit të Kosovës, shpenzimet i kanë

bërë edhe në Prishtinë për pagesat e taksave, për pagesat e ushqimit, për pagesat e veshjeve e tjera e tjera. A është trishtuese për shembull një mësues ose një arsimtar dhe një mjek rropaten rrugëve dhe tërë ditën mbajnë mësim me nxënësit dhe ata me një pagë minimale, ndërsa ne bëjmë shpenzime ose ky institucion bën shpenzime të papërgjegjshme ose të gjykueshme. Për mua është me rëndësi që ky debat ta japë vlerësimin e vet, që të formohet ai komision hetues i cili do t'i nxjerrë të gjitha të palarat në shesh dhe të gjykohet për ato vepra, të cilat i kanë keqpërdorur personat. Ne jemi që të zbatohet ligji pikërisht për të gjithë, sepse jemi institucion ligjvënës dhe si institucion ligjvënës ne duhet ta zbatojmë ligjin për të gjithë, prandaj shkeljet e këtushme tregojnë se ka shkelje të shumta ligjore. Për këtë kërkoj të krijohet një komision i drejtuar po ashtu nga opozita dhe si komision i tillë ta japë përgjegjësinë secili individ, prandaj këto shkelje dëshmojnë një gjë të tillë, unë pajtohem që ky Komision ta japë fjalën e vet. Ju faleminderit!

KRYETARI I KUVENDIT KOLË BERISHA – Ju faleminderit! Fjalën e ka deputetja Sala Ahmetaj, le të përgatitet deputeti Sokol Bashota

DEPUTETJA SALA AHMETAJ – I nderuari kryetar i Kuvendit, të nderuar kolegë deputetë. Unë nuk do të ndalem konkretisht në materialin që e kemi përpara, do t'i shtroj disa çështje tjera që janë të një natyre të përgjithshme. Kosova tani është në fazën përmbyllëse të përmbylljes së aspiratës shumëvjeçare të popullit të saj, por ne jemi të vetëdijshëm se pavarësia dhe sovraniteti nuk janë qëllimi ynë final. Ne duam që Kosova të jetë e integruar në strukturat euroatlantike dhe në familjen evropiane. Në këtë kontest aq sa është e rëndësishme pavarësia politike po aq është i rëndësishëm edhe pavarësimi nga korrupsioni, për fat të mirë pavarësimi nga korrupsioni, nga papërgjegjësia dhe nga indiferentizmi nuk varen as nga Këshilli i Sigurimit të OKB-së e as nga Grupi i Kontaktit, por kjo varet pikërisht prej nesh, nga ndërgjegjja dhe nga puna jonë. Pas shumë sakrificash nuk kemi privilegjin ta ndërtojmë shtetin e Kosovës nga themelet, ua kemi për borxh këtë gjeneratave që na sollën këtu dhe ua kemi borxh edhe fëmijëve tanë që shtetin e Kosovës ta ndërtojmë mbi themelet e shëndosha e jo mbi krimin dhe mbi korrupsionin. Ne duhet sot, që të distancohemi nga këto keqpërdorime, të cilat janë të pranishme në të gjitha institucionet e Kosovës dhe ta bëjmë këtë jo vetëm verbalisht, por edhe duke ndërtuar mekanizmat përkatës për t'i luftuar këto dukuri, për të luftuar korrupsionin dhe për t'u përpjekur që ta përfillim ligjin.

Të nderuar deputetë! Për fat të keq shkelja e ligjit sot nuk është lajm, por është përditshmëri. Për të qenë e keqja më e madhe shpesh kërkohet që të heshtet keqeverisja dhe keqpërdorimet në emër të statusit duke fshehur mospunën edhe papërgjegjshmërinë në emër të idealeve të mëdha, prandaj Kosova sot më shumë se nga çdo gjë tjetër rrezikohet nga vetvetja, rrezikohet prej nesh dhe nga legjitimimi që u bëjmë dukurive të këqija. Unë luftoj që të reflektojmë dhe të bashkohemi në këtë pikë. E ardhmja evropiane e fëmijëve tanë nuk duhet të rrezikohet nga kapricet banale të asnjë udhëheqësi të institucioneve të Kosovës. Ne si opozitë do të jemi nismëtarë dhe pjesëmarrës në çdo betejë kundër këtyre dukurive, por assesi as sot e as nesër nuk do të lejojë që Kosova të shndërrohet në një vend mafioz, ku krimi dhe korrupsioni janë pjesë e institucioneve. Unë besoj që ky debat duhet të shënojë vetëm fillimin e një lufte kundër korrupsionit, me qëllim që institucionet e Kosovës t'i bëjmë funksionale dhe të përgjegjshme. Presim

të kemi mbështetjen tuaj, sepse këtë ua kemi borxh fëmijëve tanë dhe popullit të Kosovës. Ju faleminderit!

KRYETARI I KUVENDIT KOLË BERISHA- Ju faleminderit! Fjalën e ka Sokol Bashota, le të përgatitet deputeti Genc Gorani

DEPUTETI SOKOL BASHOTA- Ju faleminderit z. kryetar, Ju z. kryetar në fillim bëtë thirrje për kujdes në shprehje dhe unë u pajtova, por jemi para dilemës se nuk di a bëmë far shkelje nëse i themi hajnisë është hajni dhe atyre që vjedhin hajna. Me lejoni t'ua kujtoj një bashkëbisedim me një të moshuar,, i çili nga kureshtja duke përcjell Kuvendin kishte hasur shpesh fjalën korrupsion, tha : Axhë më është dashur shumë veta t'i pyes për të mësuar se ajo fjalë qenka hajni," dhe pikërisht për këtë hajni opozita ka ngritur zërin disa here në këtë Parlament vetëm e vetëm për të ruajtur djersën e tatimpaguesve të cilët nga kafshata e tyre, të cilën ka të atillë që herë e kanë e herë e më shumë nuk e kanë, ndajnë pjesën e tyre që u takon për t'i paguar obligimet që kanë përball shtetit. E kjo përpjekja jonë ka hasur në vesh të shurdhër të hajnave qeveritare. Në fillim u sqarua se nuk kemi dhënë asnjë cent për këtë dokument ose për këtë raport të auditimit Unë mendoj se ky Kuvend atyre që i kanë dhënë këto mjete për këtë auditim i kanë borxh t'ua kthejnë ato 24.500 plus këtë TVSH-në prej 5.500 euro, gjithsej 30.000 euro për të vetmen arsye se ato janë shpenzuar në interes të qytetarëve të Kosovës se kanë nxjerrë në shesh hajninë qeveritare. Përpjekja e atyre që me mizë mbas veshi, sot në këtë Kuvend u përpoqën që ta zhvendosin vëmendjen nga rendi i ditës, e jep mesazhin e qartë . Nuk është këtu por, Ministri i Shërbimeve Publike zbrazti një kallaballëk fjalësh për kohën e udhëheqjes së Ministrisë nga z. Jakup Krasniqi, dhe denjësisht konfirmoi atë që tha se hajni thotë "kapne hajnin," por në këtë rast ka ndryshuar vetëm gjinia e hajnit.

Unë kam një pyetje për pozitën në këtë rast, e njihni si valid këtë auditim apo jo denoncoheni ju nga qindra mijëra euro që dikujt i kanë krijuar një komoditet jetësor të një pashaje apo jo? Këtë duhet ta sqaroni para këtij Kuvendi dhe para opinionit të gjerë. Ju faleminderit!

KRYETARI I KUVENDIT KOLË BERISHA- Ju faleminderit! Fjalën e ka deputeti Genc Gorani, le të përgatitet deputetja Samije Zeqiraj

DEPUTETI GENC GORANI – Ju faleminderit z. kryetar! Zonja dhe zotërinj deputetë. Mbas shumë kohe jemi dëshmitarë se kemi ardhur deri te një moment kur po na lejohet të debatojmë për të gjeturat faktike, të cilat si fakte i kemi njohur për një kohë të gjatë. Unë nuk do të ndalem mbi ato tema dhe fjalët të cilat janë përsëritur që besoj se vlejné shumë për të ardhmen e punës së këtij Kuvendi dhe të përdorimit korrekt të buxhetit. Kisha dashur të konstatoj para jush se hapja e çështjes së keqpërdorimit të buxhetit të Kuvendit tani është më tepër pasojë e vonesës së qëllimshme e përkrahjes së atyre që kanë dashur këtë pikë të mos e shohin këtu dhe e refuzimit të atyre të cilët kanë qenë aktorë të këtyre gjetjeve faktike. Mua më befason, por ndoshta pse jam kartezian në natyrë,më befason megjithatë se si kolegë deputetë mundohen ta relativizojné në gjë që është gjetje faktike. Ato fakte nuk them se duhet të përdoren për marketing politik, mirëpo të vihen në kontest real. Ka shumë të meta të rënda, por një prej të metave më të rënda të këtij lloji keqpërdorimi është sepse është bërë beinificion personal. Është bërë

nga personeli që gjenerata e parë e këtij Kuvendi, personeli civil dhe është bërë po ashtu nga figurat e larta politike që faktikisht kanë mundur ta shfrytëzojnë këtë si një ndërtim shembullor të funksionimit të këtij institucioni politik. Janë përmendur dy dokumente në mënyrë direkte ose indirekte nga një kolege deputete. Është përmendur se ardhja deri në këtë pikë i ka tejkaluar disa trupa siç është Komisioni për Buxhet. Para meje është dokumenti shkresë i dt. 6 dhjetor edhe nga Komisioni për Buxhet dhe Financa në adresë të Kryesisë së Kuvendit të Kosovës, ku në mes të tre rekomandimeve, rekomandimi i tretë thotë se Kryesia në kuadër të autorizimeve të veta, duhet ta autorizojë sekretarin e Kuvendit që t'i ndërmarrë të gjitha masat e domosdoshme ndaj atyre të cilët i kanë shkelur procedurat në pajtim me ligjin për shërbyesit civilë Pra, në punën e Komisionit auditori gjeneral të mos merret me pikat 1, 3 dhe komplet pika 4, të cilat janë të parapara në procedurën e auditimit, e pikërisht këto pika kanë të bëjnë me të gjeturat faktike. Të mos e përmend gjuhën jashtëzakonisht jo normale ku thuhet në këtë dokument, flitet për një propagandë të nxitur kinse keq menaxhimin, prejudikohen sendet nga një shërbyes civil, kjo nuk është aspak në rregull. Për në fund, kisha dashur të them se mendimi im është, ndjenja ime është se jemi në një udhëkryq, ndonëse nuk është shumë i madh në krahasim me udhëkryqin kryesor që kemi të bëjmë me procesin e pavarësimit të vendit tonë, po ky udhëkryq është qendror në funksionimin e këtij Kuvendi. Një prej fjalëve që shpesh e kemi dëgjuar në këtë kohë është test demokratik e pra ky është ai test demokratik, po ashtu për këtë Kuvend edhe shpresoj se do ta kalojmë me sukses. E përkrah plotësisht themelimin e Komisionit për hetime dhe shpresoj se ky komision do ta ketë gjithë sovranitetin e duhur që apriori e ka. Ju faleminderit!

KRYETARI I KUVENDIT KOLË BERISHA – Ju faleminderit! Fjalën e ka deputetja Samije Zeqiraj, le te përgatitet deputeti Ylber Hysa

DEPUTETJA SAMIJE ZEQRIRAJ - Ju faleminderit z. Kryetar! Unë çka pata ndërmend të them shumë çka u përsërit këtu edhe nuk dua ta përsëris prapë, nuk do t'i lodhi deputetë se kam respekt ndaj kohës së tyre se vërtet jemi lodhë të gjithë dhe këto tema disi po krijojnë tensione të mëdha dhe në një formë po shkaktojnë përçarje të mëdha. Unë kam pasur dëshirë që këtë Parlament ta shfrytëzojmë për gjërat për çka jemi të thirrur, jemi të thirrur për të bërë ligje dhe për ta bërë shtetin e Kosovës, normalisht për t'i bërë edhe të gjitha ato ligje bazike të cilat për fat të keq nuk i ka ende shteti ynë, sidomos në lëmin, në fushën e sigurisë dhe në fushën e drejtësisë, që nuk janë ligjet bazike mbi të cilat sigurisht do të vepronin strukturat e kësaj fushe. Mirëpo më dhemb shpirti se Parlamenti i Kosovës shpeshherë bëhet hajt-pak e kjo është shumë e dëmshme se asnjëherë parlamenti nuk guxon të bëhet gjykatës e as deputeti po e zëmë, Parlamenti nuk guxon të bëhet gjykatore e as deputeti prokuror ose hetues. Derisa ne nuk e kuptojmë secili rolin e vet sigurisht se do të kemi probleme të mëdha.

Unë, mendoj se lënda kurrë nuk vjetrohët e sidomos lënda për keqpërdorime të ndryshme ose për krime të ndryshme që kanë ndodhur edhe që ende miqtë tanë ndërkombëtar nuk na kanë ndihmuar që t'i zbardhim ato dhe që një ditë t'ua shëndoshim zemrën të gjitha atyre që i kanë humbur më të dashurit e tyre, e sigurisht të gjitha vrasjet kanë qenë me motive politike e që kjo hakmarrje politike nuk është e sotme as e djeshme, por është e paraluftës, gjatë luftës, pas luftës e po vazhdon edhe më tutje. Unë, mendoj se ky Parlament edhe populli shqiptar në përgjithësi duhet të ketë një unitet, një unitet të mirëfilltë se ajo na nevojitet për ta bërë shtetin e Kosovës e këto

çështje që sot qiten ad-hoc në Parlament mund t'i qesim edhe mund t'i shtrojmë kur të duam, sepse këto janë gjëra të rënda që asnjëherë nuk vjetërsohen. Mendoj se të gjitha këto situata që po krijohen para ngritjes kur situata e Kosovës po ngritet në një nivel më të lartë, zgjidhja e saj, hidhet një temë që të hiqet vëmendja e popullit prej realitetit tonë. Ne jemi të thirrur këtu për ta bërë shtetin e mendoj se ma mirë do të ishte që kahjen e tehut ta orientojmë nga bërja e shtetit e më vonë mund t'i bëjmë të gjitha këto punë. Unë mendoj se dukuri negative ka plot, nuk janë vetëm këto sot që po trajtojmë këtu, ka pasur edhe populli i di të gjithë ata profiterë të luftës që janë pasuruar brenda natës edhe normalisht edhe ata që kanë keqpërdorur pasurinë shoqërore, sidomos ndërtimin e shtëpive në oborrin e Fakultetit, janë bars për mua sikurse kisha që është me karakter politik aty. Do me thënë të gjitha këto ngjarje kanë karakter politik edhe shkaktojnë trazira të mëdha në popull, e që besoj se nëse dikush e hedh një gacë edhe e nhez zjarrin, dikush do ta mbajë këtë përgjegjësi. Kosovës i nevojitet shumë pak për të eskaluar situata, prandaj jam për ta ruajtur një unitet për mos hapur këso problemesh dhe këso pyetjesh, e këto t'i lëmë pas pavarësisë – drejtësisë organeve të drejtësisë. Ju faleminderit!

KRYETARI I KUVENDIT KOLË BERISHA- Ju faleminderit! z.Hysa jeni tërhequr, urdhëro, një kohë mungoi emri yt këtu

DEPUTETI YLMBER HYSA – Ju faleminderit shumë! Kolegë të nderuar më duket që sot më së shumti kemi politizuar me politizimin dhe besoj që e kemi keqpërdorur mjaft atë. Nëse për vikend ka dilema cili është motivi real i ngritjes së këtij problemi, atëherë besoj që duhet të fillojmë nga ato pika që na bashkojnë e nuk na ndajnë, ndonëse unë nuk e përjashtoj motivin politik për të pasur debate të tilla, sepse tek e fundit është më shumë se normale që në Parlament të bëhen debate politike. Unë kisha dashur t'i qartësojmë disa punë.

Konsideroj se nëse dikush mendon se në këtë debat ka pasur motive politike për ta ngritur një pikë të tillë, ndonëse ju përkujtoj se ne e kemi bërë shumë kohë më parë këtë gjë, atëherë duhet t'i qartësojmë disa punë. Në bazë të gjetjeve të auditorit janë disa çështje për të cilat duhet të pajtohemi gjithsesi që nuk janë politike. Për shembull blerja e çokollatave për çdo javë, blera e orëve në aeroporte, blerja e jastëkëve, blerja e enëve dhe e thikave në Strugë, mësimi për të skijuar, besoj se të gjithë duhet të pajtohemi që këtu me të vërtetë nuk ka asnjë motiv politik, d.m.th. bëhet fjalë për disa aspekte që ne mund t'i quajmë me emra të ndryshëm, por besoj se e kanë emrin të njëjtë, në këtë aspekt është një përgjegjësi e jona dhe këtu na e përkujtoj një kolege më e vjetër që buxheti i Parlamentit është aprovuar në Parlament. Unë konsideroj e njëjta përgjegjësi është e Parlamentit edhe për shpenzimin e këtij buxheti, prandaj për faktin që unë dhe disa kolegë të mi dhe besoj askush prej juve prej 120-ve as që ka ngrënë çokollata, nuk ka ndonjë orë të blerë në aeroport nga paratë e Kuvendit, nuk kam parë tesha prej 1000 €, d.m.th. është shumë e qartë që duhet ta bimë këtë çështje në nivelin më bazik, në mënyrë që të shohim nëse këtu mund të kemi solidaritet. Nëse thirret për unitet, unë besoj nuk ka mënyrë më të mirë për të demonstruar këtë unitet, sepse të jemi të gatshëm të jemi bashkëpërgjegjës për këtë çështje: Unë për veti nuk mund ta ndiej veten përgjegjës për këto gjetje. Ju ftoj të gjithë juve, d.m.th. ta lëmë anash politizimin, të tregojmë gatishmëri dhe unitet, ta votojmë një komision i cili në mënyrën më të qartë do ta tregojë se çka është e rregullt e çka nuk është në rregull. Në këtë aspekt shumë lehtë

do ta zgjidhim çështjen e përgjegjësisë dhe çështjen e politizimit. Pra ju ftoj që me një gjakftohtësi pa paragjykuar këtë auditim, të krijojmë një komision të përbashkët. Ne besojmë se duhet ta udhëheqë opozita në mënyrë që t'i tejkalojmë këto keqkuptime dhe nuk kemi nevojë të përdorim fjalë të rënda ndaj njeri tjetrit. Nëse ju jeni të gatshëm, është shumë e thjeshtë, një mik imi tha: Është një lloj testi demokratik, nëse kemi gatishmëri këtë punë mund ta kryejmë shumë lehtë dhe mund të vazhdojmë më tutje t'ia lëmë përgjigjen në Komisioni ad-hoc, që është një praktikë e plotë demokratike, të cilët do të merren, në mënyrë të qartë me gjitha këto që u ngritën sot në debat. Ju faleminderit!

KRYETARI I KUVENDIT KOLË BERISHA – Ju faleminderit! Fjalën e ka deputeti Xhelal Canziba, le të përgatitet deputetja Sala Berisha-Shala, një kartelë të Sala Ahmetaj, kandidati i fundit

DEPUTETI XHELAL CANZIBA – I nderuar z. kryetar është mirë që në këtë moment nuk është prezent askush prej Qeverisë as ministra derisa na kemi lejuar që si organ më i lartë ligjvënës të bëhet ky keq menaxhim, keqpërdorim i Buxhetit të Kosovës dhe i Kuvendit, atëherë si mundemi ne si organ më i lartë me e kontrolluar ekzekutivin? Prandaj unë mendoj se Kuvendi e ka humbur atë të veten, në vend që të jetë organ që e mbikëqyrë ekzekutivin, Kuvendi është shndërruar në servil të Qeverisë. Citoj disa të dhëna nga raporti i të gjeturave faktike: Procedurat tona kanë qenë të kufizuara nga dokumentacioni dhe informacionet e ofruara. Për më tutje, pasi që intervistat formale me menaxhmentin e Kuvendit nuk ka ndodhur, ne nuk kemi mundur t'i vendosim në tekst disa veprime apo lëshime të mundshme të identifikohen. Ne i kemi vërejtur që informacionet, dokumentacioni dhe procedurat e mëtutjeshme mund të dilnin me më shumë të gjetura dhe të gjetura me konkluzione të ndryshme.

Vetura e blinduar më 24 mars të vitit 2005, sekretari i Kuvendit ka kërkuar nga shefi i autoritetit të prokurimit publik për përdorimin e prokurimit të drejtpërdrejtë, kërkesa është bërë për dy vetura për kryetarin e Kuvendit, kërkesa për prokurim ka qenë në shumën 750.000 euro. Prokurimi është njëburimor është kërkuar pasi nevoja është konsideruar të jetë urgjente. Duke u lidhur me incidentin e mëhershëm lidhur me sigurimin e kryetarit të Kosovës dhe nevojës për fshehtësi, sekretari i Kuvendit ka kuptuar se vetura duhet të dërgohen brenda 7 ditëve. Me të vërtetë më 24 mars në realitet- pagesa është bërë më 25 nëntor, që do të thotë sa pak kohë ka pasur që të merret me procedurë prokurimi. Udhëheqësi i logjistikës ka konfirmuar që veturat janë pranuar më 25 nëntor 2005. I vetmi dokument që na afron si evidencë që vetura ekziston është një faqe e pranuar me faks nga Sekuriti pro Jue Sej, adresa Trade Fodej Internesel më datë 14. 2006 që tregon. Kjo është për t'ju informuar se... limuzina është e blinduar dhe është e gatshëm për ta marrë.

Ne kemi tentuar ta kontaktojmë Treid Fodej Internesel dhe për të konstatuar vendndodhjen aktuale të veturës, por nuk kemi pasur sukses.

Te "Vila Germia"projekti i Vila Germisë përbëhet me dy pjesë -fazën e disejnimit dhe fazën e ndërtimit – Faza e disejnimit, tenderi është publikuar më 24 prill 2004, në të cilin janë përgjigjur pesë palë të interesuara, dy nga palët e interesuara nuk kanë paraqitur ofertën, UNIPROJEKT ... dhe MABI TEX, njëra prej palëve ka ofruar ofertë jo valide dhe nuk kanë pasur ofertë financiare. Për të qenë në listën e ofertave financiare, sido që të jetë në dokumentacionin e prokurimit kjo palë tregohet sikur ka paraqitur ofertë valide. Duket se është bërë për të qenë në pajtueshmëri me Rregulloren e

prokurimit në të cilat kërkohen tri oferta valide që janë zbatuar. Të dy palët tjera NDËRTIMI dhe Fakulteti për Ndërtim dhe Arkitekturë, Fakulteti për Ndërtim dhe Arkitekturë nuk kanë shprehur interesin në bashkëpjesëmarrjen në tender me R.GALLA, R.GALLA është zgjedhur si fitues i tenderit dhe në dokumentacionin e prokurimit u emëruar si palë fituese dhe asnjë referencë të mëtutjeshme nuk është bërë për Fakultetin e Ndërtimtarisë dhe Arkitekturës. Ne nuk kemi hetuar se nëse kjo përfaqëson shkelje të rregullave të tenderit. R.GALLA në **konuotur** me projekt ndërtimit, me projektin e dizajnit Komisioni vlerësues ka pasur 5 anëtarë. Ne kuptuam se njëri nga anëtarët e këtij komisioni vlerësues është pronar i MEGËS nga Gjilani, e cila është fituese e kontratës për ndërtim. Ne kemi vërejtur se Komisioni i parë vlerësues ka përfshirë edhe një numër të ofertuesit fitues për fazën disajnuese. Komisioni i dytë vlerësues në fakt ka përfshirë dy punëtorë nga GALLA, kjo i bie sipas asaj ti mua, unë ty dhe i nderuar kryetar i Parlamentit shumë vetë mendojnë që ne deputetë këtu me të vërtetë i kemi kushtet e mira në Parlament po realiteti është një, që një pjesë e deputetëve në Parlament nuk kemi asnjë karrige ku të ulemi e të mos flasim për zyra. Prandaj edhe e pyes kryetarin dhe Kryesinë çka ka bërë Parlamenti për ne? Derisa nëpër rrugët e Kosovës i shohim çdo kund veturat zyrtare shëtitën, por deputet të Parlamentit ka ende sot që udhëtojnë me makina të vjetra po edhe me autobus një, e dyta e pyes kryetarin e Parlamentit dhe Kryesinë çka kanë bërë pasi është zgjedhur kryetar, që këto keq menaxhime dhe keqpërdorime të mos ndodhin në Parlament. Ju faleminderit!

KRYETARI I KUVENDIT KOLË BERISHA – Ju faleminderit! Fjalën e ka deputetja Sala Berisha Shala, me kartelë të Sala Ahmetaj

DEPUTETJA SALA BERISHA SHALA - Ju faleminderit z. Kryetar, të nderuar kolegë deputetë. Unë nuk e kisha ndërmend të diskutoj në lidhje me këtë pikë të rendit të ditës, e bindur se nuk do të lënë asgjë mangu kolegët e mijë nga Grupi parlamentar i Partisë Demokratike të Kosovës.

Nuk do të ndalem as në analizën e Raportit të të gjeturave faktike në Parlamentin e Kosovës, megjithatë i lejoj vetes të diskutoj pak më ndryshe. Unë do të ndalem në pjesën e çështjes së ndërtimit të “Vila Gërmisë” protokollare në mushkëritë e kryeqytetit, në parkun e Gërmisë duke mos bërë as komentimin e shpenzimeve shifrove në euro, do i qasem një dimension tjetër dhe atë se a janë analizuar këto dy çështje, cili është dhe nuk është respektuar perceptimi i qytetarit të Kosovës, cila është ndjenja e tij në lidhje me këto çështje? Mendoj se injorimi i shqetësimit të qytetarëve tanë ambietalistëve e tjerë nga ana e Kuvendit dhe Qeverisë është ndëshkimi mospërfillja më e madhe e mundshme që mund t’u bëhet atyre.

Këtë shqetësim, këto ditë më rastisi ta shoh edhe në një poezi të poetit Agim Deva, titulluar kush na e ka fshirë Gërminë, dikujt do t’i duket qesharake, kjo poezi e botuar në gazetën për fëmijë “Pionjeri” në të cilën poezi poeti më së miri poeti e sublimon shqetësimet, më lejoni t’i citoj disa vargje të tij ku thotë se dikush urdhër kishte dhënë, do kafshuar në ballë Gërminë, mjaft mëshirë, ne duhet ngritur në pallat për Qeverinë e tjera e tjera, kjo për mua ishte shumë shqetësuese sepse do jem pjesë e asaj ndarjes se qytetarët kanë tjera shqetësime ndërsa deputetët dhe qeveritarët kanë tjera shqetësime. Dhe krejt në und unë, kisha një pyetje: A thua jetojmë në hapësirë dhe kohë me qytetarët tanë apo jemi ndarë përfundimisht me ta? Ju faleminderit për vëmendje.

KRYETARI I KUVENDIT KOLË BERISHA- Ju faleminderit! Ftojë deputetët që të kthehen në sallë.

Debati rreth kësaj pike ka përfunduar. Gjatë debatit ka pasur propozime për formimin e një komisioni.

Po presim që delegatët të kthehen në sallë.

Ju lutemi regjistroni. Në sallë janë momentalisht 87 deputetë, kush nuk ka kartelë mund të votoj me dorë, përndryshe votimin do ta bëjmë elektronik.

I lus regjinë, urdhëroni z. Krasniqi

URDHËRONI SHEFI I GRUPIT PARLAMENTAR TË LDK-së

DEPUTETI ALUSH GASHI – I nderuari zi. kryetar, që nga fillimi i ngritjes së kësaj çështjeje Lidhja Demokratike e Kosovës ka pasur dhe qasje shumë principiele se kërkush nuk është mbi ligjin dhe se duhet respektuar Rregullorja e punës së Kuvendit. Gjatë trajtimit të kësaj materie ne i kemi parë disa mundësi të verifikimit të këtyre të dhënave, nën një, që mund të merret Komisioni për Buxhet dhe Financa, sipas Rregullores së punës së Kuvendit, rregulla 50, mundësohet edhe formimi i ndonjë trupi apo komisionit të posaçëm i cili në bazë të rregullës 42 caktohet në nivel dhe kompetenca të Komisionit funksional, por në këtë rast si komision ad-hoc, por pasi që çështja ka shkuar në hetuesi dhe organet e hetuesisë merren, ne e kemi dilemën ndërhyrjes apo të mosndërhyrjes në punët e organeve të drejtësisë. Ne nuk kemi asnjë arsye të provojmë që ta hedhim dike apo ta mbështesim që të jetë mbi ligjin. Andaj, cilado prej mënyrave e cila në mënyrë të denjë i japë udhëzime që në Kuvendin e Kosovës në përgjithësi në institucionet demokratike të Kosovës të mos ketë keqpërdorime, Ne nuk kemi asnjë arsye që mos ta mbështesim, andaj jemi shumë të hapur për këtë çështje me një vërejtje të posaçme. Ne distancohemi nga fjalori që e kemi dëgjuar sot, i cili në disa momente ka qenë edhe fjalori i rrugës. Andaj z. kryetar kërkujmë nga ju që ta formuloni propozimin dhe ne votojmë për propozim i cili do të mundësojë një transparencë institucionale në Kuvendin e Kosovës.

KRYETARI I KUVENDIT KOLË BERISHA – Ju faleminderit! Fjalën e ka z. Krasniqi

DEPUTETI JAKUP KRASNIQI - Z. kryetar, Grupi Parlamentar i Partisë Demokratike ka marrë pjesë në debat me qëllimin më të mirë jo për të dënuar askë se në fund të fundit dënimi dhe hetuesia janë lëndë për prokurori dhe gjyqësi, Grupi Parlamentar i Partisë Demokratike ka marrë pjesë në debat për t'i afruar vërejtjet e veta, për t'i shfaqur mendimet e tija për raportin që e kemi pasur përpara i cili ka gjetur fakte dhe dëshmi të bollshme se kryetari i Parlamentit dhe administrata e Parlamentit të Kosovës kanë shkelur ligjet në fuqi, prandaj ky Raport është shumë i kufizuar, ne kemi fakte dhe dëshmi tjera se keqpërdorimet kanë filluar që në fillim të këtij legjislacionit të parë dhe kanë vazhduar për legjislaturën e dytë, dhe se duhet të formohet një komision hetimor parlamentar i cili ka për detyrë me vërtetuar jo shkallën e dënimit të këtij apo të atij personi, por për të gjetur dhe për të vërtetuar shkallën e përgjegjësisë politike të njerëzve që janë të veshur me fuqinë e pushtetit. Kjo mendoj është një nga detyrat e Komisionit hetimor që duhet ad-hoc të jetë dhe që duhet të udhëhiqet nga opozita. Mendoj që pozita i ka pasur të gjitha mundësitë për ta ndaluar keqpërdorimin jo vetëm në buxhetin e Parlamentit të Kosovës por edhe në të gjitha njësitë tjera shfrytëzuese të

buxhetit të Kosovës, prandaj ky Komision do të duhej të udhëhiqej nga opozita dhe grupet parlamentare në seancën tjetër ose në ndërkohë duhet t'i dërgojnë emrat e deputetëve të tyre që duan të jenë pjesëtarë të këtij komisioni hetimor. Do të thotë komisioni duhet të jetë hetimor dhe mendoj që ky komision duhet t'i sjellë rekomandime këtij Kuvendi se cilat do të jenë detyrat dhe obligimet e Kuvendit të Kosovës, dhe ndoshta rekomandimet do t'i bie pas një hulumtimi që do ta bëjë nga janari i vitit 2002 e këndeje. Prandaj ne jemi ata që dëshirojmë që i gjithë Kuvendi t'i japë tri shërbime të mëdha Kosovës në këto procese. Një, në mënyrë të veçantë mund ta bëjë pozita ose koalicioni në fuqi që të ndihmon demokratizimin e jetës institucionale në Kosovë. Dy, plotëson dy standarde e tjera të fuqishme, një është standard i sundimit të ligjit që ka nevojë Kosova në përgjithësi të vendosë sundimin e ligjit në të gjitha jetën institucionale në Kosovë dhe tre, dëshmojmë edhe përmbushjen e një standardi të tretë se edhe pozita edhe opozita e kanë gatishmërinë për ta luftuar krimin dhe korrupsionin e organizuar që ka depërtuar dhe është instaluar në institucionet e Kosovës. Ju faleminderit!

KRYETARI I KUVENDIT KOLË BERISHA – Ju faleminderit! Teuta Sahatqiu

DEPUTETJA TEUTA SAHATQIJA – Ju faleminderit z. kryetar. Rregullorja e punës së Kuvendit të Kosovës e lejon formimin e Komisionit hetimor, prandaj nuk mendoj se është diçka jashtë rregullores, është pikërisht respektim i Rregullores së punës. Komisioni për Buxhet ka ekzistuar, por deri në këtë moment nuk ka pasur mundësi që me këtë çështje të merret, të alarmon dhe të tregon për keqpërdorime edhe pse ajo ekziston prej fillimit të këtij legjislacionit. Mendoj që si përfundim prej këtij debati, duhet të formohet Komisioni hetimor i cili nuk ndërhytë aspak në punën e hetuesisë, por pikërisht do të ndihmon në demokratizimin dhe do të ndihmon në punën e këtij Kuvendi. Ai Komision duhet të udhëhiqet prej opozitës, pasi pozita duke pasur parasysh që i ka pasur të gjitha mjetet për të mbikëqyrë dhe për ta luftuar dhe e ka humbur rastin, mendoj që opozita do të duhej ta udhëheqë këtë Komision. Ne si grup parlamentar jemi për formimin e këtij Komisioni sipas Rregullores, ato çka e ofron Rregullorja. Ju faleminderit

KRYETARI I KUVENDIT KOLË BERISHA – Ju faleminderit! Në emër të AAK-së deputeti Naim Maloku

DEPUTETI NAIM MALOKU – I nderuari z. kryetar, të nderuar kolegë deputetë. Në emër të Grupit Parlamentar të AAK-së i falënderoj të gjithë pjesëmarrësit në debat duke i dhënë vetes të drejtë që në emër të Grupit Parlamentar të AAK-së të distancohem nga të gjitha ato diskutime dhe fjalë, të cilat nuk i përkasin nivelit të deputetit dhe që janë folur në këtë Kuvend.

Të nderuar deputetë! Duke e shfrytëzuar të drejtën në emër të Grupit parlamentar të AAK-së jap mbështetje që të formohet komisioni hetimor i Kuvendit të Kosovës duke ia tërhequr vërejtjen Partisë Demokratike të Kosovës dhe ORA se komisioni parlamentar formohet nga Kuvendi i Kosovës dhe nuk ka komision parlamentar të opozitës, do të formohet vetëm kur merret shumica e votave në këtë Kuvend, në emër të

Grupit Parlamentar të AAK-së jap mbështetjen që kryesues i Komisionit parlamentar ad-hoc që do të quhet Komision hetimor të kryesohet nga një deputet i opozitës. Ju duhet ta dini se edhe Komisioni parlamentar AD-hoc, do të përbëjë fuqinë e grupeve parlamentare në atë Komision dhe normalisht vendimet duhet të merren. Ne ftojmë që vendimet e Komisionit të jenë unanime dhe unike. Ju faleminderit!

KRYETARI I KUVENDIT KOLË BERISHA

Ju faleminderit, deputeti Sabri Hamiti e ka fjalën,

DEPUTETI SABRI HAMITI - kolegë të dashur deputetë, të pozitës dhe të opozitës, të opozitës së kanë qenë në pozitë se kemi hyrë në ... të 2002-shit, tash përjashtohen këto. Unë këtu sot po flas në emër timin dhe për herë të parë po ju them si anëtar i Kryesisë të Parlamentit se kemi pa që këtu titujt thonë diçka. Megjithëse unë e dua logjikën më se këto, po ne të jetë kësaj radhe. E ndiej një obligim që unë këtu t' jua them dy- tri gjëra të cilat kanë ndodhë në Kryesinë e Parlamentit dhe po ndodhin në këtë parlament, njeri i gjallë në mënyrë të qartë nuk e thotë.

Lidhja Demokratike e Kosovës, pranon të diskutojë dhe të debatojë për çdo gjë, që ndodh në institucionet e Kosovës. Lidhja Demokratike e Kosovës ka qenë e gatshme që të bisedojë edhe për këto probleme, që tashti ne po bisedojmë këtu. Mirëpo, Lidhja Demokratike e Kosovës, si parti e përgjegjshme, që nuk merr turr çdo 5 minuta, sipas ndërrimit të kohës në Prishtinë, e koha në Prishtinë është më e ndryshueshmja në Ballkan, por do logjikë që, nëse shtrohet një problem kjo të ketë argumente dhe të kërkohet një zgjidhje, edhe rreth diskutimit të kësaj që tash po quhet menaxhim i pareve të Kuvendit, etj. publike, kurrë nuk kemi hezitur, vetëm se jam unë ai, tash po flas, në vetën e parë njëjës, edhe në Kuvend edhe në grup parlamentar, dhe këtu që kam logjikuar, a thua një bisedë e tillë çka prodhon kjo në Parlament. U vërtetua zonja dhe zotërinj që prodhoj një mijë sot këtu, prodhoj një gardë të fjalimeve të niveleve tepër të ulëta profesionale, për temën e shtruar. Mua më vjen shumë keq, po këtu nuk e përjashtoj askënd, as nga pozita as nga opozita. Thjeshtë dëshmuam, unë po them dhe unë mendoj që u dëshmuaj jo që kam hezitur unë që këtu nuk do të ndodhë asgjë substanciale, po se do të shfryhen njerëzit nga 6 orë, të flasin dhe të shkojnë në shtëpi.

Ky ka qenë hezitimi im dhe jam unë ai që kam hezitur dhe nuk e fsheh, po unë nuk e përbëj shumicën, as në LDK, as në Kryesi dhe kjo ka ardhë në banka të diskutohet. Ne një herë nuk kemi thënë që, ky hetim nuk është i përfunduar, dikush po i thotë auditim, mua më duket hetim dhe unë e them haptas, auditim nuk është, ky është hetim, që është bërë për disa veprime në Kuvendin e Kosovës dhe ka shkua paralelisht në gjyqësi. Më vonë ka ardhur tek ne dhe këtë duhet ta dinë opinioni, ta dijë edhe Kuvendi, dhe pozita dhe opozita, zotërinj. Prandaj më është dukur që jemi si kofini pas të vjelave, po diskutojmë për problemet e pakryera. Mirë, ne kemi thënë që dom hetim të plotësuar, është thënë që është i kryer dhe ne jemi këtu. Kjo nuk është histori, po është esencë, për këtë çka po bisedojmë ne sot dhe në Kryesinë e Kuvendit zonja dhe zotërinj, opozita e ka lëshuar mbledhjen dhe ka ardhur me kushtëzime në Kryesinë e Kuvendit të Kosovës. Opozita tashmë thanë të strukturuar, të vetorganizuar, ju uroj riorganizimin. Është e drejta e tyre, kanë ardhë me kushtëzim, kanë thënë: ose formoni ju Komision me konsensus, Kryesia e Kuvendit, ose ne nuk vijmë në bankat e Parlamentit. Kështu është thënë në Kryesi. Jam unë që kam thënë, meqë ju doni me konsensus, na shtyni të bëjmë gabim procedural, në

sekondat e parë mua më keni kundër, në mënyrë që të mos ketë konsensus dhe unë mendoj që kjo ka qëndrim parimor. Pa marrë parasysh që gazeta e Veton Surroit, komenton pa dhënë fakte. Unë e respektoj Surroin si njeri të letrave publicistike dhe e kisha sugjerua t'i mësojë pak profesionalisht argatët e vetë Sepse, në gazeta lejohet interpretimi dhe është origjinaliteti i gazetës po fakti duhet të jepet, pra, unë Sabri Hamiti si anëtar i Kryesisë kam qenë kundër që Kryesia e Kuvendit, për një kërkesë politike e kujtdo qoftë të bëjë gabim dhe të vendosë për diçka që nuk ka të drejtë dhe është dashtë t'i humbim katër orë zonja dhe zotërinj që të binden të gjithë se duhet të bëjmë çka nuk duhet, që të vijmë këtu të bisedojmë, që ju të vendosni nëse ka nevojë, që të formohet një komision hetues, le të formohet zonja dhe zotërinj, unë kam luftuar për të drejtën tuaj, ju merreni si të doni. Që të mos vendos unë për ju, ose ne pesë për ju dhe ju interpretoni si të doni.

Pra, është në detyrën e Parlamentit, që për një çështje që është në diskutim, ose për një fenomen që mendon që ekziston, që e vlen të formohet një Komision, që ta formojë atë komision. Unë nuk paragjykoj asgjë. Unë nuk them as po, as jo, veç se unë them që ajo është e drejta e juaj. Ju gjykoni vetë, çfarë duhet të jetë ai komision dhe çka do të bëjë. Mua më është dukë pak e çuditshme dhe këtë e kam shtruar edhe më herët, pse të bëhet ky diskutim sot dhe të bëhet edhe një diskutim edhe një herë, me të njëjtin qëllim. Nëse ky Kuvend mendon të jetë serioz, pse nuk e kanë ndërtua atë komision dhe në fund edhe këtë auditim, apo çka po i thonë hetim dhe atë personal ta diskutoj.

Ne do ta duplikojmë atë diskutim. Sigurisht unë nuk besoj se do të kemi diçka të re, por unë nuk e paragjykoj gjatë me çka do të merret ky komision, sepse unë nuk po e di ende, prej propozuesit me çka merret ky, pos vullnetit me e formua. Nuk kam dëgjuar ende, nuk pashë. Gjithë i dëgjova me vëmendje dhe unë nuk di çka bën ky Komision. Besoj që në ndërkohë do të na tregojnë, cili është mandati?

Po unë e di që prapë, përtej rregullores tonë të Parlamentit nuk mund të kalojmë, se atëherë ne i shkelim rregullat e po dom ligjshmëri e ligjshmëria thotë që ky Parlament ka të drejtë me formua komision ad-hoc, i cili e përfaqëson përbërjen e Parlamentit. Sa për kryesimin u tha këtu, është mirë sepse pozita ose kjo që quhet pozitë momentalisht, ose shumica në Parlament nuk po u dashka ta kryesojë këtë Komision, sepse është, ka pasur shanse që t'i pengoj këto probleme, nuk e ka marrë shansin, tash e korrigjon opozita. Unë menjëherë po e rrëzoj këtë, me argumente të tyre, thanë që deri në 2002 duhet të punojë ky Komision, e prej 2002-shit keni qenë pozitë, ose as na, as ju, njësoj krejt.

Ajo ka qenë Qeveria e koalicionit, ju lutem shumë, nuk mundet njeri me qenë në dy vende në të njëjtën kohë, edhe në pozitë, edhe opozitë, ka qenë qeveri e koalicionit të madh. Tash e kemi një qeveri me copën e vogël të PDK-së, ose me AAK-në, unë nuk di me kë, kjo nuk është me rëndësi, me rëndësi është që ekziston një koalicion. Koalicionet janë normale, kështu që, Komisioni përfaqëson karriget në Parlament dhe unë mendoj që do të formohet. E pra, nëse mua më pyetni, meqë qenka kjo punë prej 2002 deri 2006-tëshin, po, nëse e formoni po, me dy bashkëkryesues. Një pozitë dhe opozitë, një pozitë atëherë një opozitë tash ose një opozitë tash një pozitë atëherë, si të doni. Edhe një fjali të fundit, kolegë të nderuar, unë pashë që ka nevojë për diskutime këtu dhe diskutimi ka qenë shumë i koncentruar, megjithatë kam ikë krejt në fusha sociale.

Unë propozoj që, me propozim timin ose të pozitës, ose të opozitës të diskutohet gjendja sociale në Kosovë, që është e rëndësishme të diskutohet, të mos të diskutohet duke ikë, flitet për menaxhim të financave në Parlament dhe flasim për gjendjen sociale. Nuk është mirë se nuk jemi serioz, atëherë ta bëjmë temë gjendjen sociale dhe të bisedojmë. Ju faleminderit!

KRYETARI I KUVENDIT KOLË BERISHA

Ju faleminderit, pas urdhëro Xhavit, shefat e grupeve parlamentare,

DEPUTETI XHAVIT HALITI – kolegë të nderuar, ne të gjithë e dimë që Komisioni për buxhet, ka pasur dhe ka kompetenca me Kornizë kushtetuese po aq sa ka një kontroll shteti në një shtet normal. Duhet të konstatoj, që as mandatin e kaluar, as në këtë mandat ky Komision, nuk e kryer obligimin e vetë kushtetues, dhe rrolin që e ka si kontroll i buxhetorëve të Kosovës në përgjithësi. Prandaj, mendimi im është që, këtij Komisioni i cili është shndërrua realisht në vazhdimësi edhe në mandatin e kaluar, edhe në këtë mandat ka bë një lëvizje pak më pozitive, është shndërrua në një mekanizëm i cili është më shumë, i shqyrton ligjet dhe merret me çështje të cilat kanë të bëjnë me ndarjen e rrogave, ose ato pjesë që i mbesin buxhetit të Kuvendit të Kosovës, dhe jo rrolin kushtetues të cilin e ka të garantuar. Prandaj mendoj që propozimi për të qenë ky Komision, si komision hetues, duhet të bie poshtë.

Së dyti, arsyeja e kontrollit të buxhetit, është sepse ne po fillojmë një praktikë të re. Unë mendoj që nuk do të jetë e fundit. Dhe nuk duhet të jetë e fundit, por është dashtë me fillua diku dhe është mirë që po fillojmë si parlament në vetveten tonë, që nesër të vazhdojmë, ti hymë kontrollit në të gjitha institucionet buxhetore duke përfshirë edhe Qeverinë, qoftë ajo e kaluar e koalicionit të gjerë, qoftë kjo e koalicionit pak më të ngushtë, po në përgjithësi kemi obligim, dhe përgjegjësi të gjithë njësoj, që të shohim ku po shkojnë paratë e qytetarëve.

Unë e mbështes parafolësin tim, kolegun Hamiti, që të diskutohet për atë çështje, por mendoj që do të duhej ta thërrisnim edhe ministrin, që të na sqarojë për gjendjen dhe mundësitë buxhetore të Qeverisë, për ta mbështetur këtë kategori sociale dhe pse jo, pse mos me vazhdua. Problemi i Komisionit është propozua, në Kryesi, jemi përpjekë me gjet një konsensus, ndoshta e kamë thënë edhe publikisht që, pozita është pozicionua drejt, edhe pse ka amujt ndoshta me reagua ndryshe, dhe unë mendoj që edhe pozita edhe opozita, duhet të jenë në dakord të formohet Komisioni i udhëhequr prej opozitës, ky Komision të jetë në numër të barabartë, tani po them, të anëtarëve pozitë, opozitë dhe të shqyrtohen çështjet të cilat një pjesë e tyre nuk janë shqyrtua, nga auditi, sepse këto janë të faktuese dhe nuk kemi çka i hymë prapë, të shqyrtohen çështjet të cilat nuk i ka prekë auditi, dhe në veçanti, meqenëse kemi të bëjmë me parlamentin, të shohim procedurat a janë zbatua sipas ligjit procedurat, në tërheqjen e parave nga buxheti i Kosovës dhe a kanë kalua përmes procedurave të rregullta ku është dashtë me u marrë vendimet për tërheqjen e parave, dhe për shpalljen e tenderëve. Ju faleminderit!

KRYETARI I KUVENDIT KOLË BERISHA

Ju faleminderit, propozimin për formimin e Komisionit hetimor e qes në votim, lus regjinë dhe deputetët të përgatiten për votim

Votoj tash:

PËR.....77,
KUNDËR.....3
ABSTENIM.....3

Komisioni do të formohet sipas Rregullores së punës, do të ishte mirë që shefat e grupeve parlamentare të angazhohen për emrat e kandidatëve.

Mund të marrim pauzë 30 minuta, ndërsa shefat e grupeve parlamentare të hiqen në zyrën time

KRYETARI I KUVENDIT KOLË BERISHA

Deputet[të nderuar, shefat e grupeve parlamentare në kohën që kishim caktuar morën këtë vendim.

Në bazë të vendimit të Parlamentit që të krijohet kuorum të krijohet komisioni hetimotr, në këtë përbërje:

1. Ferid Agani, nga Grupi Parlamentar për Integrim, kryetar i Komisionit,
2. Lutfi Zharku, i LDK-së, nënkryetar i parë,
3. Husnija Beshkoviq, i Grupit 6+, nënkryetari i dytë,
4. Naser Osmani, LDK, anëtar,
5. Ali Sadriu LDK, anëtar,
6. Besa Gagjerri, LDK, anëtare,
7. Shaban Halimi, LDK, anëtar,
8. Nimon Alimusaj, LDK, anëtar,
9. Gazmend Muhaxheri, ORA, anëtar,
10. Mazllom Kumnova, AAK, anëtar,
11. Gani Koci, PDK, anëtar,
12. Afrim Arzuallxhiu, PDK, anëtar,
13. Safete Hadrgjonaj, PDK, anëtare,
14. Një vend mbetet i zbrazët për listën serbe – anëtar.

Detyrat, kohëzgjatjen, dhe mënyrën e punës, e përcakton më vonë ky Kuvend, më propozim të Komisionit që të punojë më vonë.

Pika e 4 e rendit të ditës, shtyhet për javën e ardhshme, meqenëse, e kemi në plan ta mbajmë, Besa, tani ta jep fjalën, pasi kemi planifikuar që javën e ardhshme, të enjten ta mbajmë një mbledhje tjetër, një seancë tjetër plenare. Pikën e 4. që e kemi caktuar për sot e bartim në rendin e ditës së javës së ardhshme.

Besa, urdhëroni,

DEPUTETJA BESA GAGJERRI – Zoti kryetar, ju faleminderit për fjalën, Megjithëse unë nuk e di a u dëgjova mirë, më duket se thatë se në seancën tjetër do të ju tregojmë mënyrën e punës, a thatë kështu apo, e dëgjova unë, (po), atëherë e kam; pak më të qartë, sepse unë desha të them se jam anëtare, shumica e këtyre anëtarëve janë anëtarë të Komisionit të Buxhetit. Cilët anëtarë e kanë shqyrtua këtë material edhe i keni

dërguar rekomandimet Kuvendit, në Kryesinë e Kuvendit. Kjo është tashmë një lojë në rreth vicioz, po megjithatë do t' jua bëjmë qefin, sepse tashmë ju kemi dhënë hapësirë, opozitës me iu bë qefin sa herë të kanë qejf, por unë po pres atëherë ,sepse nuk kam aftësi më të mëdha se ato që i kam përdorë në Komisionin e Buxhetit me u marrë me këtë çështje. Presim prej juve me na mësuat si me punua. Ju faleminderit!

KRYETARI I KUVENDIT KOLË BERISHA

Ju faleminderit, Xhavit Haliti urdhëroni,

DEPUTETI XHAVIT HALITI – Zoti kryetar,

Unë propozoj që Komisioni të takohet në fillim të javës së ardhshme, le ta caktojnë këta mbledhjen, Komisioni ta bëjë Rregulloren e punës vetë. Në bazë të Rregullores së punës të cilën e miraton Komisioni dhe të na informojë edhe neve. Le të punohet dhe atë që e shkelin Rregulloren që e miratojnë vetë, ta dinë kush po e shkelë, megjithëse ndoshta do të duhej që ky komision, këta njerëz, ose Komisioni në fjalë të votojë edhe një herë me një votim formal, ndoshta që emrat që tash po.

KRYETARI I KUVENDIT KOLË BERISHA

Për fushëveprimin e tij duhet Kuvendi ta bëjë një votë formale, Urdhëroni profesor Sabri,

DEPUTETI SABRI HAMITI – Zoti kryetar i Kuvendit,

Ne dëgjuam një propozim që ju thoni, që me cilin janë marrë vesh grupet parlamentare, unë nuk kamë kurrfarë vërejtje, gjithë deputetët tjerë janë të barabartë, të këtij Kuvendi, pa marrë parasysh partitë. Megjithatë, vërejtja e ime është që, nëse është kërkuar nga opozita që ta drejtojnë këtë Komision, dhe nëse grupet parlamentare janë pajtuar që, të ju jepet drejtimi këtij Komisioni, unë mendoj që është normale, që këtë Komision ta drejtojë Partia Demokratike e Kosovës. Për 1000 arsye. Unë nuk e kamë të qartë pse ata, ose a ju kanë ofrua këtë, apo e kanë refuzua ta thonë haptas, pastaj kalojmë në votim. Duhet të sqarohen problemet, është normale në diskutimet dhe në rrugën si është bisedua për këto probleme, që kryesimin ta marrë Partia Demokratike e Kosovës. Ju faleminderit!

KRYETARI I KUVENDIT KOLË BERISHA

Ju faleminderit, urdhëroni zoti Krasniqi,

DEPUTETI JAKUP KRASNIQI – Zoti kryetar, Partia Demokratike nuk i ka ikë detyrave e përgjegjësi, ishte një propozim i shefit të grupit parlamentar të Lidhjes Demokratike, që të ketë bashkë-drejtuës, unë mendoj që nuk është nevoja që ky Komision të ketë bashkë –drejtues, po ta ketë një udhëheqës dhe ai udhëheqës ta marrë përgjegjësinë dhe u dakorduar që, mos të jetë as nga pozita as nga Partia Demokratike si opozitë, më e madhe, por që të jetë një si të them, si më i pa anshëm, dhe u përcaktuam për Ferid Aganin.

Kjo është një arsye, arsyeja tjetër është se, këtu u tha që prej vitit 2002 fushë veprimtaria e cila do të jetë e Komisionit, edhe Partia Demokratike ka qenë bashkëqeverisje dhe ne, d.m.th. në mënyrë të, me një marrëveshje e gjetëm drejtimin e këtij Komisioni ta banë Ferid Aganin si më i pa varur, i pa varur nga pozita e madhe dhe nga opozita. Kjo ishte arsyeja.

KRYETARI I KUVENDIT KOLË BERISHA

Ju faleminderit, urdhëro Alush,

DEPUTETI ALUSH GASHI – ju faleminderit zoti kryetar,

Ne para konsultimit me Ju, morëm një vendim që të formohet një Komision ad-hoc, në bazë të Rregullores si punës së Kuvendit, dhe me Rregullore kjo çështje është e përcaktuar çartë, neni 42. e tregon këtë së bashku me 50. ku ka një kryetar dhe i ka dy nënkryetar. Ne na vjen mirë, nëse Partia Demokratike e Kosovës, e merr përgjegjësinë për me e bë këtë hetim, por ne nuk e kemi vullnetin që këta ti detyrojmë, apo ti kushtëzojmë. Ne kemi delegua 6 deputet, që janë shumë të përafërt me çështje të buxhetit, dhe na takon që ta kemi nënkryetarin e parë, dhe atë e kemi marrë, për shkak të përvojave në vende të ndryshme, dhe të kërkesave të fuqishme këtu sot, ne kemi pranua që ky Komision të udhëhiqet nga opozita, për ne është më lehtë nëse merr një numër më i fuqishëm statistikor siç është PDK-ja, aq më tepër se këta do të jenë opozitë një kohë të gjatë, prandaj është mirë që ta udhëheqë këtë emision,

KRYETARI I KUVENDIT KOLË BERISHA

Ju faleminderit, Gjergj Dedaj e ka fjalën

DEPUTETI GJERGJ DEDAJ – kryetar ju faleminderit shumë, gjithë ditën Ju kamë dërgua, me thënë të drejtën prej sa jam deputet i këtij Kuvendi nuk kamë pas seancë më të mërzhitshme, fyerje, lavdata, e fjalor që nuk duhet, po dua me reagua ndaj vendimit, ju zoti kryetar, pse tash po hapë debat mbasi e kryem këtë çështje, gjitha grupet parlamentare që u takuam me Ju ishim në dakord që ta udhëheq këtë Komision që është e logjikshme dhe parimore, opozita, e opozita jemi dakorduar që ta udhëheq doktor Agani, d.m.th. nuk është mirë me fol për kualitetet e tij, por do me thënë jemi pajtue, e tash në demokraci dua me ua bë të gjithëve me dije, është një rregull, në krejt botën, në partitë e mëdha ia bënë të vogla dhe partitë e vogla bëhen të mëdha. Edhe për këta do të bindeni edhe Ju, një ditë partia më e madhe, që mendoj se shumë shpejtë keni me qenë opozitë, edhe opozita që është tash në opozitë ka me ju majtë leksione demokratike. Ju faleminderit shumë.

KRYETARI I KUVENDIT KOLË BERISHA

Ju faleminderit, Jakup a donë dhe ta përmbyllim ju lutem

DEPUTETI JAKUP KRASNIQI – zoti kryetar, unë megjithatë preferoj të jem opozitë me përgjegjësi, dhe jo pozitë pa përgjegjësi, po Partia Demokratike mendoj që është e gatshme ta merr përgjegjësinë për ta drejtuar këtë Komision. Po ne morëm vesh se ishit Ju zoti kryetar ishte Alush Gashi, shef i grupit parlamentar i Lidhjes Demokratike, dhe ishim ne të tjerët dhe u dakaorduam që ky Komision të udhëhiqet nga Ferid Agani, përndryshe Partia Demokratike është pjesëmarrëse aty dhe mund ta merr dhe përgjegjësinë bile edhe më shumë se sa për ta drejtuar një Komision.

KRYETARI I KUVËNDIT KOLË BERISHA

Ju faleminderit, shihemi, një votim formal, për anëtarët e Komisionit

PËR77;

KUNDËR.....3;

ABSTENIM....3.

83 deputet ishin në sallë . Do të shihemi këtu të enjten në orën 10.